

本國學基
叢書

公

是

集

上

臺灣省立臺中圖書館



31 120003399820

國立公共資訊圖書館典藏
由國家圖書館數位化

030.85
147x
32

特藏

書叢本基學國

集 是 公

(上)

撰 做 劉

臺灣省立臺中圖書館



31120003399820

行發館書印務商

公是集原序

公是先生總集七十五卷。敍文字爲五種。古詩集二十卷。律詩十五卷。諸五言、七言、歌行、篇曲皆歸之。詩內集二十卷。諸議、論、辯、說、傳記、書序、古賦、四言、文詞、箴、贊、碑、刻、誌、行狀皆歸之。內集外集十五卷。諸制、誥、章、表、奏、疏、駁、議、齋、文、覆、謚皆歸之。外集小集五卷。諸律、賦、書、啓皆歸之。小集大凡若干篇。古今之文人多矣。其能道胸中之蘊積。暢物理之有無。合衆美以爲己用。超倫類而獨得。使其語言如其心。其馳騁極所欲。環偉奇抃。放肆自若。非夫豪傑之士。不能至是。故自申、韓、管、商、慎、墨、屈原之倫。其道未必皆是。而其書傳焉。雖然。猶之貴文也。若夫原性命之統。貫誠明之本。考百子之雜博。判其真僞。雖至于六經。可折衷也。極帝王之治。奉事有功。雖在于今日。可按行也。是好古博物之士。所以貴乎學聖人而得其道真者。嗚呼。先生之文。優出于前人者。在是矣。傳曰。情深而文明。氣盛而化神。惟深故能通天下之志。以極萬物之理。則文有不明者乎。盛如四時。煦育賦予。雕刻衆形。萌芽天條。無有不備。是之謂神。故古今之士。智有所不周。文有所不明。由其情之蹇淺也。知其一不知其二。善于此不善于彼。由其氣窳而化狹也。嗚呼。先生可謂備矣。傳曰。不知言。無以知人也。先生之言。孰有知之者哉。言可知也。先生爲常存也。是有志聖人者。訊其通貫。穿諸子者。觀其辯。濟用當世者。向其辭。莫不有爲師之道焉。合而觀之。若韶、蕤、武象之天覆地載也。離而聽之。若琴瑟磬管之迭奏。靜深要妙。歸于平心氣感神明而已乎。先生論春秋、易象、七經說。弟子

公是集原序

記不載集中具別錄云弟攷序

公是集目錄

卷一

賦十七首

卷二

賦十一首

卷三

騷七首

四言古詩五首

卷四

五言古詩八十一首

卷五

五言古詩四十二首

卷六

五言古詩四十七首

卷七

五言古詩五十八首

卷八

五言古詩四十一首

卷九

五言古詩四十六首

卷十

五言古詩四十六首

卷十一

五言古詩四十五首

卷十二

五言古詩四十首

卷十三

五言古詩五十首

卷十四

五言古詩四十九首

卷十五

五言古詩四十八首

卷十六

七言古詩四十八首

卷十七

七言古詩三十六首

卷十八

七言古詩三十八首

卷十九

五言律詩九十七首

卷二十

五言律詩八十二首

卷二十一

五言律詩九十六首

卷二十二

五言律詩九十六首

卷二十三

七言律詩六十六首

卷二十四

七言律詩四十七首

卷二十五

七言律詩六十五首

卷二十六

五言長律五十一首

七言長律四首

卷二十七

五言絕句四十六首

卷二十八

七言絕句一百十五首

卷二十九

七言絕句一百十三首

卷三十

制誥四十一首

卷三十一

奏疏十首

卷三十二

奏疏二十首

卷三十三

奏疏十七首

卷三十四

表三首

序九首

卷三十五

序十七首

卷三十六

記十五首

卷三十七

義四首

辨二首

卷三十八

論七首

卷三十九

論八首

卷四十

論十二首

卷四十一

議十一首

卷四十二

說十一首

卷四十三

書啓三十七首

卷四十四

書啓三十八首

卷四十五

書啓三十七首

卷四十六

雜著十二首

卷四十七

雜著六首

卷四十八

雜著十一首

卷四十九

碑辭一首

字辭一首

箴三首

銘四首

頌一首

贊八首

策問二首

卷五十

文三十一首

卷五十一

傳家一首

行狀三首

卷五十二

墓誌銘十二首

卷五十三

墓誌銘六首

卷五十四

石記十四首

臣等謹案公是集。宋劉敞撰。敞字原甫。臨江新喻人。慶歷中舉進士。官至集賢院學士。事蹟具宋史本傳。葉夢得避暑錄話稱敞集一百七十五卷。據其弟敞所作集序稱公是總集七十五卷。敘爲五種。曰古詩二十卷。律詩十五卷。內集二十卷。外集十五卷。小集五卷。文獻通攷亦作七十五卷。則夢得所記爲誤矣。原本不傳。今新喻所刻三劉文集。公是集僅四卷。大約採自宋文鑑者居多。而又以劉跂趙氏金石錄序。泰山秦篆譜序。誤入集中。卽敞所作公是集序。亦采自文獻通攷。而未見其全。故注云失名。其編次疎舛可知。又錢塘吳允嘉別編公是集六卷。亦殊缺略。攷史有之序。春秋意林曰。清江爲二劉三孔之鄉。文獻宜徵而足。今三孔集故在。獨二劉所著燬于兵。則其佚已久矣。惟永樂大典所載頗富。今哀輯排次。釐爲五十四卷。疑當時重其兄弟之文。全部收入。故所存獨多也。敞之談經。雖好與先儒立異。而淹通典籍。具由心得。究非南宋諸家游談無根者比。故其文湛深經術。具有本原。敞序稱其合衆美爲己用。超倫類而獨得。瓌偉奇扞。放肆自若。又稱其攷百子之雜博。六經可以折衷。極帝王之治功。今日可以按行。學聖人而得其道。所以優出于前人。友于之情。雖未免推揚太過。然曾肇曲阜集有敞贈特進制曰。經術文章。追古作者。朱子晦菴集有墨莊記曰。學士舍人兄弟。皆以文章大顯于時。而名後世。語錄曰。原甫文才思極多。湧將出來。每作文多法古。絕相似。有幾件文字。學禮記。春秋說學公穀。又曰。劉侍讀氣平文緩。乃自經書中來。比之蘇公有高古之趣。

云云。則其文詞古雅。可以概見矣。晁公武讀書志。謂歐陽脩嘗短其文于韓琦。葉適習學記言。亦謂
敝言經旨。間以謔語酬。脩積不能平。復忤韓琦。遂不得爲翰林學士。蓋祖公武之說。今攷脩草敝知
制誥詔曰。議論宏博。詞章爛然。又作其父立之墓誌曰。敝與攷皆賢而有文章。又作敝墓誌曰。于學
博自六經。百氏。古今傳記。下至天文。地理。卜。醫。數術。浮屠。老。莊之說。無所不通。爲文章尤敏贍。嘗直
紫微閣。一日追封皇子公主九人。方將下直。止馬卻坐。一揮九制數千言。文辭典雅。各得其體。其銘
詞曰。惟其文章燦日星。雖欲有毀。知莫能。則脩亦雅重之。晁氏葉氏所言。殆非其實歟。乾隆四十六
年七月。恭校上。

總纂官內閣學士臣紀昀

光祿寺卿臣陸錫熊

翰林院編修臣孫士毅

纂修官翰林院編修臣周永年

公是集卷一

賦

秦昭和鐘賦 并序

祕閣有秦昭和鐘。形制絕異。其始得之。幽雍之間。其銘首日。不顯朕皇祖。十有二公云云。其藏于册府久矣。予因爲之賦。

直集賢院作

閱故府之藏器。歷先秦之遺蹤。哀三代之逾遠。美昭和之寶鐘。何形制之瑰譎。駭觀聽之鮮同。上盤拏而天矯。若騰蛟兮升龍。下紛結而扶倚。狀菱華與芙蓉。彼僻陋之小國。曾鑄作之絕工。非以其銘祖考之休烈。交人神之肅雝者哉。越千祀而獨存兮。俟有道而一見。諒鬼神之圖佑兮。謀盛德之幽贊。夫固夏聲之所出兮。襲二周之餘徽。苟延陵之既沒兮。哀知音其爲誰。詢款識之尙傳兮。邈沮頡之遺迹。世行隸之趨俗兮。又雖久而不覲。響沈潛以寂默兮。文幽晦而蔽匿。鮮人情之好假兮。在獨異而爲謫。幸蒙君之厚德兮。發陰壤之祕封。去瓦石之污處兮。歷君門之九重。庇高閣之虛爽兮。參衆寶而見容。儷笙鏞以千際兮。終詭時而不逢。審則而儀量兮。尙毋惑于權度。推律而攷鈞兮。猶將謹夫韶濩。等棄之而勿庸兮。喟觀者

宋劉敞撰

之未悟。保厥美以安處兮。焉惆悵而懷遇。

楛櫚賦

圓方相摩。純粹精兮。剛健專直。交神靈兮。馮翼正性。楛櫚榮兮。中立不倚。何亭亭兮。受命自天。非曲成兮。外無附枝。匪其旁兮。密葉森森。劍戟鏖兮。溫潤可親。廉而不傷兮。霜雪青青。不凍僵兮。壽比南山。邈其無疆兮。被髮文身。何佯狂兮。沐雨櫛風。蹇無所妨兮。苦身克己。用不失職兮。磨頂至踵。尚禹墨兮。黃中通理。類有得兮。屹如承天。孔武且力兮。懷其無華。不尚色兮。表英衆木。如繩墨兮。播棄蠻夷。反自匿兮。遯世無悶。曷幽嘿兮。明告君子。吾將以爲則兮。

罪歲賦 并序

星傳曰。歲星所居。五穀逢昌。又曰。其國不可伐。伐之反受其殃。所從來遠矣。自去年而歲旅于鳥帑。及今葑焉。鳥帑曰翼軫。翼軫楚也。自黔中至于長沙。自鄢郢至于鄂。皆楚也。于歲星至之日。郢大水。壞其兩邑。其後黔中長沙之蠻皆叛。所殺掠編戶。不可勝紀。吏士死者數十人。廝役扈養死者數千人。今又大旱。安在其逢昌且不可伐也。予甚惑之。作罪歲賦云。

昔余受命于聖哲兮。謂天道其不吾欺。何重華之莫予諒兮。忽乎使予以交疑。歲涖灘之南征兮。旅鳥帑以徘徊。美瞽史之有言兮。曰允慶而無菑。皇天既付至仁兮。固下民以爲歸。忽不察于衷兮。紛多故而逢殆。民離散而震愆兮。洵擾擾兮。晦在何向者。慕用之誠兮。今願爲此敦害。水與旱以並爽兮。中與外而交

悴。天蒼蒼其不言兮。吾誰與鑒。夫賞罰。吾初惡夫佞人兮。在邦家而必聞。羌名是而實非兮。苟以濟夫不仁。何重華之昭晰兮。猶有此之不情。棄終古之所守兮。喪厥初之令名。察重華其若茲兮。又況三苗與驩。咬寧世道之交喪兮。余豈不知其郵。入周章兮。帝廷出旁皇兮。兩垣哀蠢蠢兮。下民君胡悅而宴安。祛君蔽兮。任忠敷大德兮。無窮降福兮。穰穰憂民兮。懔懔往者不可及兮。來者猶可終也。

病暑賦

伊年六月。天久不雨。陽亢而不能反。陰窄而不能舉。赫兮歔歔。上下瘴暑。其中人也。墮惛鬱。若曠若曜。若烹若灼。若病大甚而不可救藥。若壯士之困而莫之解縛。若昔酒之醒。若毒蠱之蠶。若漬膠漆。若債溝壑。若商之季。懷乎厥角。若秦之敵。無所措手足。目眩白黑。耳亂清濁。噫其甚也哉。彼天地之上。信有所謂造化者耶。陰陽之樞。信有所謂陶冶者耶。一動一靜。信有所謂橐籥者耶。彼其鎔之爍之。炊之沃之。萬物職職。其所以作也耶。惟其若是。是以少者且壯而老矣。鮮者且花而槁矣。若膏之燃。若薪之傳。若影之改。而不見其朕焉。豈不悲夫。孰能違俗之昏昏。去物之汶汶。歎大莫之所極。超無有而獨存。亘萬古而一息兮。吾請從其後云。

離憂賦

抱戚戚以長處兮。弔惛惛以自眎。魂離離以駿邁兮。精蒙蒙而就翳。氣貿亂以轆轤兮。形爽沕而荒瘁。信民生之多難兮。伊天命之方摯。知隕性之無續兮。畏忝經而遺義。日月騰以漂忽兮。春與秋其狎至。卒撫

心以仰志兮。諒投艱以遺大。胄帝堯之餘烈兮。歷三正而相仍。下天漢而逾熾兮。啓東藩于大彭。國交訐以泯。棼兮。賢辟世而迅征。溯江介以幽處兮。汜三徙而弗聲。求王明而受福兮。祖來儀于太平。自彭城以來。凡三徙。皆江南。友羣龍以登績兮。敕休命于遠夷。兆別子于都邑兮。更名教于京師。繇清白以象賢兮。爰頽慶而歷茲。馭長策以遙駿兮。周窮荒而不疑。敵輸歡以馴教兮。夔變服而來嬉。中心實使生外兮。謀大道之難推。惟保姓之蟬聯兮。上參差以千歲。裕後葉之孔艱兮。憚情申而事廢。志激揚之未究兮。不克荷而爲罪。誨丁寧之在耳兮。洵僂俛而違殆。忽馳思于昊天兮。又寤擗而自對。發與齡以交永兮。旦命訴而罔害。涼不肖而遘怨兮。曾夫人之髣髴。原本始而罔豫兮。心沸湯以崩潰。覩履厚而戴高兮。顧久生其誰賴。願去人間以超舉兮。復供養以弭憂。苟一覩于顏色兮。豈餘生之足留。中恍惚而自失兮。恭聞命乎前修。天不可以忌兮。道不可與謀。毋苟襲匹婦以圖諒兮。固將徇騫父以寡尤。

在陳賦 并序

予讀孔子世家。蓋三至陳。皆困焉。及他傳說。亦往往言孔子在陳事。竊以謂賢者辟地。翔而後集。危邦不入。亂邦不居。以彼其明聖。則宜有以先知。無顛沛之憂矣。然而動離厄難。至于門人加疎。喟然思歸。遂終不寤。何哉。予甚惑焉。作賦以辯之。陳州作

循太昊之故墟兮。撫上古之遺風。世超絕而莫紀兮。竊獨悲夫孔公。在天縱之將聖兮。亦何所其不容。周四海而歷聘兮。汜棲遲于此邦。似先迷而後得兮。反過涉而爲凶。方從者之告病兮。門人慍而加疎。雖藜

羹有不具兮。死與生而雜居。麟傷足于鉏商兮。龜見糜于豫且。處陷阱而不知避兮。謂聖智其焉如。其身之不皇恤兮。庸後世之能圖。游中國莫我信兮。在蠻貊而行乎吾誠。疑此二三兮。亦君子之病諸。惟微服以過宋兮。又接淅而去齊。詭蒲盟而信邁兮。臨晉淵而思歸。狂狡無所售其謀兮。姦邪不得以遂。非亦何先覺之昭昭兮。至于今而忽迷。信天命之固然兮。亦人事之未盡。非驕氣與衿色兮。謬伯陽之所徇。儻修身以飾智兮。惑任公之幽訓。不捐盡而絕學兮。傷萊子之深吝。時滑稽而倨傲兮。自晏嬰而患進。夫大白必汙兮。大直必曲。賈章甫而適越兮。諒求榮而愈辱。天下多大國兮。何必安此陋俗。謂舜後爲庶幾兮。曰不知韶之已亡。明楛矢之遠集兮。旣驚愚而駭狂。不德我以刺譏兮。反仇予以甲兵。鷓鴣之智不給處兮。千古之愚而知來。孰有誠明之全德兮。顧臨幾而惑哉。信天命之固然兮。迨無妄而爲災。所貴松柏之特操兮。非以其在春夏而青青。必將歷歲寒而後彫兮。斯可以見天地之炳靈。且夫水激則旱。矢激則遠。孰知夫桑落之下兮。乃春秋以終顯。感吾黨而懷歸兮。聊舒憂以淫衍。躬木鐸而周流兮。豈戚嗟而思反。

奇羊賦并序

今年有貨藥于市者。牽一羊。有三口。觀者異之。或謂物有同類而殊名。六合內。毛羽麟介。不可勝紀也。其罕見者。人則怪之。此儻自一物。而未必羊也。爲作賦訂其意。庚子作

伊造化之播物兮。猶巧冶之曲變。雖轆轤而紛錯兮。亦同形而相嬗。何茲羊之瑰異兮。邈獨違于天理。孰祖胄之自出兮。不屬毛而離裏。察飲齧其如衆兮。駭形貌之特詭。崑兮運頤。粲兮嚼齒。剛外柔中。名祥實

毀安芻豢之近禍兮。衆樞機以便己。彼率然之救首兮。雖謝害而弗如。虻爭利而自傷兮。愧厥貪之有餘。揆四氣之平分兮。察五緯之盈虛。萬物莫能兩大兮。是曷德而至于斯。體離明之炎上兮。曾何視之不遠。象兌說之引吉兮。又奚很之甚反。抑神靈所不化兮。宜茲世之或鮮。儻殊方之異稟兮。固非吾人之能辨。或曰。士之怪羶羊兮。殆季孫之所嘗得。無將聖之玄覽兮。夫孰鑿其肝鬲。或曰。羊之神獬豸兮。自堯時而來。覲蔑庭堅之明允兮。尙焉諱夫枉直。試刑之而不嗥兮。諒以判夫羣惑。誠存之而勿論兮。慕哲人之遺則。

下令如流水賦以令順民心如流水矣爲韻

因人而治。惟德之優。下令而順。如水之流。蓋有悅從之美。而無底滯之憂。命苟出中。勢殆無于反汗。理符趨下。速奚止于置郵。稽昔伯臣。誕修人紀。謂君者所以出令。必先于得衆。令者所以馭俗。故譬之流水。得其道。則萬方咸若。獨川之決焉。失其義。則千里違之。如澤之壅爾。必也訐謨定命。平易近民。使上有淵源之喻。下無墊隘之因。先甲後庚。示國彝之必信。開物成務。俾王澤之咸均。且夫政不出于上。則民無所軌。令不行于下。則君失其勢。欲其出于上。莫若壹而止。欲其行于下。莫若順而已。是以喻彼旁流。達茲至理。下而忘返。源于君。豈源于山乎。逝者如斯。漸于人。不漸于海矣。取類爲密。貽謀孔深。蓋憲度者國之紀。而主上者民之心。孚號未明。戒泉流之胥敗。遠猶斯布。畏川壅之爲臨。邇罔弗從。遠無不順。四邦之內。泳其沫。窮海之表。蒙其潤。木鐸修禁。譬決蒙而就卑。象魏觀書。法行險而有信。如是則君之發令也。可不慎夫。

令之于國也。奈何忽諸。焉有水逆行而物無傷者。令廢格而國不亂歟。與其亂而救于後。孰若詳而慎其初。得百姓之歡。曾建瓴而何遠。研諸侯之慮。非赴壑而焉如。已矣乎。功以衆成。官以理盛。未有違衆而功遂。越理而官正。故君子于流水必觀焉。以其有似于令。

登臺觀雲賦 以書其祥以爲歲備爲韻

天事見象。人君順時。登觀臺而謹爾。候雲物以書其。陟茲累土之居。非求自佚。占彼垂天之狀。庶或前知。古之爲邦。敏于節事。蓋陰陽之數。不可以獨越。則水旱之變。宜先其未至。升高而望。是臺也。固經始于子來。推象而言。彼雲也。可逆爲于歲備。貴若侯氏。尊如天王。並有事于覽觀。示察微于禳祥。誠由慎德者。固務民者。昌峻或九層。豈憚煩于陟降。變惟五色。殆無惑于豐荒。若乃日月分至。春秋啓閉。氣動乎下。而雲爲之出。祥見乎上。而物莫能蔽。于是儼君儀以居高。詔保章而古歲。義殊臨國。固無魯史之譏。志取望氛。允協楚臣之說。豈不以先天者。天所不違。愛民者。民亦說隨。故登臺也。可以知勤民之至。觀雲者。可以見奉天之爲。因爽塏以四通。高爲貴者。辨郁紛之萬狀。書用識之。毋以臺爲奢。其意甚美。毋以雲爲遠。其應甚邇。胡不揆厥攸建。察其所以。備不虞者。善政有焉。無道慮者。近憂至矣。故漢明復古。見頌于孟堅。魯僖秉常。取貴于左氏。稽合典禮。昭明策書。非臨下之爲樂。蓋恤人而有初。寓目以觀。陋章華之奉已。非煙是紀。類河廣之跋予。彼執同律者。聽軍事之吉凶。序星辰者。詔天文之精祲。雖均先見之美。本非南面之任。固未若躬靈臺而候五雲。順四時以施禁。

無可無不可賦以聖人之道應物無方爲韻

有能有不能之謂賢。無可無不可之謂聖。賢也者擇善而固守。聖也者體禮而終靜。萬物並作。無得稱其名。億變齊同。莫不盡其性。且夫自然爲質。不測爲神。尸居而龍變。天運而日新。能體全德。是謂至人。故雖有取捨。其迹難窺。雖有去就。其情不私。寂爾任物。汎乎適時。且若是而已矣。曾何足以間之。是以語著仲尼之賢。毋意毋必。詩頌文王之美。不識不知。豈非可否者俗之明。變化者聖之道。游于俗內者。須有適而有莫。躋于聖域者。亦奚醜而奚好。序才而處彼。誠一曲之人。與化而遷此。蓋上天之造。其大也無爲。其行也善應。體達節以素遊。觀萬物以交勝。進退有義。可以其理求。用舍無常。難以其類證。是故雖柳惠之并容。伯夷之不屈。各自守于一節。詎兼通于庶物。夫惟抱惟容之識。應變而不窮。蹈無名之方。旁行而弗拂。且世之所謂可者。未必可。世之所謂愚者。未必愚。故信其可而作將。同乎芻狗。指其愚而去。可異乎守株。必也行無轍迹。獨與道俱。苟出處之非地。豈汗隆之在吾。智絕自私自信。能周于萬類。大斯容物。亦允奉于三無。得是道者。靜而聖。動而王。蓋舉一而廢百者。陋賤彼而貴我者。亡。苟非聖人之性也。孰能若是其無方者哉。

我戰則克賦以仁義行師何有不克爲韻

以仁合衆。以義濟師。內輯和于中國。外震懼于四夷。當之者失其據。動之者悅也隨。故曰我戰則克。其義在斯。且夫以道德爲藩。以禮讓爲國。以忠信爲用。以仁義爲力。故守必有威。動則能克。蓋威也無暴彊之

名克也。非權詐而得。在乎審所治。修厥誠。使民愛之若父母。而敵畏之如神明。若是則綏之而服。令之而行。決機兩陣之間。孰能違我。制勝千里之外。敢有爭衡。且兵者凶器。戰者危事。何衆人言之甚難。而君子用之反易。蓋言之難。以其有後患。行之易。以其無死地。無死地。故雖柔而必彊。有後患。故雖勝而不義。籌于廟堂之上。寧越余心。陣于原野之中。罔違朕志。且彼憑其衆。則不加我民。恃其勇。則孰若吾仁。故金鼓之聲。未之能以會。旌旗之用。未之能以陳。然而必敗之形。已兆于勅敵。獨克之勢。方在于斯人。是以堯伐三苗。禹誓羣后。高宗討叛于鬼方。周武致戎于商紂。念刺伐而豈無。謂奔北而則不。乃知戰在勝不在多。術在德不在他。是以棄天時與地利。貴王道與人和。四國順之。顧獨夫其安往。上帝臨汝。非大凱而如何。若是失吾道者。棄其衆。敗其績。亦孔之醜。用吾義者。保其國。伏其敵。于戰何有。蓋用不用之間。爲克不克之道。是以喟然嘆曰。莫我知也。夫何功業之可偶。

孔子佩象環賦

謙以比德。取其無窮。聖人雖明而若蒙。雖盈而若沖。卻佩玉以居讓。用象環而飾躬。生而知之。謙不期于比德。文爲貴者。義可見于無窮。原夫服物者。常士之儀。佩用者。衆人之飾。左結右設。所以助成于儼恪。退揚進揖。所以豫防于淫慝。然而非上聖之法。豈中庸之德。故我以象爲佩。因環作則。瑳而備用。識純粹之積中。循之無端。妙變化之不測。豈無珠璣。惡夫尙奇。豈無金碧。爲其異宜。獨資巴浦之美。外協聖師之爲。昔以賄而焚軀。吾無取爾。今中規而成象。禮亦宜之。豈徒觀夫粲如英瓊。結以綦綬。參逢掖而並用。約華

組而獨受。徑雖五寸。以文理而獲稱。佩可終身。由旋相而見取。然則服稱其貌之謂中禮。德過其飾之謂好謙。陋白珩之致侈。抱素修以無嫌。容止可觀。治獸齒而爲用。肉好若一。偉儒服之相兼。雖無鏘鳴之音。吾見其美。雖無希世之價。吾貴其理。蓋退讓者君子服焉。易簡而王事得矣。豈非抗達節之休風。導將聖之深旨。飾櫛劍而崇武。未可儼倫。佩緩玦以斷疑。胡能爲比。象者何如。由象表而名諸。環者孰謂。自環中而錄夫。游心于象表。則合乎天縱。應物于環中。則契乎道樞。嘉名體之脗合。諒奇袞之獨無。盛服以行。初訝執規之子。鞠躬而至。適同反絕之夫。嗟乎微言旣亡。去聖彌久。蓋思其人。則想見其爲狀。玩其服。則兼明其所守。有旨哉。賦仲尼之象環。不然則不。

季春出火賦

以季春出火象天爲之爲韻

國有常憲。月當季春。俾出火以便俗。示奉天而牖民。治歷明時。占心宿之昏見。范金合土。順炎精之日新。眇觀古初。啓迪法象。星之神也。猶隱見之有序。火之利也。宜出納之無爽。蓋天人相與。或精禋之交蕩。得不慎爾日用。戒茲炎上。著于月令。候建辰而勿逾。倣乃官儀。敕司燿而攸掌。用能與世垂法。授人以時。仰列舍以欽若。率百工而悅隨。察夫日月之交。歲旣單矣。謹此陶冶之用。民咸從之。肇自五帝。至于三季。雖建國之不同。其修火也無異。蓋以稽合乾度。丕承天意。且謂阜財之道。貴節用而遵常。燠物之功。罔奸時而邀利。是以及大辰之初見。因成象之自然。奮木鐸以修禁。正夏數之得天。大則焚于草萊。符戴氏之舊記。小亦鑽夫榆柳。協鄴子之遺篇。噫。爲政者毋慢于從辰。制器者勿亟于行火。慢則匱民而乏用。亟則

爭明而取禍。故相士正其序。商人因而勃興。子產失其常。士弱議其不可。非夫識蹈先覺。智周百爲。歷春秋而協紀。奮淳耀以從宜。又安得百姓與能。咸富陶鈞之化。六府交正。蔑聞災燁之期。彼候西陸以啟冰。占定中而揆日。或義專于薦享。或功止于宮室。豈若詔司存而火紀時焉。器用于乎出。

王配于京賦以王配于京世德作求爲韻

大哉天祚明德。世有哲王。纘乃祖之休烈。配于京而溥將。三后成功。達孝思而維則。四夷面內。知聖德之無疆。且昔者羣雄紛爭。五季昏忒。惟我藝祖。自天生德。內揖讓以興治。外征伐以宣力。武節颯逝。怙惡者喪其巢。盛德日新。爲善者得其職。于是餘孽未靖。神宗作求。躬一戎以歸獸。曠百王而繼周。正朔所加。蓋罔有于不服。封禪之禮。猶未遑乎聿修。克成大勳。用集先帝。丕顯元德。發明王制。上則升中于天。下則作程于世。故創業如彼之艱難。守成若此之昭哲。豈非文武並用。而治亂隨時。明聖不同。而述作相繼者哉。宜乎世濟厥美。王配于京。實對越而在上。茲遙駿而有聲。亦何必道上古之書。希成康之治。語鴻荒之事。慕堯舜之名。且夫湛恩濛涌而易豐。憲度著明而不昧。故王在京而善繼。帝在天而克配。豈獨下武之什。歌周發于丕承。同墀之靈。美姬公于哀對。且上方法太祖之武。以平叛。繼二宗之文。以永圖。越無名之蕩。返茲世之于于。因斯談之。則何貴乎周鑄。攷于往者。將孰先于浚都。客有起而頌曰。於皇上天。輔景鑠兮。有赫天子。恢聖作兮。祇遙祖考。垂矩矱兮。萬有千歲。永欽若兮。

貴知我者希賦以知我者希其貴多矣爲韻

衆所共知者其器小。人鮮能察者其理微。故聖人不從事于俗。老聃貴知我者希。和其光。同其塵。毋卹驚民之怨。出乎類。拔乎萃。豈嫌舉世之非。然後覩其操之皜皜。見其德之巍巍。已古之聖賢以賤爲在人。以貴爲在己。蓋審乎內外之分。辨乎榮辱之理。是以不同譽于流俗。期度越于諸子。豈以其重若彼。其輕若此。未遘真賞。雖多亦奚以爲。忽逢知音。有以少爲貴矣。且夫在邦必聞者。斯佞人之行也。遯世無悶者。惟有德者能之。如是則苟患乎不立。無憂乎弗知。遇非其人。則同舟有胡越之異。得其所謂。雖萬世猶旦暮之期。物固有密不若疎。衆不若寡。與其顯于常士。孰若稱于識者。盡獲下流之譽。我必其辱焉。一遇忘言之知。吾見其珍也。譬夫荆山之璞。以非寶見欺。魯郊之獸。以不祥獲疑。及夫被旌于卞氏。見賞于仲尼。然後一角之麟。後王明其瑞矣。連城之璧。歷代仰夫溫其。况乎道之精者。可以神交。不可以功計。意之微者。可以心照。不可以言謂。是以知之彌衆者。其術彌下。識之愈希者。其身愈貴。亦猶巴人之唱。苟下里皆可。以繼聲。虞韶之音。非至人不能以忘味。豈德與世邈者。應必少。技與衆同者。和必多。多而易求。斯賤也已。少則難得。非貴如何。嗟乎世之士。務于人之知。而不計其不可。急于己之貴。而不悟其在我。將市義于比周。而銜名于衆夥。斯人也。鄉原之徒歟。道奚由果。

三命不踰父兄賦以內朝治親尊卑以齒爲韻

元聖制禮。內朝治親。屈三命之殊寵。後先生于下陳。受位造庭。義不踰于父行。循牆盡禮。恭無亂于天倫。古訓與稽。舊章爲美。正外者必慎其內。化遠者亦資于邇。由是敕公侯以愷睦。自燕朝而基始。班異官爵。

位雖極于命卿。誰無父兄。理自宜于序齒。疎不凌近。卑不瀆尊。修之廷內。而君臣之敘立。達于天下。而孝友之教存。車馬之賜雖優。豈無定著。長幼之倫勿廢。以詔後昆。然則百官疎也。故朝于外。九族親也。故治于內。于外故右賢而貴爵。于內故尚親而立愛。貴爵然後知王官之不可亂。立愛然後見人道之不可廢。禮或三賜。親惟一概。若弟若子。敢介寵而自矜。有尊有先。宜適卑而少退。肅肅合族。雍雍在朝。飾情文而皆盡。戒容貌之有驕。名位不同。彼鄉飲也。或不齒之爲尚。少長有禮。此宗室也。宜入事而勿佻。且夫事父嚴則忠。可資于君。事兄謹則順。可達于治。故尊尊貴貴者禮之敘。親親長長者仁之至。奈何治其外。不修其內。有其一。遂慢其二。爵雖元士。非父黨之可踰。位絕諸昆。亦鴈行之相次。職在庶子。教成有司。示訓民于親愛。昭辨等于尊卑。想攷父之益恭。由茲可見。雖唐堯之愷敘。捨此奚爲。是謂人之大倫。國之元紀。以睦兄弟。以親父子。貴無驕汰之失。賤有和順之理。故曰正家而天下平。非此則何以哉。

士摯用雉賦以相見之禮庸雉爲摯爲韻

士之相見。摯以爲儀。必用雉以將命。取擇交而有時。見于所尊。常難進而謹爾。執以自致。示守介而如之。伊昔聖王。慎別名類。知禮之貴者毋褻。欲人之交也有義。由是遠取諸物。必依于摯。四民殊業。士獨有于常心。六禽異名。雉可昭于尚志。將使謹爾攸執。慎其所從。深明出處之趣。無煩左右之容。志恥懷居。擇文禽而章物。義羞屈節。視疏趾以思庸。且夫無因而至者。殆或可疑。非禮而動者。何足爲見。必將稱摯以仗信。飭躬而進面。雉實有別。士非自銜。從大夫之後。秉殊羽舞之爲。游諸公之間。拱若山雌之薦。豈非用舍

殊檢尊卑異宜。仰羔雁而非僭。顧雞鶩而若遺。潔己不汙。取象爰資于禽。作多文是富。著誠足驗于離。爲然則可殺不可辱者。人之賢易得而難畜者。鳥之美將因物以昭德。故習容而奉雉。是以周公創典。咸等子諸臣。虞舜省方。特稱夫一死。彼佩綬缺者。但旌于屢斷。秉文行者。或示于有章。豈若煥輦翟而拱揖。盛辭讓之交相。事賢友仁。我則達剛毅之節。書名委質。我則示耿介之方。惜乎古風旣渝。澆俗寢啓。進則無仗節之教。退則多競進之禮。吾乃知摯雉之儀。爲國家之大體。

公是集卷二

賦

御試戎祀國之大事賦

戎在禦侮。祀專饗神。皆有邦之大事。豈庶政以同倫。宜社而行。外伸威于殊俗。受釐以報。內均福于生民。蓋所謂朝廷之先務。教化之本因者也。稽合前經。發揮至理。政有常法。事或殊軌。以保民者莫若戎。以馭神者莫如祀。善師不戰。諒治體之孰加。精意克禋。眷彝倫之莫擬。是故將命武事也。必有歸賑。將格神貺也。必先執膳。蓋大其所當大。尊其所可尊。干戈省躬。信丕經之斯在。玉帛薦德。微末節以同論。然則治道有後先。國務有大小。威四海者兵爲急。敍五經者祭爲最。民神之事不一。皆以底和平。腥熟之俎不同。皆以福中外。故聖王勞意于用衆。致誠于逆禧。動則謹爾。下皆仰之。知夫事之大。不在于彼。禮之重。莫先于斯。亦猶仲尼陳三慎之端。惟齋及戰。箕子序八政之目。兼祀與師。用能祭典不奸。天威無隕。或謹以進胙。或重之受脹。邇遐一體。僂武節而服從。上下交歡。欣德馨之明允。故曰聖人之祭。不能獨豐。天下雖治。亦將禦戎。大而慎之則蒙福。細而慢之則亡功。謹禁暴戢兵之機。惟政之本。明昭孝息民之義。何治之隆。盛哉不冒羣生。欽崇大節。非戎無以威遠。非祀無以著潔。故蠻夷服而鬼神饗焉。有以緝熙于鴻烈。

化成殿瑞芝賦以天瑞明德芝秀於殿爲韻

惟皇四世。德茂洽乎無極。仁化昭乎上天。伊中展之祕地。擢靈芝乎盛年。徒觀其萃寶玉。浮紫煙。浸瑞露。涵靈泉。華煜燿。居蝟蝟。蓋所謂非致而致。自然而然者也。始其禦人獻祥。宮童效異。按以神謀。稽以天意。參以人事。驗以孝治。伊化成者。所以昭德至乎無窮。亦芝秀者。所以見美包乎衆瑞。是謂道與之貌。人與之名。騰茂實。飛英聲。昭絕代。烜後生。金爲之華。兮玉爲之英。報景貺。融休明。揚盛德。誠至誠。帝錫之命兮。神儲之精。悅爾而就。倏焉而榮。豈蕩蕩默默。不知其力。天台以三秀爲奇。銅池以九莖夸德。語地則幽鄙。較美則昏昃。豈若功就三后。上陟于帝廷。氣涵九重。中位于樞極。于是天子怡爾而念。茫然而思。且曰。見瑞而怠者。雖于災變。無以異矣。聞美而勸者。吾與大夫。其勤圖之。乃命吉士。賓遠夷。捐不急之務。隆日新之基。夫然者。將以升介丘之禪。修后土之祠。豈獨堯仁如天。紀生階之莫莢。漢道雜霸。詠齋房之紫芝而已哉。于是擊壤之臣。稱而言曰。靈芝伊何。有德斯秀。昔聞其傳。今遂于覲。濯淳治于風俗。熙元化乎幽陋。是宜薦郊廟。垂策書。被金石。昭樂胥。使同穎之禾。不能遠過。連理之木。無以加於。亂曰。宋治有道。自天眷兮。祥氣回復。于斯殿兮。萬有千歲。尙無變兮。

后非賢不父賦以君得賢者而後甯父爲韻

歷選上古。究觀盛君。將圖治以無非。忽得賢而未聞。兼聽萬機。思降衷而俾父。敷求多士。貴圖任而成勳。發揮舊經。稽合至德。民不能自治。待君而率教。君不能獨化。待賢而宣力。是以博選羣智。仰成衆職。同體

之密。若股肱之自然。注意之勞。期寤寐而必得。此所以流化率土。熙功上天。高拱而物服。不言而教宣。豈非爲之用者衆。助之治者專。聚精會神。增固本朝之重。創業垂統。盛推當世之賢。且夫外輯四夷。內懷中夏。一人之明也。常戒乎遺遠。萬乘之勢也。率難乎逮下。釐爾天工。屬之能者。使甚盛之德。覃及乎方隅。無窮之休。丕承乎宗社。以此見非明君。毋以得士。非賢士。毋以康時。譬猶濟川者。假力乎舟楫。禦侮者。因備乎藩籬。其具修則其事立。其用闕則其功墮。然而臨政而失人。無足觀已。捨賢而望治。不亦遠而。是以聖王總覽英雄。旌別能否。仄席思進。詢謀虛受。重祿賞以勸其前。遠讒邪以固其後。名澤純粹。士得以願忠。功烈昭明。下欣于戴后。且虞舜之聖也。由穆穆而興。文王之仁也。以濟濟而甯。蓋好善者得民之大略。籲俊者事帝之丕經。一德永孚。實茂宣于聖職。衆材並用。彌上燁于君靈。盛矣哉。民非后罔安。后非賢孰乂。毋舉枉以亂直。毋損正以盈穢。庶幾乎太平之功。垂萬世而不廢。

觀遠臣以其所主賦以視其所主人豈度哉爲韻

善不徒立。德常有鄰。將盡遠臣之趣。必原內主之因。來賓于王。信無迷于懷寶。深察所館。可不誤于知人。原夫士無懷居。居無常所。欲精覈于趣操。宜究觀于出處。蓋夫人之過。猶各于其黨。士之窮。必視其所與。翔而後集。旣觀國以來斯。爲之先容。庶推類而及汝。誠由攷行于鄉里者。易察。擇臣于羈旅者。難知。故論其主也。則情可見。攷其交也。則行不疑。仲尼悅司城之賢。德斯著矣。商鞅因景監之嬖。禍亦宜其。固未有仁者而依于不仁。義者而寓于不義。明君則以此而鑒其下。智士則以此而引其類。爾慎已歸。衆將彼視。

譬之鳥矣。猶有擇木之稱。豈伊人焉。而謬託身之智。然則居上而治者。知臣則爲優。自外而至者。無主則不留。思得臣必自遠者始。思觀遠必以近而求。覽乎德輝。雖疏賤而何有。賓于私館。識邪正之焉。廋故曰。善以彙征。物以類聚。士謹身兮。誠難乎所寓。君相士兮。亦先乎得主。譬若聲之生響。清濁之不欺。影之附人。曲直之可覩。此其分也。豈或亂哉。是以四方之賢。可得而官使。一介之士。彌務于朋來。困雖旅人。苟自他而有耀。善得常主。將藉外而論才。已矣乎親仁實然。附勢則豈諒喪道兮。固久曷知賢而無幾。孰能舉而行之。亦庶幾乎卓偉者哉。

圭璋特達賦 以圭璋特達昭德之至爲韻

禮崇朝聘。器用圭璋。推至珍而在御。昭特達以爲常。抗瑞節而來儀。含章有耀。先庭實而自至。比德彌光。察舊典之遺文。窺盛王之懿則。圭以底信。璋惟輔德。朝而執則。上公之饗。王后聘而用。則諸侯之交。邦國雖有皮馬之幣。莫得而同升。雖有黼黻之珍。不能以致飾。何哉。內不足者。藉外以見美。質有餘者。略文以効奇。我用至寶。爾捐末儀。白玉人而作矣。及賓禮而陳之。慎其獨焉。有君子之象。少爲貴者。協禮器之辭。徒觀夫辨物乎行人。正名乎典瑞。虹氣溫潤。珍光純粹。陳其數。雖待人而彰。備其用。不因物而致。璩八寸以旁達。豈貨之多。冠四器而獨升。維德之至。且夫結好莫如聘。尊王莫如朝。斯禮也由玉而後達。斯玉也因禮而孔昭。天質顯印。以難得而稱貴。縑文絢耀。雖專達而非驕。然則王者之制。有尊卑。天下之理。有本末。苟尊矣。卑安得而並及。是本也。末不足以上達。因方挺質。無一物之可借。判白凝輝。非衆珍之能奪。噫。

幣美則禮幾乎沒。德盛則物莫能齊。此所以專尚乎寶鎮。特旌夫半圭。彼束錦加琮。何相須之密。白鹿薦璧。何競進之迷。貴賤于此乎分。媿惡于此乎識。譬夫體道者。無待而素遊。性善者。直前而自得。則夫學禮之人。何怪夫圭璋之特也。

享禮有容色賦以因聘行享容色可觀爲韻

聘既盡禮。享難極恭。儼多儀而將事。發和氣而盈容。庭實序陳。嘉奉辭之遜悅。賓榮改觀。知飾貌之肅雍。古之諸侯。交于鄰國。其聘也。珪璋以申信。其享也。璧琮以往德。信莫如固。則示之誠慤。德莫如厚。則諭之文飾。然而誠慤難以見。故嚴其狀貌。文飾易以明。故逞其顏色。儀不及物。諒君好之益隆。和以宣心。何天機之自得。想夫肅肅宗廟。顛顛國賓。能曲直而赴節。毋怠荒而亂倫。鞠躬之慎也。豈不誠善。致享之歡也。吾無所因。奉幣入門。有舒揚以率己。升堂受命。靡促數以臨人。然則隆殺者禮之不同。文質者儀之可象。致辨異于賓主。戒猥并于聘享。曩子襲而今子謁。見美可推。正爾容而悅爾顏。參和足仰。且夫臣之致使也。過恭而奚害。客之結好也。非嚴而何觀。蓋夫弛張者所以爲文武之道。茂悅者所以昭邦國之歡。寶四器以同升。禮盛則文縟。率衆介而將事。心廣而體胖。是以上不爲階階之矜。下不爲愉愉之盛。先私覲以致獻。聳溫顏而承命。上觀儀禮。周公舉此而著經。近察魯論。仲尼法之以行聘。豈非厚恩惠者。享不可以闕。遠暴慢者。色不可以輕。必在修采章而時當。和體貌而躬行。且異祭祀于神。專尚恭之說。會同于國。擅主詡之名。此蓋盛升降以示人。踐形色而在我。濟君靈于輯睦。戒臣節于輕惰。夫如是。享禮之有容。奚適。

而非可。

右射騶虞賦以右射騶虞天子之禮爲韻

射于右學。歌以騶虞。示君儀之至重。識文教之誕敷。王在西郊。爰舉尙功之典。聲依九節。以成觀德之謨。伊昔武王。旣平商紂。未革新禮。聿遵祖后。其習射也。欲偃武而興文。其居學也。姑賤左而貴右。詩樂之節。雖遠及于國風。臣主之儀。毋下瀆于狸首。想夫王歸自鎬。天方授周。外飭萬乘。中嚴七騶。眷西學而戾止。法澤宮而載遊。乃習斯射。曰昭厥猷。弧矢之威。所以服四海。揖讓之禮。所以懷諸侯。苟微仁聲。安取正已。不有嘉樂。孰明盡美。故必考律度于太師。辨等威于天子。勇非貫革。取服猛以示人。巧在循聲。明備官于同軌。且夫射也。講德而繹志。序賓而考賢。內可以教士。外可以事天。習非其地。則禮失而亂。聽非其節。則樂流而偏。是故因商人養國老之方。抗侯有所。奏召南應鵠巢之什。舍拔無愆。用能上有常尊。下亡僭禮。遵國郊而西顧。闢儒宮而洞啓。彼或教胄。昭尙右于質家。我以和容。歌得賢于治體。豈非事爲之制。物有其儀。國之興也。建學則不暇。王之射也。于左則已卑。慎所習者。誰能間之。號稱瞽宗。豈特育材之用。禮行君鵠。必先彼苗之詩。稽仲尼之遺言。偉宗周之善化。急于誘民也。故因先代之太學。篤于尊王也。故正列侯之左射。聖人之治世也。蓋皇皇然。豈苟悅于自暇哉。

鄉飲升歌小雅賦

古者爲國。厚于養賢。故鄉飲登歌之節。取周詩小雅之篇。左聖序賓。推人聲而在上。肄三官始。揜風什以

居先考。縛儀于古經。得嘉言于達者。禮有盛而進取。儀有輕而迨下。燕雖示惠。賈合樂于二南。飲蓋屬民。反升歌于宵雅。何則。養老以教愛。上賢而習鄉。孝悌之本。邦家之光。微重禮不能以變俗。微備樂不能以賓王。由是獻酒于阼。席工于堂。庶令在位之人。徧聞其奏。雖用諸侯之樂。未失其常。且夫教希闊則政昏。禮廢壞則民擾。十月飲酒也。吾猶以爲簡。三年興賢也。吾猶以爲少。宜乎發德于民上。永言于物表。曲高和寡。美周德之尙衰。氣盛化神。知王政之有小。用能不變黎俗。發揚至和。飲雖微也。教護以爲主。雅雖尊也。厚賢而匪他。亦猶士冠本微。三加爵弁之服。鄉射至簡。一用騶虞之歌。蓋志恭者貌必甚嚴。禮盛者文豈宜略。方將序長幼之等。成賓主之樂。坐以四面。正齒位而無逾。倡者二人。始鹿鳴而有作。然則飲非鄉也。不足以敦化。歌非雅也。不足以獨升。仰德容之交舉。俾兆衆之欽承。然後和樂而不流。符戴氏之著記。恭儉而好禮。協師乙之所稱。是謂導民。豈曰崇飲。領其音者。信國風之爲陋。處其位者。究陽禮之有品。故曰觀鄉知王道之易易焉。由此而可審矣。

不下堂見諸侯賦以觀禮尊君不下於堂爲韻

諸侯北面。天子當陽。義蓋專于尊主。儀蔑聞于下堂。順命于王。爾有盡恭之節。受享于廟。此無思降之常。原夫制有萬國。必依于順。時序四朝。必示之信。所以昭上下之交正。示威懷之至慎。焉有親屈至尊。下從肆覲。矧秋見之最質。貴君儀之特峻。儲精蠖蕪。俟輯瑞之來升。高拱穆清。觀入門之序進。大節斯著。禮容不繁。下屈體而彌謹。上抗威而益尊。萬玉前趨。伊述職之無爽。九筵洞啓。奚降階之可言。蓋覲也。所以比

天下之功堂也。所以示王者之禮。必毋損上以益下。是謂正位而居體。臨軒自若。仰德度之顛顛。當辰不遷。俯駿奔之濟濟。用能制爾多辟。宗于大君。思體貌之無褻。自廟堂而可分。擯詔交相。焉取就卑之誚。威顏咫尺。曾微去所之勤。不如是則朝廷之勢易凌。臣主之節不厚。易凌則生犯上之漸。不厚則多苟簡之咎。豈若謹入覲以爲常。謂倨見而則不。車馬效貢。序臣職于蕃宣。被袞居高。儼天姿于戶牖。得非正遠在乎近。慎終戒乎初。修之朝會而易。干之制定。謹于廊廟。而陵僭之患除。專九尺之崇高。儀惟謹爾。定一王之制度。世得據於丕宣。國經揮綽。皇化惟覲。也有貴于師事。斯堂也非美乎能下。獨不見夷王之亂典。常凌遲而至于五霸者哉。

路寢聽政賦 以君居路寢而聽朝政爲韻

朝位非一。邦儀必分。稽辨方于路寢。資聽政于人君。深居法宮。聳顛昂之上德。總攬幾務。集不遠之洪勳。古之大猷。禮存異數。朝廷有內外之辨。必爲之定位。宮室有游燕之別。宜慎其常度。於赫太寢。維親庶務。政教于此乎成。號令于此乎布。收視反聽。雖深處于虎門。安上治民。將率遵于王路。業業明后。巍巍廣居。誠制治而欽若。豈便安而自如。高拱內朝。思無求于出位。究觀治體制。必使于宗子。大則四方之風。小則一國之政。舉而失。則民受其弊。行而當。則世蒙其慶。安得不儲思乎凝嚴。養神乎清淨。間于戶牖。曾靡宴惰之容。垂其衣裳。是專法度之正。且夫尊而不可不慎者。位也。是君之儀。貴而不可不勤者。政也。是國之基。故必嚴其所啓處。謹其所施爲。然而外朝則已遠。小寢則已卑。酌是中制。垂爲典彝。恭己五門之中。人

皆仰止。厲精萬幾之會。政靡殆而。是何垂憲有邦。裁儀廣廷。託民上以臨御。躬日昃而觀聽。是使獨化陶鈞之表。物莫能違。游精巖廊之間。治將自定。然則路大名也。示君德之孔昭。政本務也。貴民事之不佻。必推重于正處。表克勤于視朝。獨不見齋居決事者。漢宣之賢。取褒于史策。應門失守者。周康之過。興刺于歌謠。是以爲君外統百官。內嚴正寢。辨居處以勿貳。專聽斷而有稟。宜乎天子諸侯。遵以爲常。見治道之必審。

郊用夏正賦以三王之郊一用夏正爲韻

王雖有三郊。則惟一。因正歲之更始。卜上辛而協吉。聖人饗帝。禮莫重于感生。夏數得天。氣遂迎于長日。原夫損益殊世。質文異宜。謂治人之政。則可得而革。奉天之禮。則無得而移。必正其節。必嚴其儀。五精不同。雖各祀其祖出。三正非一。而咸貴于夏時。若乃歷告王春。律回人統。天地之氣交泰。陰陽之和錯綜。驗之于卦。三著之效已明。參之于天。大報之儀可用。于是天子對越在上。親見于郊。席以橐秸。器用陶匏。因天事天。則發生之候爲稱。禘祖配祖。而肸蠁之靈可交。故曰祭莫重于時。時莫先于孟。將修嚴父之饗。必用前王之正。蓋所以欽若昊天。迪知帝命。用祈農事。順啓蟄而布和。將擁神休。迨發春而施令。然則周以建子。其陽尙藏。商以建丑。乃地之方。皆不足以逆繁禧于吉土。格上靈于彼蒼。是以稽合祖后。發揮盛王。統和天人。是資出震之始。降興上下。聿爲嗣歲之常。古之制也。此其盛者。德非王不足以興大禘。禘失時。亦何以格純嘏。故魯侯博卜。春秋譏其用郊。顏淵問邦。仲尼告以行夏。得非祭祀之典。貴乎咸秩。沿革之

制美乎登三順天時之資始見王道之相參夫然則郊之用夏正也蔽百代而無慙

公是集卷三

騷

逐伯強文并序

寶元二年予羈旅淮南醫來言曰今茲歲多疾疫予因作文以逐伯強伯強厲也能爲疫者故逐之

皇皇上天兮浩浩后土厥生孔繁兮其施甚溥陶陶仲夏兮草木蕃廡鳥獸孳息兮我民樂胥我民孔靈兮上帝是仁天子孔聖兮百工日新上無糝政兮下無悖人鄰里其集兮樂哉欣欣伯強何爲兮孰畀以政反世五福兮持極以令我民不怡兮旣爽其盛白黑眩瞽兮孰警其正謂壽反天兮謂康反病仁義無益兮苟且爲幸嗟爾子強兮其獨何心絕世和氣兮俾民不任上天孔神兮大德曰生天不可長罔兮民不可久侵天誅誠加兮靡所避雷公驅兮風伯逝嗟爾子強兮何所詣南有蠻兮爲寇爲逋西羌戎兮恃艱自虞天子孔仁兮靡焉畢屠子強往兮代天伐誅嗟中國兮不可久留子不去兮顛倒思予

屈原嘏辭并序

梅聖俞在江南作文祝于屈原譏原好嘏辭民習尙之因以鬪傷溺死一歲不爲輒降疾殃失

愛民之道。其意誠善也。然競渡非屈原意。民言不競渡則歲輒惡者。訛也。故爲原作嘏辭以報祝。明聖俞禁競渡得神意。

維時仲夏。吉日維午。神歆旣祠。錫辭以嘏。曰。朕之初生。皇揆予度。嘉朕以名。終身是守。抑豈不淑。不幸逢遇。離愍被憂。天不可訴。宗國爲墟。寧敢自賊。朕惟忍生。豈不永年。惛惛荆人。是拯是憐。赴水蹈波。歲不廢旃。旣招朕魂。巫祝昔先。豈朕是私。將德是傳。淪胥及溺。初亦不悛。其後風靡。民益輕死。匪朕之心。是豈爲義。婦弔其夫。母傷其子。人訊其端。指予以詈。予亦念之。其本有自。昔朕婞直。不爲衆下。並予尙之。謂予好怒。昔朕不容。自投于江。世予尙之。謂予棄躬。旣習而鬪。旣遠益謬。被朕僞名。汙朕以咎。朕生不時。亂世是遘。民之秉彝。嘉是直道。從仁于井。朕亦不取。汝禁其俗。幸懷朕忠。好競以誣。一何不聰。我實鬼神。民焉是主。其祀其禱。予之所厚。予懼天明。焉事戲豫。予憫橫流。焉事競渡。予懷堯舜。焉事狎侮。汝惟賢人。曾不予怒。徇俗雷同。譏予以好。履常徇直。切諫盡節。人神所扶。未必皆福。去邪卽正。何以有罰。曾非予懷。可禁其僞。毋使佞臣。指予爲戒。錫爾多福。畀爾龐眉。使爾忠言。于君畢宜。

寄胡二因甫

我思友人兮。在江之臯。去我無所兮。遠哉遙遙。世豈無美士兮。莫慰我勞。願爲白鶴兮。從之逍遙。

河之水并序

自河決商胡。八年于茲矣。用事者議塞之與勿塞。至今未決。而河頗爲害。予至河北。問河之曲。

折作河之水二章以告病。

河之水兮一直而一曲。嗟湯湯兮安所屬。
河之水兮一濁而一清。嗟湯湯兮何時平。

彼山詩

郡縣多曠土。往往徑三四十里。無一人耕者。問之曰。逃矣。或十年。或七八年。或五六年。或四三年。嗚呼。百姓非樂去墳墓。違君長也。凡有不得已。朝廷詔書欲招徠之甚。赦其罪戾。捐其租粟。濟其不及。恩至深矣。猶莫有至者。異乎予所聞。作彼山之詩。道所以不來之意。

彼山之阻兮。虎豹號號。我旋而歸兮。虎來即人。
彼山之澳兮。雄虺攸伏。我息而作兮。虺將起陸。
深不可游兮。高不可飛。我後而悔兮。安庸歸。

武溪深

武溪之水兮。日夜而東流。淺不可厲兮。深不可游。
武溪之山兮。高下而相乘。卑不可越兮。危不可憑。
毋水于憾兮。毋山于仇。庚庚武溪兮。曷云其尤。

懷歸詩

淮水悠悠兮。去我無舟。匪我無舟兮。此焉優游。
淮水洋洋兮。去我無梁。匪淮無梁兮。此焉翱翔。
淮水東注兮。惟禹之績。古人不可及兮。吾獨淹留其何得。

四言古詩

魏京詩 并序

上二十年。始建北京。以章明先帝巡狩之德。以達孝思于下。于是野之處士。或相與議曰。蓋文王都豐。武王都鎬之間。不能數百里。文武之位。不過侯伯。而詩乃以聖人之德。天子之事。歌之。有如聖朝德位相侔。述作相繼。而無遙駿烝哉之詩。此乃處士之罪。非公卿之過也。乃考聲韻。辭以繼大雅。垂之無窮。其文曰。

皇作大都。大都雄雄。奄定北國。四方來同。
皇曰卿士。在昔聖考。祇遙文武。維慈幼老。
天監在上。既有明德。乃命于下。罔有不服。
匪允命之。亦章慶之。匪允服之。亦保育之。
時維獵狝。侮予之疆。靡度靡虞。跳呼以狂。

業業烝黎。載震載驚。侵魏及澶。羣心不寧。
帝奮厥武。百萬其士。匪怒以棘。于三十里。
如虎如貔。如霆如雷。靡有遠邇。天子其來。
天子來止。士增其喜。孰偷其生。以不奮興。
驅之渾渾。攘之賁賁。靡有輯張。殲厥鯨鯢。
或獻其寶。或請其命。旁振于旅。惟時既定。
屹屹魏土。山河之固。匪山河則固。惟上帝伊怒。
既闕爾弓。既囊爾矛。獫狁臣止。四方是休。
皇曰卿士。聖考之德。允于孝思。孝思惟則。
爾視京魏。以作我都。以赫厥靈。俾後勿踰。
皇曰卿士。惟帝時功。時亦惟人。惟寇萊公。
爾慎爾止。弼予于治。期爾前人。用迪爾事。
皇曰卿士。惟帝作武。垂是萬年。莫敢予侮。
秦山之封。后土之禪。予監若茲。惟天是眷。
翼翼魏土。天子國之。穆穆原廟。聖人則之。

孰爲強暴。敢不來覲。俾怛于威。于忠是訓。
顯顯天子。孝德自躬。率是休烈。覃之北戎。
河水東注。昭哉禹績。時萬斯年。天子之德。

古怨詩

鴻鴈飛矣。邕邕其族。孰是人斯。惻惻其獨。
鴻鴈飛矣。或羣或伍。孰是人斯。惻惻其處。
天兮地兮。戴且履兮。孰是人斯。莫我視兮。
日兮月兮。出且沒兮。孰是人斯。遠我忽兮。

雜詩效阮步兵

浮雲泱鬱。迨天未雨。習習和風。長我稷黍。乾道變化。羣龍以序。元首永康。股肱是輔。其輔惟何。惟伊及呂。其康惟何。惟堯及禹。我食旣豐。我衣惟楚。無有後艱。旣歌且舞。我徂何往。于彼淮濱。俯玩其流。清波磷磷。扶搖起鵬。四海揚塵。孰能高蹈。獨潔其身。衆人惑惑。賢者葆真。獨寤寐歌。忘我賤貧。

四皓歌

四皓之意。傷秦之虐。而劉項之暴。又甚。故往而不反也。漢已平天下。又恥高祖悔予。故云爾。
與汝攜手。南山之阿。富貴多憂。孰知其他。

大風橫厲。江海蕩波。嗟汝鱗介。傷如之何。
高巖有薇。深谷有芝。人生實難。委曲何爲。

閱雨詩 并狀

臣伏見春首以來。天久不雨。厯官李用晦治大衍軌革。太醫趙從古治黃帝六氣。咸以謂風旱
歲惡而然。陛下焦心勞意。側躬修德。撤蕃樂。損膳。議獄宥過。以迎導善氣。爰及言事得罪者。唐
介杜樞之徒。復特見甄序。小大之臣。莫不欣然。人情悅則天氣和矣。乃三月己巳。日入而雨。至
于庚午。詩不云乎。益之以霖霖。旣優旣渥。旣霑旣足。生我百穀。以此見我聖人之德。與天相符。
言出而物應。行發而神助。雖水旱之占有常數者。猶不能違之。況其眇者乎。竊觀詩書所載。盛
德之君。至誠動天之速。未有及陛下者也。臣不勝鼓舞之至。謹撰閱雨詩一首。十三章。章六句。
投進以聞。干冒天威。臣無任云云。

堪輿網緼。一晦一明。或沈而毀。或亢而陽。自古已然。世習爲常。
民生冥冥。靡究靡知。其幸而吉。不幸而災。猖狂妄行。惟所遇之。
天命降監。在我元聖。兼覆廣裕。四方旣定。惟民之恤。無所疵病。
伊年暮春。旱久不雨。人曰時哉。厯有常數。禹湯之賢。莫能弗遇。
帝獨喟息。是豈足言。化育萬物。若容以埏。患在誠薄。不能動天。

退而齋心。淵默以居。鐘鼓不設。宴游不娛。左右肅然。壹懷瞿瞿。
疏獄省刑。與物更始。內恕孔悲。引咎在己。爰及四海。愚智咸喜。
追悟讜直。褻進淹滯。聲色無迁。式序在位。嬖習權近。懾威屏氣。
已已乃雨。若有鬼神。淒淒其風。滄滄其雲。自東徂西。罄無不均。
匪震匪拔。匪盜匪洩。生我百穀。區萌畢達。以享以食。小大胥悅。
天子之德。視雨之施。肇自京師。達於四裔。無有蠻貊。孚我君惠。
天子之政。視雨之時。養老長幼。速哉熙熙。更化易俗。而民不知。
天子之慶。視雨之積。自天降康。時萬時億。眉壽無疆。以靖四國。

公是集卷四

五言古詩

雜詩二十二首

五都貨財地。車馬趨市闐。平明側肩入。薄暮掉臂旋。意氣何所期。盛衰俛仰間。乃知勢利合。厚薄未可原。張陳父子游。一旦復相殘。萬古稱凶終。此獨何足言。

大火序炎夏。盛陽劇炮燔。空桐疾風來。晝景中變寒。皇天自平分。四氣尙相干。涼燠異朝夕。萬事誰獨堅。宛彼風中籟。衆芳自此殘。至理冥變化。履霜用爲歎。

至人邁龍德。世豈識潛升。昔在周道衰。伯陽起西征。胡爲委一世。畏此網與罾。川竭山亦摧。喟然吾何稱。豈不懷徘徊。民言僭無懲。亶亶強著書。後賢以爲經。

崑崙邈人境。日月相蔽虧。上有仙聖居。帝閭俯崔嵬。王母坐少廣。有娥闕瑤臺。弱水不可梁。大荒曠無厓。周穆昔好游。超絕僅能陪。方朔偷桃兒。沈濁何乃來。青鳥通其使。雄鳥爲之媒。靈化信難測。真契從此推。勿以隋侯珠。彈雀千仞峰。勿以和氏璧。投人昏夜中。彈雀不可期。投人未必容。大賢惡皦皦。所以明若蒙。積薪莫自高。失馬莫自悲。薪積常先焚。馬失常復歸。人情習所近。物理豈易推。君看禍福間。紛糾如繆微。

朱暉乘餘香。三月覺徂暑。流光不相待。時節猶逆旅。煌煌園中花。零落會見汝。啼鴉鳴空林。良辰竟何許。
秋風吹賓鴻。千里飛一息。水闊稻梁寡。天寒霜雪逼。豈不抱遠志。顛頓傷顏色。顧鷗乘春暉。采采華羽翼。
側身襲人間。慧巧誰怵惕。出入金玉堂。戶牖初不隔。上無飲啄患。下有居處益。胡爲事高遠。骯髒莫自適。
駑駘不下廐。騏驥行萬里。勞逸誰爲多。芻豢復誰美。天機信其宜。人事亦何恥。世無王樂徒。駿骨或空死。
悠悠浮空雲。明暉何倏忽。造物固難恃。變化亦倉猝。響莫爲雷霆。明莫爲日月。日月易遮蔽。雷霆易奔絕。
古風不可復。習俗已久敝。咄嗟忠與信。流蕩爲詐術。詐忠惑其君。詐愚安其身。色厲內以荏。行違貌取仁。
三年始橫流。後來更日新。至公棄塗炭。正道敗荆榛。已矣千載後。誰能反其身。
毀巢鳳不至。竭澤龍不游。賢者有所歸。得非龍鳳儔。周公下白屋。聖德被九州。趙禹謝賓客。漢朝以爲優。
澆淳不相襲。用舍何其繆。苟循一身利。不爲萬姓謀。哀彼林杜詩。死生遺道周。
皇天不絕命。百姓何震愆。歲暮霜雪至。悠悠事南遷。羈鳥哀去巢。游魚樂懷淵。如何道旁子。逝將不復還。
西望周鄭郊。顧想河洛間。伯禹不可作。涕流爲淪漣。
爨桐深竈下。埋劍古獄間。怨聲動旁人。憤氣凌彼天。當時頗見旌。後世稱爲賢。自古聞知音。此事或偶然。
嶰山有奇竹。老棄陰崖巔。太丘有神鼎。逃匿千丈淵。光景閔不見。音容杳無傳。豈能向時俗。千進心拳拳。
世貴一人敵。又稱朱絲弦。吾欲評其風。願君詠此篇。
鑿井取泉飲。上山采薇食。豈不信憔悴。所願皆我力。泉也非難致。薇也亦易得。志士恥徒飽。衆人苟所獲。

犧牲畏芻豢。樊籠害羽翼。悟理宜在早。無爲晚更惑。

蛟龍蟠深泥。魚龜頗同調。變化且何有。蝮蛇亦可笑。煌煌千金珠。百仞闕其耀。風雷在所遇。隱顯始獨妙。屈身天地間。微物安得料。

伯夷逃西山。尼父居九夷。世苟不我用。我方從此辭。道悠豈忌遠。義豐不云飢。世非乏賢士。爲問從者誰。由也實好勇。叔齊固同時。捨此乃無人。遷籛而戚施。遠矣千歲後。愴焉我心悲。

道薄德亦散。功名爲時須。用力世所賢。守正衆云愚。智者競蒿目。小人復邇圖。悠悠三季後。此風益已渝。安知治未病。舐痔而多車。堯舜無能名。越哉已矣夫。

雍門妙弦歌。哀響激人耳。偉哉孟嘗君。慷慨淚如水。當生復念死。誰謂悲能已。絲桐信感人。世固乏之子。昔者有化人。來集周王庭。咫尺逝萬里。頃刻超百齡。五音蕩心神。耳亂不可聽。衆采眩其目。不分丹與青。飄飄惑真僞。恍忽迷窈冥。馳思八極表。詎知日與星。未嘗出戶牖。自疑涉天廷。左右莫覺悟。兀然殆遺形。祈招作悲歌。聖賢用爲經。

翩翩丹穴鳥。志在萬里外。營營持孳叟。何事守蒿艾。聲音可得聞。羽翮不能害。嗟彼雉與兔。首身自此碎。

詠古詩十二首

虹蜺明西方。五色相屬聯。浮雲萬里來。泱鬱天宇間。白日晦無象。盛陽變爲寒。涿水彌九土。陵谷相貿遷。盈虛叵前測。物理有固然。

長離乘風起。四顧求所棲。路窮臨蒼梧。復排層霄飛。豈不願安處。不知所可依。層繳充逕隧。鳴梟正鳴悲。瞑夫抱同律。曠絕將何希。

趙國棄鳴犢。孔聖爲之回。西伯善養老。伯夷以爲歸。馳驅西楚郊。徘徊太皞墟。周漢多封君。不祀旣忽諸。三墳基皇德。八索總道樞。若人豈欺我。虞夏亦典謨。萬里如浮雲。古風訖無餘。往矣不可追。喟然爲躊躇。游鱗泳泉下。黃鵠巢林端。得失不相及。天理庸自全。有虞垂衣裳。西母獻厥環。周穆賓崑丘。車轍萬里間。宗廟頽爲墟。閭闔不可攀。祈招作悲詩。萬里用爲歎。靈山生神芝。一年再三秀。絢彩奪霞露。熒煌寄巖岫。真人勸我飡。可以躋萬壽。自古王子喬。祕此莫輕授。采之豈辭遠。時逝不可又。歲晏懷所思。終焉不盈袖。元鈞運洪爐。晝夜不少停。萬物更相禪。一氣紛異形。駒掇出竈下。久竹爲青寧。孰知范氏犧。晚就南畝耕。至人友造化。逝與一世冥。善惡故不屑。寵辱何足驚。東遊滄海濱。回首面大荒。豁達三齊風。遊山鬱蒼蒼。在漢田橫氏。不忍南面王。磊落五百賢。從死忽若亡。壯士不必成。令名固爲長。異體同一心。萬年尙耿光。天道不可聞。自昔孔子徒。籍籍秦漢間。將非愚且誣。大河決東郡。火德以爲符。哀哉冀州壤。兆民散爲魚。公孫雖前覺。執政疾魯儒。世無異物神。終竟遺泥塗。萑弘謀周室。憤血死猶碧。子胥殞吳門。江水爲之逆。精能動天地。忠不諭兩國。九鼎旣西逝。姑蘇亦東側。

儉容習爲俗。萬世未遽易。形勢敵使然。生民豈惡直。
麒麟不可羈。安得書春秋。鳳凰云難致。孰使鳴岐周。
無田于甫田。歲月忽已過。如非行邁謀。自宜道路脩。
安知吹鳴律。燕谷成良疇。不見託秋駕。崑墟亦能游。
通都天下衢。名化交百廛。鳴鷄側肩入。日暮掉臂還。
有生寄無窮。過若空中煙。俯仰異去就。況乃多歷年。
留侯獨悟此。解組從列仙。萬戶如脫屣。故爲絕世賢。
南山有樛木。葛藟蔓其封。上枝結紛菲。下枝散蒙龍。
下能使上好。上亦令下通。寧知力不足。歲暮摧烈風。
苦成任兩國。德孰與棟隆。君苟以此始。又當以此終。

讀峴山詩寄獻八舅龍圖

道悠寄先覺。神契無近知。彼美羊公意。今在峴山詩。
陵谷非一變。榮名獨至茲。當時偶然語。正與來者期。
慷慨激悲歌。崔嵬構叢祠。懷哉千歲後。慰此江漢思。
公亦蹈前人。方爲帝王師。奮筆成不朽。何啻中亭碑。

偶作二首

蓬蒿附高原。芙蕖植汗池。物生自有性。不爲高下移。
貴在世所用。未可以爲師。賤在衆不識。未可以爲嗤。
州來薄千乘。巢父輕九州。齊景登牛山。涕泗獨交流。
左右同來人。嗚咽不息收。共知富貴樂。變化不可留。
四顧更悲嘆。萬類莽悠悠。歌舞未終曲。回首已可愁。
或指白楊下。荒草古時丘。危辭才感拂。耿耿相應酬。
豈識達觀士。笑爾若蜉蝣。

蒙示容齋詩輒爲五言仰續逸唱

達人與道運。投迹繫所逢。在治信若鳳。處幽固猶龍。外物紛屢變。中局豁兼容。乃知雲夢區。未足嬰其胸。明公蹈康濟。茲世已陶鎔。優游就偃息。暇豫奏時雍。高齋危舍宇。數畝環崇墉。虛軒便炎夏。奧室宜隆冬。采真混出處。造適觀義農。玩名肆獨樂。怙勢輕萬鍾。越人起丹穴。子房去赤松。材爲用見循。道以世難從。古事何昭昭。斯民積顛顛。獨應甘棠樹。方使來者封。

得汝州舍弟新詩

魯人貴韶灌。海鳥眩以憂。豈不盛鐘鼓。性違理自愁。憶在田野時。終歲頗優游。食魚出有車。夏葛冬亦裘。弄翰不自量。著書望孔周。處身笑汲汲。視世良悠悠。誤及時君門。過緣名字求。軒冕非己好。簿書反自羞。因欲飾所短。強爲妻子謀。精神敝蹇淺。學殖誰勸修。歸臥常喟然。歲月屢以流。愧爾從軍詩。氣完語更遒。豈獨古人風。遠與王粲儔。實爲平生賞。若慰鍾儀囚。我年向四十。蒼髮已滿頭。篋中無寸書。磨滅悲蜉蝣。念此可以驚。如何復淹留。昔買吳下田。頗聞利鋤耰。汝宦何時歸。相與尋滄洲。處使有茅屋。出使有漁舟。知命贊易篇。沒身記春秋。但令文章顯。不愧時俗偷。世事非所了。咄哉無夷猶。

續黃子溫讀陶淵明詩十首

四海方蕩瀟。匡山得三隱。若人獨秀士。逸響露深蘊。江漢東南流。滔滔未之盡。羽輕鮮知福。地重每貪禍。有以義皇民。居然北牕臥。此意俗莫悟。將非首陽餓。

長梧有高韻。千載不可及。五柳遺世名。于今亦獨立。悲哉市朝士。夸競常汲汲。子綦委天樂。窮達兩已忘。九歎爾何知。相也安得祥。一吟責子篇。千古如相望。追俗情易合。玩奇當企爾。柴桑彼何者。高唱屢在此。凡有三柴桑。縣令不俛眉。吾又悲揚子。州縣徒勞人。著作非所務。道殊豈自強。氣直已多迂。屢招遂長往。歸歟彼何暮。昔在八州牧。功業濟衰晉。吾聞賢者後。鮮不祚休運。如何竟寥廓。天道蓋難問。孟嘗實超邁。舉世少其並。風流自有鍾。若士復孤迥。祖述酒中趣。乃知外家性。吾今乞食士。因詠乞食詩。諱無乞食怨。復想乞食時。貧賤自古然。豈愧世上兒。曩遊潯陽郭。懷古愴來暮。不意陳蔡間。起予欣有遇。彼此共一時。悵然感佳句。

晝寢三首

日出百事集。人生亦多憂。曲肱試少息。乃得逍遙游。圉圉爲潛魚。因之乘波流。翻翻爲飛鳥。爰以凌空遊。在已孰是非。于物任沈浮。觀化悟獨樂。真僞竟悠悠。成敗勞耳目。是非喪神慮。我生天地間。安得棄之去。始疑昏逾明。漸覺夢勝寤。但可寐無聰。安知歲云暮。神交旣倜儻。魄定奚憂懼。此以遣朝昏。因之保吾素。久思謝時俗。奔走難自諧。逍遙衡門下。雖陋得我懷。汲彼井底泉。掃茲風中埃。歎蒸爲之去。襟抱蕭然開。養心貴能適。造適不及排。胡爲車馬客。一往忘歸來。

晝寢上府公

長日無所爲。高臥聊自如。清風拂庭樹。蕭蕭牕戶虛。曠逸追羲皇。粹和反華胥。暢然物外遊。謂若天下無。方今少陽交。田野東作初。壯者固不暇。老者日競趨。胡爲乃自便。徐徐以于于。從吏代力耕。飽食良自娛。事賢庇敏政。宿官特多餘。念茲寄幽閒。未覺勞簿書。但恨不可雕。正當砭其愚。

六月二十六日西閣晝寢

馳騫聖不足。治安愚有餘。願言從物役。卽事實燕居。清切掖垣峻。深沈雲閣虛。食有萬錢膳。架多四部書。低頭悟素餐。遊目慚古初。非吏復非隱。人言定何如。平生山林尙。自與功名疎。何爲出不反。視此歲月徂。秋風隕高林。蟋蟀鳴階除。行矣浮扁舟。季鷹不欺余。

苦雨二首

洪河滔冀州。大陸日夜摧。天時普陰沴。飛雨皆北來。崩騰亂雲霧。頃刻不暫開。通衢爲深淵。高堂生蒼苔。稼穡日以沒。民生一何哀。微禹旣已矣。我其爲魚哉。獨坐空堂上。漏濕無與娛。晨炊煙不然。敗竈將生魚。被服鼃蟻衣。出入螺蚌居。里閭杳相絕。滔滔水漸車。安得雙羽翰。超然謝泥塗。

久雨三首

繁陰過五日。積雨迷九天。衣冠亦泥塗。陵陸成深淵。忘履已乘櫂。舍車始思船。曰余蹈滄海。良知時適然。

清渠彼涓流。通達此夷坦。風雲瞬息間。江漢倏生眼。淵源詎能問。浩蕩頗可憚。白日蔽九霄。吾行幸當返。巖巖蓬萊巔。赫赫崑崙墟。上帝嚴紫垣。羣仙亦深居。高出雲電外。俯視風雨除。安知昏墊民。汨沒纒闔廬。

石林亭成宴府僚作五言

吾愛謝宣城。適意安獨往。雖聯鳳池步。不廢山泉賞。吾慕應休連。感事能屬書。頗嬰下流謗。獨占仁智居。寥寥二賢後。忽忽千載餘。若士不可追。此風或在予。延石象衆山。決泉瀉交渠。林壤使我欣。不知歲月徂。薜蘿分蔽虧。松竹相扶疎。時時四方客。顧此亦踟蹰。儻遇鍾子期。知子情所摠。

自京師汎舟還郡作三首

秋夜何迢迢。一夢八九覺。孤舟寄風雨。短燭才自照。冥冥高雲過。寂寂山鬼嘯。展轉誰與歡。漂泊未可料。昔我自茲邁。春華巧相笑。今我復來此。落葉紛滿道。客行無遠近。勞苦略同調。一歲再羈旅。人生豈長少。良無二頃田。詎得守蓬藿。

昔在馬少游。抗志安故土。其後龐德公。迹不踐城府。出乘款段馬。身與麋鹿伍。鄉里稱善人。妻子同隴畝。人生資衣食。既足尙何取。致求多贏餘。筋力但自苦。常陰貫秋序。涿水彌平陸。居人逐飛鳥。往往巢樹木。四顧何茫茫。江海忽在目。古語乃信然。高陵或爲谷。乘桴義無憾。斷髮憂可辱。弁冕績禹功。誰其悲濡足。

西陽池新舟邀府公遊泛

昔賢濟川意。固與斯人共。曠代屬明德。至樂下及衆。池臺固舊賞。舟楫爲新用。忽疑江湖景。稍信風瀾縱。追參鳧雁泳。歷覽魚鼈動。頗已寓高興。矧今結輿誦。嘯歌一時適。顧眎萬全重。好勇知未能。乘桴自欣從。

贈馬暉供奉

朝廷功名次。晉國在第一。受遺先皇帝。事與周召匹。丹青爛勳伐。終始最密勿。宗族宜甄庸。百世皆寵秩。公孫非遐胄。何乃尙淹屈。官名雖供奉。冗散眞士卒。努力習文華。家貧傳清德。翰飛終不高。好事見心骨。人生繫逢遇。進退豈定律。古者如爾徒。萬戶自可必。今者如爾徒。富貴亦未失。主張有眞宰。時態莽回聿。咄嗟元功世。頗復困蓬華。吁彼山野人。奚由自奮出。

出城城角東積水如江湖壤田甚多居民捕魚種蓮芡自給從丙申己來四年矣

出城得自便。下馬事幽討。曠野荒不耕。蒺藜生滿道。往往逢飢人。羣背掘野草。不惟黃頭兒。亦有白髮老。問之指積水。此去殊浩浩。室廬久漂蕩。樹木多立槁。食此且賒死。堯年亦久滯。不能去墳墓。更欲依蒲藻。昨來計蓮芡。頗不減粳稻。明年當大種。妻子或相保。

夢中

誰謂夏夜短。一夕夢九逝。夢中如平生。歡笑隨母氏。覺來拊形軀。獨在人間世。上呼聲連天。洒泣血滿地。何忍留我生。哀哀抱微志。

櫻木樽

先民任天真。吾得見其器。其器云如何。蓋若刳木類。不戕生以戚。不傷材以蔽。不以遠見遺。不以枯見棄。因其無用姿。授以有用意。取彼自然象。廓此閔然制。豈無彫磨工。不欲敗淳粹。豈無青黃文。不欲增巧僞。其高豈無蓋。不設簋簠製。其下豈無舟。不著雞鳥麗。任真肆穫落。肯慕金玉貴。兒童誚敦朴。婦女驚醜異。豈若輕薄子。形容混茲世。矜愚以相高。飾貌以自喜。淳風陷衰薄。古道喪簡易。自非窳樽民。慎勿同一醉。

泛舟

長嘯望江漢。緬懷滄浪行。因浮扁舟去。共盡幽人情。春日天氣佳。近郊潁水清。雜花亂繽紛。好鳥相嚶鳴。解纜相沿泝。凌風恣縱橫。適心故真樂。徇物皆虛名。興盡相與歸。夕陽半東城。

過士建中屯田居此君年六十請致仕所居蔽風雨而已

市朝隱非一。躁靜理不同。多君金閨彥。遠有山林風。千鍾臥名利。三徑入蒿蓬。似是於陵子。又云張長公。相望千年外。獨得環堵中。自古用先進。誰當駐飛鴻。

出城

簡服謝車馬。逍遙理輕策。平原草樹美。百里見秋色。稍知人境殊。似與囂塵隔。悠悠出岫雲。杳杳歸林翮。煩腸寬鬱紆。遠相俱幽寂。孤煙起晴縹。去水照心白。所期尚臯壤。生事視耕植。適野非昔賢。于焉如有獲。

泛舟三首

冰泮池水綠。春意亦已歸。長楊特多思。浩蕩隨風飛。弄舟不用楫。漾漾陶春暉。回還無終極。孰謂江湖非。

舉觴屬坐人行樂常苦稀。一醉捐百慮。念子勿相違。乘日復來游。北林稍芳菲。當令魚與鳥。識我心無機。雪消泉似漲。冰解舟可通。操篙不憚冷。環渚故無窮。歌詠淹短日。醉酣輕朔風。何須萬乘相。始辨鷗夷翁。方池亦通舟。水色涵碧霄。解舟不用楫。漾漾隨風飄。中河乍縱橫。顧眄幽興饒。白鳥逃人飛。赤鯉時復跳。稍與外物遠。解襟歌且謠。安知抱憂思。謂我士也驕。

初到毗陵

獻歲涉重江。仲春安我居。衆物已熙熙。新花生遶廬。解裝慰羈旅。置此琴與書。稍稍道吾真。幽襟得軒虛。頗聞蘭陵俗。尙有荀卿餘。文章幸仰止。夙好今欲摅。膏雨復應候。帶經得耕鋤。歌成擬焱氏。賦就期相如。出處方自爾。名聲亦從渠。無煩畏鬻民。屑屑俎豆予。

雨後城下

雨餘百川漲。遠水浮林梢。忽怪有帆席。何爲出鳥巢。登臨非吾土。虛爽慰南交。稍見暝煙起。陰蟲啼草茅。下汴

畏途心多驚。強寢終不安。雖是仗忠信。猶有行路難。古今惡隨波。今乃知所患。胡爲出溷濁。幽興悠然寬。

望九華山

九華非人境。聞譽不相識。南浮大江波。始見蒼翠色。是時雨初霽。積靄尙融液。九峯若驚龍。並躍雲外碧。森然聳牙角。未謂真是石。問名審其實。歡喜愜所適。恢奇一何甚。遠想始開闢。造化競淫巧。斧斤恣雕刻。

不然何其功。不與嵩華敵。我行宇宙間。若此曾未覲。中國名山川。幾何亢斯迹。徘徊不能去。塵土媿行役。平生樂閒曠。時俗況迫阨。誰爲隱君子。攜手宅巖隙。

鷄冠花

秋至天地間。百芳變枯草。愛爾得雄名。宛然出陳寶。未甘墜墮陋。肯與時節老。赤玉刻縝栗。丹芝謝凋槁。鮮鮮雲葉卷。粲粲鳧翁好。由來名實副。何必榮華早。君看先春花。浮浪難自保。此花白露後益殷鮮可愛


玉書云赤如鷄冠

陳郎中竹園

蒼竿十餘畝。歲晚色更好。詰曲逗遠村。深沈象晴島。鳴禽自相應。風葉不待掃。何事主人心。白頭三署老。

浮雲

高雲乘颺風。泱泱縱所適。大哉九霄闊。俾爾萬里客。豈無一掬潤。浩蕩洗南國。應龍潛冀州。回首空眇默。



公是集卷五

五言古詩

題度支廳事許道寧畫松石呈彥猷鄰幾直孺

長松森無依。蒼石儼相對。自然山林氣。若出天壤外。許生筆妙絕。今世殊少輩。發揮得意表。瀟洒與神會。炎蒸五月交。塵土九衢內。微風度牕來。左右含天籟。下有漁樵翁。生事尤可愛。茅茨乍隱見。猷猷更向背。吾廬若辦此。軒冕本不賴。願從二三子。相與駕言邁。

擬阮步兵一夕復一晨

一昏復一晨。一晨復一夕。擾擾若有爲。悠悠定何役。譬如風中葉。不自知所適。譬如池中魚。強自營所得。朝乘日車出。暮與驕鳥息。昔我髮純漆。今我髮半白。誰能邀神靈。傳我雲表翼。我與從之游。覽觀元化極。

紀危

四月河水湍。怒風復相乘。維絕柁亦摧。舟人廢其能。中流急迴環。頃刻不可勝。性命委自然。豈知所依憑。堤旁多聚觀。失色氣崩騰。孰不願引手。而乏鉤與繩。嗟我亦天幸。旣危乃復興。追思方厄時。汗出如洗冰。側聞前此者。覆溺已屢曾。此事通爲邗。長民可以懲。因書作長詩。俾不忘戰兢。

十二月十一日雷電有作

今茲方隆冬。陽春尙宜少。去聲幼少之少。何忽雷早聞。因之電爭曜。硨磲非常怒。礮礮通夕照。號令無乃乖。災祥諒誰召。吾聞玉女戲。獨得天公笑。此理正應爾。君毋強譏誚。

種紫蘇

赤日厚地裂。百草殆立枯。朝雨應所至。雖微念勝無。力難興禾黍。可以成嘉蔬。歲暮有此望。帶經且親鋤。今茲五月交。盛陽消已徂。汲汲愧老圃。仲尼云不如。養生寄空瓢。雖乏未可虛。正以營一飲。形骸如此劬。

遣懷三首

天道與性命。聖人罕其言。七十豈常士。游夏終不聞。鞠躬慕仁義。或不免飢寒。奸雄何爲者。住往爲世賢。倘復有真宰。無用預其間。有形每共生。達士獨無惑。昔有蒙袂子。恥從嗟來食。物生會當盡。壽非金與石。但恨居世俗。不能盡胸臆。壯士志溝壑。斯言著前識。初歲志慮淺。所慕在輕肥。自恨聞道晚。不虞失性非。迷途將未遠。回駕猶庶幾。古賢多事業。出處何不知。甯受芻豢辱。倘爲鴻鵠飛。

歸牧相訪示所作詩賦篇予與其兄子緯還往頗熟

曰予謝賓客。久與時世疎。何忽衡門下。見枉使君車。彤旆映落日。腰間有懸魚。抵掌若平生。論文及空虛。

昔與君猶子。結交幸通書。往還苦不早。相見情有餘。置我二阮間。遠慙德不如。強來束帶起。投謁尋君廬。大雨中入局。寄彥猷將以疾臥家。

歎蒸變繁陰。快雨如破谷。明趨閭闔路。深水入馬腹。此地常結轍。江海忽在目。冥行畏坎井。躡迹戒顛覆。慙問高眠翁。不知泥塗辱。

賀范龍圖兼知延安

大兵昔摧傷。兩將折旗鼓。哀哉中國士。化作城下土。冤魂不得返。殺氣凌彼蒼。天亦爲之悲。白晝日無光。人言此城下。往往鬼神哭。此事天子憂。此心大夫辱。昔公守東越。人怨公不用。今日公在西。知公德持重。築城不必堅。解甲不可攻。何況保金城。弛張皆繫公。汲黯輔炎漢。淮南內聳懼。郅都守窮邊。匈奴爲之去。此事昔所聞。今日見所親。折衝樽俎間。震動旃裘民。國恥行且刷。寇讎不可保。斯人嘆微管。願及太平老。

奉和宋次道遊嵩十五韻

嵩峯三十六。皆在青雲端。宿昔望見之。恨不生羽翰。卷巒塵土中。日月如波爛。邇來老將至。更覺行路難。聞君謝車徒。選勝窮峯巒。幽深每獨往。神異多所觀。若有真仙子。羽衣白玉顏。吹笙煙霧中。舉手留盤桓。信非人間境。邈與時俗懸。顧懷平生舊。慰以逍遙篇。三復想在目。令人愧衣冠。處世闊且疎。幼輿亦有言。一丘與一壑。自謂無間然。安得從君游。解纓弄雲泉。昏昏歲復晏。相望空長歎。

和聖俞逢羊

道傍逢羣羊。問羊將何之。朝供大官膳。躑躅未自知。穀觶此何罪。無乃芻豢爲。肥軀一報德。鼎俎安可辭。甯辱泥塗中。故人所以悲。

懷歸

圖養始干祿。執官復辭親。外物與我違。幽懷安得伸。低徊畏簡書。苟且謀賤貧。碌碌已無期。規規徒自珍。秋風卷層雲。鴻鴈知所賓。我獨無羽翰。不能絕颺塵。

送呂光祿自十一月留郡下凡十餘日得劉字

汜濫誠易挹。俊賢噬肯留。愧君殊邂逅。卒歲能優游。會心到稽呂。訪古窮嬴劉。誰令春風來。翩翩動歸舟。千里在明發。一樽成獻酬。江湖望魏闕。離思空悠悠。

題改芷亭作水鑑亭

昔人種白芷。旣以名此亭。今我開鬻淵。復以水鑑名。吾豈異昔人。而徒易其稱。所樂于水乎。內明而外清。內明可比心。外清可照形。照形不吾欺。比心不吾傾。虛靜吾自居。逍遙以無營。會有水鑑賢。吾能與同登。

閉門二首

閉門無所事。歲月忽已極。豈敢空絕交。出門諒安適。是非斂外慮。文字堆四壁。堯舜參在前。孔孟凜居側。崑崙默泛覽。萬里在瞬息。曩古時幽尋。千年僅頃刻。悠悠富貴士。此趣或未得。胡爲逐車馬。辛苦牽事役。傅巖由帝賚。圮橋自神授。商道粲復興。漢基翕然構。窮通苟有命。貧賤豈足疚。斯道誰得聞。人方薄圭竇。

小孤山

驚波觸南崖。反怒射北壁。蒼山相與排。所謂小孤石。蟠根萬仞淵。聳角百丈碧。祠堂豁精嚴。行旅進粉澤。或云婦女神。肸鬩頗有迹。吾知定名意。似欲旌介特。流俗失其真。傳聞莫開釋。居人私其利。禍福妄損益。競爲媚妒說。以誣聰明德。先王秩山川。禮典有廟食。奈何媚于竈。屈己忘正直。吾欲爲小孤。作書解行客。復恐不見從。嗟哉世多惑。

新種雜花樹

天地大逆旅。浮生遠行客。大無萬里異。遠不百年役。乘流惟其遇。得性從所適。何必思舊鄉。而復名一宅。此邦非吾土。此廬非我迹。彼我苟已齊。賓主不足擇。種樹宿所好。及閒易爲力。芳草十餘品。往往手自植。春風二月交。重疊庭下碧。欣欣生意好。一一見顏色。對之默終日。澹若無情極。四時背人馳。壯士每歎息。憂來忽無方。外物不可釋。中和一相伐。頭髮先爲白。萱乎爾能忘。于我獨有德。

滕司諫知涇州

天狼東南鳴。雨矢西北集。覆載豈不容。縛虎宜在急。詩書擢將帥。高枕付城邑。權變非武臣。恩威在呼吸。壯夫氣已激。義士感成泣。籍籍名四喧。蕭蕭髮競立。行旂亂鷹集。已有邊風入。遙知謁明光。介冑但長揖。

城下

秋成雨更綠。高下共萋萋。浮烟晚自起。歸鳥暝爭棲。山谷入幽想。茅茨多舊蹊。日涉遂成趣。身將麋鹿齊。

庶幾堂

徂暑亦已煩。清旦尙餘爽。薰風應候至。芳物與春往。庭樹交浮陰。山禽轉清響。空堂更幽寂。初日正蒼莽。時節無所感。忘言以爲賞。

涼夜

疎雨洗明月。清風生晚涼。動搖星辰影。汎澹河漢光。螢變覺草腐。蟲吟知境荒。端憂易遠感。不眠疑夜長。

狄梁公李太尉廟

就列貴陳力。立功尙成名。兩君雖異時。令望相提衡。治獄多陰德。不戰屈人兵。去思獨至今。奉祀見遺氓。文武百世師。將相一時榮。念我誰與歸。愴然悲九京。

畢吏部冢在太一宮側

蓬蒿道旁冢。云是晉時賢。名聲與陵谷。共盡一千年。惟昔縱達觀。死生同蛻蟬。安知泉下魄。非復甕間眠。

和張洞春雪

水國雖暑濕。亦惡春令早。雨暘恆不時。過燠未爲好。凌威集驕陽。瘴疹一以埽。宿麥根復濡。豐年不煩禱。堪輿氣清真。生物同壽考。大哉造化力。排幹正穹昊。能令四時順。少失安足道。君胡乃歎嗟。哀彼花與草。方今王正始。節物自未老。繁華雖云遲。秀實終自保。可以寬君憂。毋爲色枯槁。

雪意

淒風起幽朔。白日晦光色。仰視浮雲高。蒼茫天容碧。林林懽羣木。栗栗抱寒魄。今朝識天意。欲見松與柏。雪後

日出桑柘巔。鶴鳴風景和。縱心適田野。顧覺春意多。欣欣林間叟。負薪行且歌。此中有真樂。富貴如余何。壽寧觀殘雪

春陽漏潛筦。凜氣留深殿。金莖向飛露。碧瓦仍鋪練。寒光寂寞迴。暖色依微變。壺中異風景。會待花如霰。初雪

荒居人迹絕。但覺歲月頽。北風不我欺。吹雪天上來。入戶時繽紛。當軒肆徘徊。有情知相親。高臥未足哀。他日門晝關。今日門早開。開門將誰爲。南山玉崔嵬。

雪中寄貢弟

大寒雲長浮。雪急風更厲。行子歸何時。遠遊感人思。脊令顧儔下。鴻鴈順時逝。原隰無安居。稻梁豈深志。誰令歲月晚。坐使羽毛瘁。江湖可遣憂。引領正相遲。

月夜

日入更洒埽。翛然庭檻空。酒杯落明月。白羽來清風。佳興自不淺。幽人無異同。徘徊臥林下。重露霑蘭叢。和閣都官九月十三日夜對月是夕某與子華聖俞如晦會飲君謨所

秋霖恣淫溢。后土無時乾。忽驚浮雲盡。更覺天宇寬。涼月如白璧。飛來青冥端。衆星稍滅沒。驚鵲自盤桓。

興發思遠游。惜無凌風翰。聊尋故人家。呼酒澆肺肝。適與二三子。四座俱解鞍。意合心賞同。百觴不辭難。玩古驗漢魏。君謨出漢魏。時金錯銅機。精麗有分寸。尺度天下奇物也。舞姝試邯鄲。談諧雜謠語。大笑傾衣冠。足爲一時樂。未悟清夜闌。每至絕倒處。恨君不獲觀。明發得新詩。照人瑩琅玕。又知共茲翫。正若相從歡。君本青雲人。淹留尙郎官。曠懷不自屑。遇景宴且般。古來悲秋士。局促宋與潘。相望如轅駒。豈足爲君歎。

夜月

執熱不可濯。昏昏倦衣巾。涼月如有情。萬里來慰人。浮雲卷層虛。六合隨清新。河漢涵光輝。城郭息埃塵。茲時一可畏。與子聊相親。逍遙夜未央。更益情性真。

夜起呼徐監簿同看月

夜長愁無端。歲晚易多感。徘徊中庭步。相與肆遐覽。繁霜冷次骨。皎月清照膽。幽意暫欲飛。秀色若可攬。明夕雖復來。素華已應減。念茲徑使醉。無使我心慘。

南伐詩

兵行何忽忽。百里不一息。南征有期會。相觀各努力。三年戍西荒。蟣虱生金革。歸來席未煖。羽檄何奔迫。行行當逾嶺。五月逼炎赫。尙有筋骨存。所虞生死隔。山林如燄焚。溪水沸湍激。自古皆有言。一夫萬人敵。蝮蛇長相逐。虎豹不可格。主將貪功名。謀臣貴恩澤。奈何輕人命。棄置曾不惜。探湯入其中。未半死已積。

蒼生亦齊民。不必皆盜賊。賢主尙扇暍。仲春猶掩骼。一身不自愛。所懼失爲國。堯舜有舊書。廟堂爲法則。城樓送別。驚風走枯蓬。百里不暫息。密雲乘飛雨。前山坐成隔。蓬老初無根。豈辭遠爲客。山高雖可望。路遠當不識。去留類如此。覽物意寧極。鞍馬未動間。會合彌可惜。緩歌送清觴。更醉日將夕。

李緜州訪別

天寒起常晏。日出扉未啓。深巷聞傳呼。兒童怪旌檠。知是漢中守。訪舊來至此。適我平生懷。趨迎願少止。結交許忘年。並坐每抗禮。語罷當遠行。眷然色不喜。君惟二千石。我徒一男子。貧賤宜輕絕。反如不能已。善化遲朞月。壯心隘萬里。側聞報政速。永觀凌風起。寧復悲東山。滔滔歷年祀。

食橘

吾聞江陵橘。乃比千戶侯。歲獻天子旁。取爲廟堂羞。問其何能爾。無脛而遠遊。橘也不自言。請君以臆酬。憑生覆載中。頗亦萬木儔。過爲騷人頌。謬得禹貢收。託身聖賢間。自覺名譽浮。苞苴賴攜挈。富貴常見求。明珠無先容。按劍或暗投。而我適衆口。鑠金不予憂。物生有通塞。不必在中州。何用懷苦辛。但爲時仇陵。留鄰幾君章。奕棊便宿小齋。

簿書易短景。燈火宜清夜。過從喜吾子。尊酒迫我暇。歡來中局豁。興盡外物借。錯落盤上棋。白黑互跨所。決機競神速。取勝頗雄霸。惜我壯士氣。局此萬里駕。時乎無由試。寓目亦悲咤。天地一枰土。古今萬物化。

願無辨其間。痛飲但來舍。

與鄰幾對碁戲作

碌碌無用智。玩此方罫間。君乘百戰餘。勝氣不可攀。拙速亦天幸。出奇犯險艱。數俘効軍實。斥境除邊關。捧觴跪進養。座客歡解顏。安得百壺酒。使君酩酊還。

公是集卷六

五言古詩

今古路

出門道路多。縱橫不可測。我今欲遠行。須問曾行客。徐徐逢路人。借問青松側。客曰今何往。答之遊京國。客乃指要路。而言行有益。古路難大道。不如今路直。但行今人路。猶如假羽翼。彼客別我去。獨自躊躇立。爲見今古路。信乃無差忒。今路足輪蹄。古路多荆棘。欲行今人路。恐背古人迹。欲行古人路。今人笑迂僻。又擬不出門。奈何飢寒逼。哀哀此時路。悠悠蒼天色。不避今人嫌。路須行古陌。古陌雖然遠。且保無蹶失。勉哉自勉哉。前去難云適。不獲見楊朱。萬古凝愁魄。

曉至池上

宿雨墜高葉。薄雲麗朝陽。園林澹澹秋。庭戶蕭蕭涼。水淺魚怫鬱。荷深鷺低昂。幽懷欣自得。住賞契所望。忽恐羣動作。深林沸蝸蟻。

晚涼

落日蔽崑崙。微風起闐闐。蟲聲語悽惻。樹影翻離合。蚤露結明珠。圓蟾瑩塵匣。浩歌始自放。喟此區中狹。

金山東崖北望海門

憑高仍一望。北固何崔嵬。地形東吳越。江險通邛峽。英雄既已矣。壯觀空在哉。寂寥寒潮上。孤帆當檻來。

屏上兩賢二首

謝公樂山水。不以官爵間。天機有所賦。世俗從爾訕。上躡巉巖峯。下弄清泠澗。吾生慕如此。敢避刺疎慢。寧爲途中龜。勿作蒿下鷄。謝靈運

人在誰不如。妄爲世所束。興來當自往。興盡期自復。大雪暗溪路。新晴月微燭。去非之子慕。返豈斯人辱。優游便所適。偃蹇媚幽獨。王子猷

贈梅聖俞

耳聞梅聖俞。及此將十載。洛下聚英豪。文華富如海。聖俞昔與錢丞相。歐陽公。尹洙。王復。會洛中。皆名士。聲名動冠劍。久合參朝案。何意幕中客。新違江上宰。聖俞以諸侯從事知建德縣。罷歸京師。材高用雖晚。大器終有在。三公識者多。薦拔可立待。棲棲九衢裏。塵土增厭殆。相逢恨知晚。乍似去貧餒。鄰居幸見過。沃此胸礪硯。

登禪智寺上方贈同遊諸公

重岡抱城起。清川帶野回。舊都遷陵谷。遺寺空池臺。脩竹入旃藹。荒溪轉崔嵬。鳴禽畏人起。故老驚客來。置酒感興廢。浩歌寄歡哀。伊昔游此人。于今安在哉。谷深春先覺。地爽景後頽。造適假一笑。願君盡餘盃。

楊白花

飛飛楊白花。隨風渡江水。江水來不極。楊花去無已。鴉啼淺深樹。雪落千萬里。春風傷人心。緜緜復如此。涵虛閣玩玄猿孔雀。

雨霽同望民登西北樓

雨餘暑氣滅。日出浮雲開。高樓極遠目。百里無纖埃。山形西北驚。江勢東南來。舊都尙能記。壯觀多可哀。微風激清嘯。浩霧侵寒杯。亦知非吾土。聊復樂徘徊。

秋興三首

微風起閭闔。秋意日已滋。陰蟲羣悲鳴。草木同變衰。天道雖茫昧。平分爲四時。功成自當去。搖落何獨悲。魏牟貴公子。沈沒功名間。一浮江湖水。慘戚頽朱顏。魯連揖萬乘。蹈海如忘還。棄世脫敝屣。風流安可攀。耿耿河漢輝。中夜西南流。牛女永相望。婉孌悲素秋。安知乘槎翁。徑出海外遊。天路或幽險。神仙非所求。

留城子房廟

大風起豐沛。海水羣飛揚。逐鹿未有歸。飛熊猶道旁。一見契千載。立談開八荒。蛟龍不可羈。鴻鵠得新翔。昔爲黃石師。智策無與雙。晚蹈赤松賞。功名忽如忘。由來神仙流。理與天地長。陵谷自有遷。若人豈復亡。

我行覽遺蹟。城邑空蒼蒼。感古追遠遊。白雲杳無鄉。

同介甫和聖俞贈狄梁公裔孫

陳平智有餘。周勃勇無敵。兩人相提衡。終復漢社稷。梁公柱石姿。獨立謝羣力。匡君多直言。薦士有深畫。既扶將頽運。復起未然策。事業兼二子。浩然雪霜白。偏材戒獨往。特達見令德。誰謂十世遠。風義猶不隔。末孫何支離。畎畝有餓色。明詔問樂鄉。布衣列士籍。名垂天壤間。氣使懦夫激。聞君商聲歌。更若出金石。

贈聖從待制

君居御街西。我居御街東。如何百步間。十日不相從。君非園中植。落落千丈松。我亦湖海人。庶幾孤飛鴻。俱遊人世間。俛仰豈不同。蕭蕭髮向白。哀哀嗟轉蓬。仕固不期達。貧亦不諱窮。行當一麾去。幸識櫻寧翁。

早至涼樹觀芙蓉

林深池亦淺。日出光晚及。粲粲花尚含。溥溥露猶浥。良魚潛復躍。幽鳥翔又集。物情況如慕。心賞浩難戢。誰能贈遠人。采采空佇立。

同客飲涪州薛使君佚老亭

百尺井底泉。激輪作飛流。潺湲入庭戶。宛轉如奔虬。主人三署郎。持節西南州。棄之臥故里。富貴安足留。卻掃長閉門。羸餘非所求。官來坐林下。樽酒相獻酬。未嘗語朝市。餘事良悠悠。乃知獨往意。不必山林幽。衣冠多雋才。繼踵公與侯。誰能懸其車。五十未白頭。嗟嗟賢大夫。此風可鎮浮。爲問三輔間。何如馬少遊。

曲水臺竹間默坐

杖履不能遠。逍遙池上林。微風起衆響。炎日隔繁陰。斐亶激流泉。間關語鳴禽。放懷在離人。寄賞欣會心。既謝朝市喧。亦忘山谷深。雖知非吾室。猶以開煩襟。

永興軍中

涼風響高樹。清露墜明河。誰復夏夜短。已覺秋氣多。豔膚麗華燭。皓齒揚清歌。臨觴不作意。奈此粲者何。

北軒手種竹兩竿近輒有甘露降其上作五言示諸同舍

秋來手種竹。憔悴不成林。復此雪霜晚。空驚孤直心。如何沾瑞露。似欲慰窮陰。珠華粲將墜。五色潤還深。含春乍荏苒。載日尙蕭森。玄澤非人力。樵蘇無見侵。

舅氏見索新詩

賤子本不學。大賢宜見疎。奈何手賜教。反謂詩起予。高義終炯然。內慚良闕如。得非魯仲尼。不廢狂接輿。羈旅習荆楚。荒唐存簡書。敢驚和者稀。長恐歲已徂。雲漢回天章。圖書祕石渠。瓊瑤落咳唾。寒暑隨吹噓。百年涓陽悲。萬古秦風餘。嗟我送舅氏。終焉非路車。

贈蘇頌

犬豕蒙虎革。氣能懾羣雌。衆人見之美。蘇生見之嗤。褐客懷寶玉。精神暗塵緇。他人望而唾。蘇生望而知。知之竟何補。位下容貌卑。雷同世方尙。獨異誠難施。嗟子豈不謬。拳拳心不移。拜我呼我兄。問我謂我師。

奔蜂負藿蠟。誰道當其宜。憫子空慕古。且爲世人非。古人亦如此。如此名已垂。但當勵行習。慰我千里思。

雪後城上作

雪後原野曠。春生風氣和。藹藹林表色。輝輝池上波。形閒境逾靜。望遠意更多。年華適可玩。不醉將謂何。

寄因甫

君雖委計吏。官似宣尼公。貧賤更何恨。優游聊與同。忘懷鴟夷酒。乘興松江風。此亦隱柱下。何用臥隆中。

寄聖俞

徘徊帝城裏。獨詠有所思。故人昔別此。秋風今若茲。流水去不已。新鴈來有期。寄聲可相及。一見慰天涯。

秋雨

天道去人遠。好惡常若違。始耕苦炎旱。旣穫雨過時。憔悴兩無補。飢寒方自茲。素飽猶可恃。眷言采其薇。

寄密令楊彥文再舉學官皆中正

三年不相見。相見當何時。曩別不謂久。後期庸可知。周南滯留地。宿昔太史悲。春草愁山中。王孫髮垂絲。懷寶常若迷。獻玉常若疑。聞君已屢薦。終歲獨差池。得鹿在詭遇。亡羊實多歧。著書成自樂。回首空相思。

贈黃子溫別

雙鴻俱異鄉。來集清川流。鳴聲偶邂逅。形影共沈浮。一以風波去。一以學網留。去留雖殊趣。失侶自懷愁。五里一斂翼。十里一回頭。有情同覆載。誰免顧朋儔。南國江海闊。豐年稻粱優。力弱霜霰繁。無因攜汝遊。

同謝十三賦盆池

碧沼含白水。動搖明鏡光。浮沈見魚樂。舒卷聞荷香。賞翫茲有適。紛囂因以忘。多君江湖意。不復疑坳堂。

庭前箭竹

冉冉東南美。託根那在茲。鳳凰不可待。歲月方屢移。非復山林意。空餘霜霰姿。清風有時至。獨與幽人期。
新置盆池種蓮荷。菖蒲養小魚。數十頭。終日玩之甚可愛。偶作五言詩。
采芳未盈手。積潤不滿尋。游魚亦何樂。幽客同此心。安排在所寓。相與忘浮沈。濟理趣自足。孰知慕高深。
鵬翻蕩滄海。龍起焚山林。體妨反多累。豈若終蹄涔。

送鬱林楊守

鴻鵠懷遠心。不畏霜露寒。鷄鶩守樊籠。朝遊暮來還。人生感意氣。朋友死一言。況分社稷憂。復在君臣間。
楊侯一麾守。萬里蒼梧山。瘴海不可游。衆人昔云難。升車獨慷慨。卽路無險艱。乃知抱忠信。可以居夷蠻。
昔賢尙功名。天子憂南蕃。報國恩汲汲。勿令歲月遷。

送春

莫埽林下花。花存春尙在。一隨南風散。飄忽不可待。四時相乘凌。萬物隨變改。不如玩三秀。忘年蹈雲海。
答舅氏時詔不就學官者郡勿舉故見督赴期

飛鳥知深林。潛魚樂淵濬。升沈久相笑。出處各自殉。漆雕不願仕。孟子恥獨進。軒冕世所榮。吾斯未能信。

辟雍煥文章。王國聚英俊。及門足自喜。內省媿多吝。且將事畎畝。亦以樂堯舜。悠悠謝知音。當識斯言訥。

送張宗道崇班自穎徙秦不樂于行

宛馬來東道。燕鴻起南飛。適時必有遇。去遠不獨迷。左攬繁弱絃。右拂青萍輝。笑作千里別。出門亦依依。人生何新故。行道情有違。勉率歌清風。以慰君永懷。

陳元龍

元龍湖海士。固有湖海氣。自臥百尺樓。羣兒仆諸地。大賢資遠到。高節邁一世。四野爲戶庭。九河乃衣帶。靈機有時屈。英識豈獨閉。蛟龍隨波游。恥與魚鼈計。擊劍歌商聲。捐書謝俗議。功名留當年。異代見君意。

一月贈深甫

一月三過公。此非兒女情。詩人感伐木。相鳥猶嚶鳴。尙友百世近。結交千里輕。矧惟生並時。況復居同城。攜手未宜少。興發從公行。開口露肝膽。解衿頓塵纓。心親愛自至。外物都忘形。赤日留中天。火雲正崢嶸。頗復哀老子。安眠枕羣經。

懷歸

往昔佩鱗日。童蒙宰相求。中間萬里別。倏忽二十秋。人事固契闊。歲華易如流。聞君尙黃綬。失意成白頭。奄速不可期。升沈亦難謀。寧知及門晚。忽辱從政優。感舊勞心腸。相從恨淹留。寄聲不盡意。何以紓離憂。

同寄題康州陳生連理木

幽人吉素履。佳瑞應精誠。蕭蕭衡門下。珍木爲之榮。連理出高幹。交陰庇前庭。顧恐俗未知。天方表其閔。太邱往千歲。慈孝復騰聲。誰言報施遠。有若晝夜明。世悲上留田。吾慕董生行。作詩寄南州。且以慰父兄。

雪後

雪銷吐膏潤。日出春意歸。藹藹多時趣。融融含夕暉。徘徊中林下。髣髴田野期。天歡頗不減。吏隱亦庶幾。歲晏竟何事。濁酒但當揮。

和彥文秋興

商飈零枯林。疎雨墮中夕。覽物愴已驚。懷人渺難得。明發聆逸唱。願言慰幽寂。胡爲抱紆鬱。更使動悽惻。蜚鴻識來賓。鷹隼知所擊。物微有逢辰。子壯獨失職。高天終難問。淺俗每忌直。浮沈豈非智。器遠固難識。

贈周生

騏驥能千里。不能走鼠穴。猛虎拘穽中。不如狗善齧。周生學干祿。強進屢顛蹶。時不用周生。周生亦不屑。行年過五十。頗究知命說。未嘗畜妻子。名利敢貪竊。所憂道未成。欲辨孔與桀。人知如此鮮。況不厭藜藿。與我始相見。便覺抱高節。人皆用其巧。子獨趨所拙。春秋舉逸民。蔽善尙貶絕。誰期大夫賢。薦使在班列。

嘯亭納涼

翻翻竹梢葉。習習蘋末風。水氣稍澄澈。雲陰反蒙籠。解襟面虛曠。幽興欲飛沖。得意恥獨善。慨然環堵中。過澶州陽橋有感

河水東赴海。還從天上回。甯知今日波。還復前時來。岸柳亦已黃。原田正莓莓。念我平生歡。悵然使心哀。
春晚小園
歲華一何速。春物俱已老。綠柳低映牆。臯蘭生滿道。郊居正幽曠。野色慰懷抱。入鳥不亂羣。閉門但卻掃。
平生佯狂性。更覺高臥好。不及古之人。吾誰玩芳草。

公是集卷七

五言古詩

停雲詩

停停何山雲。靄靄在我廬。濃光賁草木。潤氣下琴書。望望若可親。久之翳寒虛。坐恐森風來。東西隨所如。我道與世異。里閭相見疎。嗟雲亦何事。低徊能慕予。諒以無心故。形影暫相於。

華山隱者圖

神仙不可學。淺俗如醯雞。逍遙二三叟。乃獨秦遺黎。避地思遠適。名山得幽棲。深巖紫芝秀。歸路桃花迷。稍遠人世隔。遂忘陵谷移。至今山中人。往往猶見之。吾聞秦皇帝。甚慕真人爲。駕石窺蓬萊。載車象雲覬。沙丘往不返。四海忽若遺。安知全真子。近在西山垂。一千二百年。修身未嘗衰。古稱山澤臞。非復萬乘期。觀君此圖意。有以和天倪。

送上元張孟侯著作

避世金馬門。歇直承明廬。月贏一囊粟。調笑騶侏儒。忽憶東南行。秋風熟鱸魚。聞君已先我。扁舟向江湖。銅章垂腰間。賜履雙飛鳧。千室豈不憂。弦歌自爲娛。古稱有人民。無事專讀書。自顧都城游。刺促轅間駒。

六朝若流川。覽古半有無。山中折瑤華。千里懷離居。

小隱吟

世道喪純粹。微名掠其美。悲哉山林客。過半朝市死。夸誕一相習。澆浮益紛起。古風日飄泊。末路空頽靡。堯舜安得逢。巢由亦已矣。我歌竟誰和。惆悵同心子。

招隱

鱣鱠不容池。鴻鵠常畏網。全真貴遠到。先覺每獨往。綺皓遺秦憂。季鷹樂吳壤。知幾効來世。前識妙難賞。勿謂鳥獸羣。高山適予仰。

反招隱

伊尹樂堯舜。伯夷傲姬周。顏生一簞瓢。陋巷亦自休。豈不困寂寞。時俗非所謀。脫身洒泥滓。緬與前人游。嗟哉波上鳧。徒爲信沈浮。鴻鵠假長風。不能占渠溝。晞羽扶桑阿。刷翼滄海流。世途旣超邈。矰繳何足愁。所以狂接輿。肆歌悟東丘。觸時懷慷慨。視世悲蜉蝣。哲人有先覺。達者無近憂。綺皓吾所師。緒言起長謳。郡齋燕居寄海陵。道粹儀真景休。高郵不疑三太守。學士

尙容恥玩世。畏景希就陰。一麾諧微願。千里非遐心。平生志江海。寤寐在山林。及此吏如隱。始知古猶今。鷓鴣避落實。蝟蟻安蹄涔。但恐得已多。尙非力可任。諸公蓬萊秀。夙昔交契深。擊柝聲相聞。照鄰光四臨。清濁涇以渭。離合商與參。願言三秋思。毋闕金玉音。

新作涼軒會張拱辰至

張翁垂白鬚。扶病過我廬。向無俗客至。適慰幽人居。酌此瓢中泉。振茲架上書。雖無德與汝。會有歌起予。欲識消長情。願君講盈虛。

發桑乾河

四牡懷靡及。侵旦肅征騑。凝霜被野草。四顧人迹稀。水流日邊去。鴈向江南飛。我行亦已久。羸馬聲正悲。覽物歲華逝。撫事壯心違。豈伊越鄉感。乃復淚沾衣。

寄呂侍郎呂先予數日北行

荒山逢故轍。自上重岡立。君車不可望。君手何由執。旅思隨日遠。徂年背人急。舞劍中夜興。應知憂感集。廣陵蔣生死十四年矣。尸猶溫。其妻與其女閉門守之。未嘗與鄰里通水火。或者疑其有道而杜君懿實之。蓋嘗有自遠來者。以書一封畀其家。視之蔣生迹也。故俗以爲仙。因作五言贈君懿。仙翁棄妻子。往爲壺中客。玉棺竟未掩。人世已成昔。白雲無回期。三徑滅餘迹。猶傳有青鳥。往往寄消息。

新年

流光無停期。二十忽復五。古昔如我人。功烈難遽數。上天終無私。日月不少駐。三皇與五帝。回首焉得顧。新年獨何爲。擾擾趁俗務。壯羞兒女態。浩歎覺已屢。巍巍九重闕。象魏懸法度。木鐸非仲尼。布衣欲何預。滄溟百萬里。乘桴意決去。願世聊徘徊。非爲取材誤。子曰無所取材。東風發幽滯。花彩映草樹。爛醉苟自

娛終焉背時譽。

築室種樹

誅茅作吾廬。種樹滿百株。偃仰可卒歲。優游問誰如。墨翟不暖席。仲尼無安居。良知聖賢貴。逝與功名疎。清泉可深鑿。惡草須早除。適意田野間。誰能歎歸歟。

題所種金鳳花自淮北攜子種之云

愛此名字佳。攜之不憚遠。豈惟江淮闊。兼恐歲月晚。手植中庭地。分破紫蘭畹。綠葉紛映階。紅芳爛盈眼。輝輝丹穴禽。矯矯翅翎展。卑飛何在此。寂寞難自顯。按圖感形似。覽物意繾綣。三復接輿歌。悲風動湘沔。得隱直書并聞將之洛陽

三月一得書。始知去君遠。開緘見無恙。豁達百慮展。秋風催時節。搖落歲向晚。遲遲行旅外。色瘁足更跼。邊封鳴狐狸。牙爪貴鷹犬。儒者非所須。棄置自未免。上書報聞罷。試吏何繾綣。雖無小官羞。頗貴有道卷。洛陽雄王都。主簿亦極選。折腰得免否。局促時態淺。

閱武堂

涼風卻炎暑。飛雨除氛埃。旅行得興會。珍館爲我開。主人平生舊。上客自遠來。何異東序賢。共此中山杯。留連恨落日。披寫仍高臺。山川愴興廢。歌舞寄歡哀。徐方多賢牧。天祿繼英才。遊子悲故鄉。爲君更徘徊。寄張十二時在城北讀書簡云幾至絕糧

新秋意無聊。多病時畏晚。出門塵埃隔。扶杖行步蹇。雖聞一城居。邈有千里遠。風雨思雞鳴。幽懷固繾綣。食貧非余病。學道與時反。悲歌空相望。不復能裹飯。

因甫移宰晉陵

自我游毗陵。五年今于茲。未嘗不閱雨。未嘗不苦饑。成湯周宣世。豈復能過斯。上無桑林禱。下無雲漢詩。赤子餓溝渠。良田生蒺藜。聽于閭里間。愁毒不可爲。思得一賢人。救其渴與飢。上天似悔禍。子乃今來尸。愛民在恭儉。自可爲吏師。但恐百里小。膏澤難盡施。子本湘鄉君。湘人望子來。下難兄弟別。上顧墳墓違。將母以諗君。上書再三辭。朝廷欣然許。多士咸謂宜。爲政推此心。可令孝者慈。吾聞屠牛刀。不貴于割雞。思君苦道遠。莞爾寄此詞。

同彥文送敦儒宰晉陵

朝廷貴儒術。子以文學顯。郡國重民社。子由政事選。榮名信難兼。衆望固不淺。古人定何如。壯志獨能勉。由來跬步益。必有千里遠。去去聆絃歌。吾當謝言偃。

九日

霜薄氣早寒。木落景已變。佳晨事厭勝。習俗推往彥。憂來初無方。興盡復自遣。所遇無故物。登臨殊非願。

寓言

感豫常出異。禦寇哀壺丘。好大固累己。巢父笑許由。東海有意怠。飛飛何所求。縱軀天地間。細故紛悠悠。

願言不死鄉。可與賢達游。

晚景

結廬玩蓬藿。反畏人足聞。杖藜有時去。入獸不亂羣。疎雨洗徂暑。夕陽澹微曛。俛仰多物態。逍遙遣塵紛。興適將何述。寄心孤飛雲。

野人致枸杞青蒿

味薄時共笑。野人猶相高。春田有餘暇。饋我杞與蒿。酌酒謝其意。採之亦誠勞。城中多好事。過半稱賢豪。杯肴具五鼎。珠玉輕一毫。將之獻門下。皆有千金囊。何故背此計。而反從吾曹。淡泊徒自樂。膏薌未能叨。信知老農美。頗欲耕東臯。因閒有餘力。從爾觀芟薶。

春暮到小園

春餘百芳歇。喬木有輕陰。客子成春服。商絃應鳴琴。獨行迂世俗。長往期山林。庭竹風正駛。池波雨已深。臨流窺躍魚。倚杖聆遷禽。順時寄俯仰。適興契飛沈。試謝及門客。未慚招隱吟。

送雅禪師若神

太湖三萬頃。澄澈浮寒穹。明月不可取。孤帆安所窮。俯弔滄浪人。禪師若神與。蘇子美遊。子美自作滄浪亭。緬懷鷗夷翁。古今共灰滅。得失如夢中。詩興觸物遠。禪心隨念空。猶多碧雲句。寄信東南風。

蒼筤源

日出江氣暖。步行村落閒。偶逢蒼筤息。若在山中閒。綠篠旣蒙密。清波自回環。初疑人迹絕。久有笑語誼。脫足涉澗水。隔林叩柴關。主人疎世事。相見亦歡然。稍覺耳目曠。久之遂忘還。歸來詫舟子。適過武陵源。樂郊陳漁臺。下柏林中結茅作小亭。命曰幽素。本懿臣刑部之書也。謝且戲之。結茅更何好。列柏自成林。素履宜獨往。幽人欣宿心。炎輝翳羽蓋。清吹和瑤琴。稍與事物遠。忽如丘壑深。良無山水趣。安得契知音。

種蔬二首

時雨破膏壤。荷鋤回城陰。疾耕意不足。覆隴力可任。里巷多父兄。往來迹相尋。見我山野服。欣然用盍簪。勸我勿滅裂。哀我識浮沈。雖微生平故。頗用愧其心。採芝商於嶺。食薇首陽岑。念我非其人。豈敢慕山林。聊以資素飽。身世實崎嶇。丈人不我厭。荷蓀時見臨。種蔬南岡下。地薄旱亦久。抱甕出復入。拮据病兩手。輟耕起長歎。四海萬億畝。過亢今若茲。我誰與餬口。縣官祈雨澤。四望已並走。巫女歌且舞。土龍矯其首。上天何寥寥。百請未一偶。霖雨待爾輩。古人亦可醜。咄嗟雲漢詩。萬古竟何有。天地何不仁。百姓爲芻狗。

重陽

勞生惜流陰。徂歲逼窮律。燦燦黃菊花。離離紫茱實。芳香不可再。采掇自有術。零落勢足悲。盛時亦未失。登高散百慮。驅馬恣所出。或云避陽九。可以納元吉。嘉願誰間然。且當醉終日。

浚井

鑿井勿憚深。汲繩欲令長。鑿深源不竭。汲遠氣自涼。豈如潢汙水。汨汨道路旁。雖復不遠求。飲之劇燖湯。虛煩生四支。澳涩不自強。呼語合爲國。願君著巖廊。

古寺

唐殿弛棟梁。空庭長荆棘。坳堂客水腥。壞碣苔蘚積。經營東晉始。遠近千歲逼。興廢紛可悲。徘徊意不懌。尙餘土木巧。未露斤斧迹。使鬼固已勞。斯民忍終役。悠悠競頽波。擾擾非一國。臺城更荒唐。萬古共悽惻。

書候潮亭

滄江浸長空。天使限南北。繁陰屬暮歲。波浪無時息。烈風何轟豗。深木騰霹靂。遠吹湖中白。來蔽江南碧。巉巖千峯玉。變化不可測。恐是時向晚。鬼神任胸臆。燭龍銜長耀。來集崑嶺側。又疑吳王兵。如荼壓上國。勇氣吞中原。晶光洞江北。久望生悸慄。嗟我問津客。橫流豈難制。路險未可得。吾道固當然。滔滔欲誰易。

徐安撫

伏波喜功名。南伐終不返。死餘薏苡謗。生恨鷓鴣晚。干戈非一方。智勇易謀顯。富貴誰不然。枯榮子何反。冥冥炎州隔。杳杳天道遠。荆楚猶古風。招魂動哀挽。從人除憂謗。不得志者罕。

石首縣

叢石浮水中。峻隄缺復連。往往爲深潭。波流自回環。秋山未搖落。碧樹皆參天。仰觀積水痕。仍在高樹巔。

里人半巢居。出入隨烏鳶。令尹亦菜色。市樓寂無烟。皇天不純命。百姓何震愆。苦云耕織廢。租稅尙未蠲。赤子向漂蕩。所存皆偶然。雖知負官輸。未忍更棄捐。奈何唐堯世。復見昏墊年。何以救汝飢。朝廷急憂邊。

召諸弟博飲

今日寒頗甚。淮南似京土。江風旣落木。山雪亦帶雨。幽居自無聊。病臥亦寡侶。壯心願牢落。出門孔多阻。古人戲臯廬。志氣本尙武。勝來在快意。百萬不足數。恨無酒如澠。杯盃空屢舉。開顏強隱几。豈必歎貧窶。

別和弟

暫會復遠別。惆悵終無極。人生非神仙。豈有頭不白。維舟相邀宿。淮水風浪黑。輾轉不復眠。四聽人盡息。丈夫非懷安。少壯宜努力。況子行多歡。自怪情不懌。誰言冬宵永。達旦才頃刻。雞鳴日光出。握手各南北。仰謝雲中鴈。羣飛接羽翼。何以紓我懷。作詩寄相憶。

舟中夜飲憶和弟聯句

人生如浮雲。聚散苦不定。原向來詩酒歡。雖唱誰與應。貢蟋蟀鳴在戶。玉衡逼冬孟。悠悠千里思。寂寂中夜靜。豈曰無他人。不如我同姓。原吁嗟繫名利。有若置機穽。窘然塵埃中。恥無六翮勁。訪戴舟已慚。攀嵇駕難命。貢臨觴置不飲。引領起獨詠。莽莽天地昏。誰知我心恹。原

蘇安上之淮南十八舍弟之河北十九舍弟之漢中皆會予賦三韻爲送

攜手常苦難。傾蓋不易得。今宵四面坐。明日異鄉客。秋風楚懷悲。出處各努力。

鳳凰管贈府公給事別

鳳凰起北海。少留南嶽巔。梧桐有餘音。烏鵲相回旋。耳聞和聲樂。目怪文采鮮。雖知非儔匹。慕用亦欣然。祥鸞卷層雲。迅羽凌九天。卑飛忽如縶。絕迹不可攀。徘徊故林下。歎息高風前。願及夔作韶。率舞如舜年。

承以鳳凰篇爲況謹用來韻和酬吳育和作附

丹山鬱世表。巖巖千仞巔。自非常雛輩。安得參周旋。胡爲此弱羽。越籓祥儀鮮。飛鳴過所據。鸞駭俄翻然。退則安棲地。翔風娛楚天。始病孰儔侶。乃與朱鸞攀。英英日相照。老翮徒愧前。少別正傾聽。覽輝當聖年。

深甫往固陵

聞君異鄉客。歲暮江淮間。山雪夜多興。桂枝春可攀。南風玩諧竄。浮俗矜游閒。安所彈長鋏。何當問刀環。天倫眉最白。子舍衣仍斑。勿學髡接輿。佯狂因不還。

飲郇公園贈章湖州何漢州

朝暉散浮陰。天氣清且佳。春城足行樂。况此公侯家。珍館深窈窕。茂林揚芬葩。幽禽囀新聲。宿草含芳芽。覽物曲池平。置酒白日斜。因歌雍門詩。四座皆歎嗟。平生布衣願。不過東陵瓜。致求多贏餘。竟是迷紛華。一醉稱日富。此風獨可嘉。安能拘浮俗。局若井底蛙。客有章與何。高冠耀文縞。方爲二千石。會促別且賒。他日還相思。當在天一涯。歡極情難忘。願君盡流霞。

雪後到薦福寺梅下

行尋殘雪遠，暖就梅陰坐。悟彼寒氣消，識此春景破。留僧迨日暮，聽鳥忘巾墮。從此到芬芳，應須數來過。

呈獻臣并序

始四月，予來上清宮，見石榴花方盛開，已而復有青箱、忘憂、紅絲、夜合、蜀葵、朱槿、芙蓉、蒲劍、紫薇、紅蓼、金錢之屬，相繼不絕，而適及秋矣。過此又將有雞冠、拒霜、黃菊，爲續。豈神仙之居，固自嘉哉。因歌以寄獻臣。

茲心厭囂冗，幸與上清鄰。上清何崔嵬，高靜遠飄塵。珍林散玲瓏，寶氣浮氤氳。綠華未及衰，絳蕊忽復新。閒館賓列仙，祕殿朝衆真。濃香無停期，豔彩驚幽人。願謝武陵子，四時長見春。

寄吳江大博徐君章

吏退簿書斂，日落風景涼。偶無事物累，真得逍遙鄉。疎花媚空園，脩竹蔭廣坐。濁酒不難醉，磐石可徑臥。何必凌江漢，乃能濯埃塵。何必潛山林，乃能寄隱淪。人多笑此言，此言未易笑。非君契心賞，誰肯過蓬壺。

觀魚臺

城下春池深，潛魚時復躍。高臺可以望，暇日從爾樂。散懷混飛沈，適意宜丘壑。始悟濠梁翁，荒唐謝名爵。府公射堂飲，酒輒陪尊丈。侍郎兼揖諸孫，拜獻拙詩。

煌煌南極星，粲粲北維斗。稟齡瑞明時，運柄變萬有。降神非尋常，希世曾一偶。積善如公家，于今見純佑。

安車告歸日。三府升平久。萬石均祿秩。魯公拜前後。茫茫周漢來。此事復聞否。黃金鑄大印。綠絲綰長綬。方爲累世榮。況多後來秀。戲禽試強弩。勸客滿春酒。賤子敢再拜。願公更眉壽。

秋陰

浮雲初無心。已南復更北。蕭蕭清風急。忽忽白日匿。時逝物稍變。感集意鮮適。玄蟬號庭樹。蟋蟀吟四壁。自古共此悲。豈伊越鄉客。

久陰

南方信卑濕。風雨無時節。春風仍晚寒。陽和恐中絕。蛟龍乘江湖。雲霧欺日月。驅除懷熏風。悒悒生內熱。

蟋蟀

七月鳴在野。八月鳴在宇。九月登我堂。十月入床下。滔滔歲方晏。促促聲亦苦。悲秋不悲己。終夜如獨語。時俗有新聲。誰能一聽汝。

送王十二還乾州

窮通蓋有命。富貴不能早。君侯希世珍。三十未爲老。棲遲升斗祿。奔走周秦道。及親固爲榮。捧檄豈辭小。北風正凝霜。千里徑無草。人生貴感激。豈以外物擾。當爲昂藏駒。勿自使枯槁。

坐嘯亭納涼

長嘯振林木。半空鸞鶴聲。清風蘋末來。孤月海上生。坐久物色改。如有神仙迎。

王昭君

嬋娟巫峽女。秀色傾陽臺。昔爲一片雲。飛入漢宮來。明鏡徒自妍。幽蘭誰爲媒。丹青固難恃。遠嫁委塵埃。十步一反顧。百步一徘徊。出門如萬里。淚下成霰摧。左右相娛樂。絲竹聲正哀。豈不強言笑。鬱鬱不可開。黃河入東海。還從天上回。嗟爾獨抱恨。一往擲蒿萊。

重一首同聖俞鄰幾持國作用前韻

昭君信絕世。窈窕祕瑤臺。歲華坐將晚。玉輦何當來。一以畫爲賞。有如鳩爲媒。含悲下紫殿。卽路指黃埃。光豔動左右。君心再徘徊。白水不可變。孤芳從此摧。盛時能幾何。千載獨餘哀。至今青塚傍。積怨昏不開。掖庭用色選。丹青以利回。寄語閨中子。何憾處蒿萊。

憶松

松陰何婆婆。松蓋何偃蹇。松香不堪折。松色無可選。且暮青松間。吟懷未嘗遠。嚴霜百木死。高秀初欲展。泠泠海風飄。輝輝甘露沍。昔年予居閩時。甘露降。去矣混塵滓。懷哉邈林巘。諒無刀斧憂。千載行可踐。輦轂念山海。誰期共攀蹇。獨有風入聲。琴中尙悠衍。

留侯

張良韓孺子。夙昔志未伸。授書黃石公。問禮倉海君。契合見神助。濟時効經綸。指揮轉雷電。顧盼定楚秦。以彼三寸舌。抗茲百萬軍。一爲帝王師。晚就赤松賓。富貴心不屑。功名諒誰論。出處何昭昭。賢哉古之人。

錄近文呈晏公

麟趾感素文。躍魚赴鳴琴。殊類豈自識。至和動其心。濟世有先覺。鑄人不鑄金。刪詩在正始。好樂非好音。萬生依陶冶。一氣諧飛沈。賤子晚及門。獨學謬知今。趨隅誦所志。踴躍不自任。救渴而飲河。栖枝以巢林。量微志復小。俛仰感高深。

讀晏子春秋 井序

世譏晏嬰之節。偏下。夫晏嬰大不治宮室。細不治冠帶。無衣帛之妾。則信儉且陋矣。至其脫左驂以濟越石父之困。出倉粟以成北郭騷之孝。又何其裕哉。世之君子。未嘗道其裕也。而獨病其陋。是以宮室則必修。冠帶則必麗。陳妾則必富。所惡陋于己者。從矣。所能裕于賢者。誰哉。吾聞陋于己。裕于賢之謂儉。陋于賢。裕于己之謂吝。晏子固儉矣。于聖人之道。何貶焉。

平生實善交。厚薄等新故。解驂濟越石。調祿謂車御。猶稱禮偏下。未免儉則固。高風往既息。頽迹後方驚。陳妾輕綺紈。賢士敝襦袴。若人不重得。遺論今始布。吾亦太史徒。執鞭所欣慕。

公是集卷八

五言古詩

以近文投謝學士

自昔周旦死。珍鳳闕空巒。民斯未嘗見。猶取圖象觀。況彼聖人沒。衆說紛無端。能言拒楊墨。豈祇均遺鸞。念我生苦後。讀書樂瓢箪。潛精探遺文。倣象良云難。猶如琢圭玉。攷法求所安。雖無繩與矩。我知不爲丸。凝誠矢弗變。勢利非攸歡。譬于寸木微。積久能巒岏。有羽必懷聳。有聲必希彈。方期沐清德。敢不振斯冠。

答吳冲卿學士

人生若浮雲。聚散不自知。昔與子相逢。綵衣汝水湄。兩家賀羊酒。道路生光輝。變故一朝革。各在天一涯。我病陳蔡間。固窮莫自持。君爲周南居。流涕極所思。日月忽已改。舊游不可追。豈悟羣玉峯。攜手如素期。感愴從中來。當歡反成悲。求友聆嘉音。喟然見新詩。廢學老將落。積憂志益衰。俛仰諸公間。嘿嘿慙見嗤。子我平生交。夙昔聆箴規。相愛當見勗。勿同衆人爲。

寄朱三學士

憶在京輦居。相與巷南北。幸非勢利合。同有春秋癖。往來熟杖屨。假借通經籍。誰謂數斯疎。要云諒且直。

別離淹日月。寤寐見顏色。惠我以好音。欣然對真迹。微官事如毛。徇俗頭欲白。庸知尚可教。願子更良食。

送李繼學士請示江韓諸君

我醉闕門外。臥備東藩臣。君從天上來。秀色落青雲。留連三日語。多得所未聞。僻陋不自知。喟予久離羣。南風吹白沙。六月天晝昏。送行不盡境。引望空復勤。相識何必舊。白頭或如新。有信當寄書。毋遺傾蓋人。

今日

今日風淒冷。始覺陰氣繁。白日無光彩。未敢啓前軒。卜居止容膝。他時用爲嘆。及此殊覺勝。閉塞有餘溫。撥棄當世慮。縱觀上古言。禹稷稱櫛風。孔顏樂閉門。窮通或相背。勞逸足自論。優游蓋卒歲。達者嘗有言。

送李才元

車馬何赫奕。觀者更歎息。富貴歸故鄉。任州二千石。賜金爲親壽。衣錦供子職。里閭納華駟。公堂列嚴戟。地兼百城會。衆有萬戶籍。指攜吏奔走。宣布民悅懌。丈夫雖非通。豈負稽古力。懷章過故人。笑別見顏色。吾徒若匏瓜。長繫慙不食。贈君當何言。有信勉相憶。

送焦生

蒼鷹懷風雲。六月不忘習。寒蛟待雷雨。深水聊自蟄。多君起江湖。力學如不及。擇師視洙泗。履奧窺所立。翰飛自茲遠。變化誰能繫。孤劍屢感激。四方慎翔集。公子誠愛客。相門許長揖。結轡因北游。揮手謝朋執。藏書就史氏。觀國榮天邑。籍甚諸公間。青紫亦可拾。寧復悲歸來。眷眷兒女泣。

聖俞受詔行田是時聖俞葬其弟公異未畢而去

蟲潦敗耕耘西成絕人望鄉農籲天意守闕書屢上憂民聖天子擇吏賢宰相王畿蓋根本歲賦在寬放
曰君往行田究彼荒稔狀一當薄其租用以息民謗朝廷慎指使推擇無與讓非君精明姿曷以致忠諒
憂公劇私爲卽夕治行仗懷悲念其弟卜日不果葬乃知體純粹世士難以尙德澤旣敷宣風謠還歷訪
歸來悟明主自致誰云妄

張老子出田所

魯人有林類底春獨被裘沿畦拾遺穗帶索仍長謳知命忘其老樂天固不憂旣驚端木賜復感東家邱
夫翁何爲者歲暮亦遠遊北風吹白髮蕭颯田隴頭此意如昔賢世人知爾不

同聖民園棋釣魚

山林自微尙軒冕非所營每及逍遙趣欣然得吾生春塘漾綠水珍樹啼黃鶯心遠忘外喧境幽識人情
垂釣如有求而無得失驚臨局非期勝聊爲白黑爭得意物可遺忘言賞逾精此理俗鮮悟固當屬淵明

秋園晚步

秋物足悲咤丘園良考槃翺翔櫺結慮徙倚縱遐觀爽氣使心厲淒風令自單酸念無逕託那使百憂寬
鳥下見人寂蟹啼知露寒夕煙起城際反照映林端竚立不能返迷懷增屢歎

競渡

三閭雖已死。郢人獨見思。五月江水深。遶城碧瀾迤。輕舟爛龍鱗。利楫劇鳥飛。簫鼓駭蛟龜。鷹隼亂旌旗。爭先愛中流。觀者被水湄。漠漠懷沙魂。一去不可追。千載萬歲後。兒女以爲嬉。已矣國無人。終焉莫子知。

讀離騷

空庭衆囂息。風葉獨紛紛。秋期此時改。感歎坐黃昏。遠懷靈均子。著書爲平分。念爾剛直心。吐茲清麗文。上嘉唐虞世。下悼商周君。能與日月爭。不能卻浮雲。浮雲蔽日月。歲暮奈憂勤。精誠誰謂遠。恍惚若相聞。

秋過臨波亭寄陝府資政給事

不復池上遊。秋意忽已繁。臥柳半死生。枯荷自翩翻。憶昔載後車。逍遙臨中園。觀魚有縱辨。運斤契忘言。豈獨歲月晚。正傷離別魂。人遐室空邈。幽興誰與論。

讀聖俞我今五十二詩感之

子真神仙吏。不識傷別離。忽逢舊交歎。始悟人間悲。歲月流水逝。富貴浮雲馳。徘徊撫往事。感激吐新詩。流水難以追。浮雲難以推。百年半如此。萬事從可知。且欲拂衣行。聊及鱸魚期。君若變名姓。相逢復何時。

上嶺下嶺

上嶺惟恐遲。下嶺懼顛覆。一嶺但數里。思慮千盈腹。不聞二大夫。致身未嘗辱。

送袁同年殿丞陟通判撫州因還洪井舊居袁在朝數上書言當世事某與袁別十年矣語舊多
可悲者留三日乃去

輕舟何翩翩。斲冰浮清川。問之亦奚樂。歲宴道且遄。云我大梁客。游說萬乘前。畫策不見收。故鄉復言旋。薄祿及吾親。就官若歸田。名實兩有適。遠近誰間然。憶昔都門別。爾來彌十年。蒼蒼豫章質。更覺摩青天。語舊或涕流。舉觴愧留連。相從且未果。使我心勞悁。

送裴殿丞

君已頭髮白。猶著五綵衣。出門我意失。贈別雙涕揮。自古不擇祿。念公早旋歸。天歡固爲樂。外物焉足希。達矣老萊子。千年見餘輝。

裴殿丞訪別說春秋期歲初復來

吾衰不夢周。知我在春秋。斯道宜未墜。夫公能見求。相看頭可白。感別歲空遄。念子期雞黍。毋懷汗漫遊。
殿丞此君好道士攝生之術

送雍秀才歸瑯琊山

希聲未易合。皇華衆方笑。與子東西人。相逢偶同調。億年寄神解。萬里在心照。此間豈容言。吾得安蓬蘚。煌煌千金珠。舉世矜賞好。安知緯蕭翁。棄置久高蹈。盛論山水趣。局促恨未到。江湖且相望。送子一長嘯。

鳴禽

朝日升屋梁。喧禽鳴樹巔。東風不相期。自與春意旋。振衣起前庭。天色綠窅然。非煙颺微和。目極相繇繇。行尋林間步。萑英已可攀。萬物在陽舒。胡爲慘不歡。幸有二三子。采芳玩華年。不及古之人。幽懷聊復蠲。

驚禽

幽鳥何所託。高棲衆林端。風巢雛穀危。露葉毛羽寒。半夜吐明月。驚鳴遞囂譟。迎光怪焚巢。顧影疑飛丸。何爲貪擇木。通夕不自安。乘高非爾謀。宜下易所觀。不見丹穴鳳。深居全綵翰。

八角井

誰鑿八角井。不方亦不圓。此地饒美水。此井獨苦泉。泉甘常早竭。泉苦更永年。浪得世上名。對之還慨然。

雨過張先生

稟生本迂闊。習性益疎懶。遇境賸欲留。得人輒迷返。先生老鄉曲。素髮頗樗散。相遇年已忘。心親禮逾簡。幸無富貴憂。時可青白眼。驚呵左右人。邂逅以繾綣。初隨朝陽出。忽報山雨晚。天路良幽艱。歸途失平坦。

寄公默先生

昔賢避言色。先覺如觀火。作者有七人。清風緬遺我。浮俗滋缺缺。羈人畏瑣瑣。知言豈易值。卷迹恨莫果。所願學孔子。無可無不可。寡過知未能。同聲賴銘左。

恩賜御書呈同舍諸公

聖神紹先古。述作備新書。微生濫中祕。重賜等諸儒。日月明天文。龜龍粲河圖。精神駭耳目。黼藻賁泥塗。發揮篋中藏。更得神宗初。光華混新舊。筆墨肖錙銖。幸生堯禹間。而見典與謨。上爲四方賀。善繼古所無。下竊私室榮。摺紳誰與俱。漢史探會稽。周臣覽崑墟。蕭條千萬里。筋力固已劬。而我獨何人。荷寵安厥居。

受學庶無負。傳家既多餘。願從二三子。講誦無時虛。

與景仁聖俞飲景彝西園

鬢髮今日白。山林未能往。每逢負郭趣。嘿有歸田想。置酒松柏間。當春更蕭爽。欣欣二三子。相與留一賞。早花何娟娟。秀色傾宿莽。馴禽聲喧呼。永不忍羅網。物情樂于適。未必在深廣。育育井中魚。胡然困偃俠。佳哉主人翁。示我以天壤。放懷寓一醉。益愧鳴佩響。園井中有魚數十頭

送懷安李使君屯田

汝穎多奇士。磊落布方冊。先進存古風。若人復令德。詩書秀英華。鷹鷂勇排擊。曩者從軍行。早聞平戎策。縱橫志未展。慷慨意更激。坐驚齒牙脫。忽使頭髮白。頗與嵇阮同。閉關以藏迹。老驥甘道路。黃鵠羞斥澤。復持一麾去。堅取萬里役。旌旗暗長亭。已想蜀山碧。鼓吹喧前除。稍知楚風易。專城自足貴。遠覽固多適。胡爲結離愁。恨此晚同得。

題賈大夫射雉圖

控弦誰家子。馳射落名輦。傾城絕代女。巧笑揚脩眉。覽古按圖畫。悵然增我唏。壯士不擊賊。願從兒女嬉。威弧無用世。反事禽荒爲。嘿嘿千歲後。正爲來者嗤。

示張直溫

築山必使高。鑿井必使深。百工戒淺近。盛德羞浮沈。焉有尺寸枝。能棲垂天禽。焉有升斗泉。能容橫江鱗。

借茲諭物理。足以開君心。隘在容不足。弱在力不任。大道如路然。固無古與今。

臨淵亭望鳳凰等山作

孟公多勝詣。故在杯酒間。雖非菊花時。輒復尋龍山。平明騎馬出。日暮倒幘還。若人難重得。此風猶可攀。問我亦何爲。翛然方閉關。忘言在得意。獨往路已難。

聞隱直欲調官

蛟龍居池中。仰活數掬水。虎豹離山林。求食輒搖尾。張君宜大用。亦是龍虎比。何得圖小官。折腰五斗米。屈伸蓋時命。隱顯乃君子。譬由合抱材。當自毫末起。昔爲青雲高。今落塵土裏。可嗟復可驚。誰能叩天耳。

津亭

西風豁愁陰。天水兩涵泳。微波蕩寒日。極目萬里淨。離披蒹葭老。蕭瑟原野迴。物容驚客懷。櫓聲動歸興。倦游髮恐白。多慮身復病。緬慕蒼梧雲。無心自輝映。

和持國登開寶寺上方院寄孔寧極崔象之孫曼叔

重山抱城起。清川帶野回。深嚴古佛寺。巒嶂聳高臺。此地宜眺覽。冠絕都城隈。遠近見千里。令人心目開。憶在七月中。丞相自魏來。百官迎道傍。休騎茲徘徊。衣冠相勝凌。塵土如炎灰。我隨衆人趨。出入再歷階。不得及此時。披襟濯氛埃。至今意耿耿。負愧不可裁。邇來讀君詩。足慰平生懷。忽如升其巔。四顧心悠哉。往者不可及。信陵久已頽。來者不可見。孔侯與孫崔。古今殊茫茫。慨嘆成歡哀。會復從君遊。于焉謝崔嵬。

臨波亭飲席贈徐二

華星爛長天。明月被清池。良景豈易得。佳賓共在茲。形骸久相忘。卮酒安足辭。高歌激風颯。宜笑散春暉。中置浩長歎。民生信多爲。非無逍遙鄉。固在閒暇時。及爾不快飲。歲月忽欲馳。世事紛悠悠。放言爲吾師。

送張四隱直遊邊

吾昔讀漢書。遠嘉馬文淵。慷慨有大志。不辭走窮邊。嘗言功名期。當及少壯年。生圖萬里勳。死裹馬革還。此語頗豪蕩。書之在青編。其人雖已亡。其意猶凜焉。羌戎未伏誅。王旅多喪偏。安得如此人。西行隴與汧。借籌資方略。還爲天子言。海上惟歎息。今時豈無賢。忽聞張公子。奮起殊欣然。歷覽涇渭旁。究觀敵根源。寧復謝古人。正堪豁憂煎。衛青出行伍。去病幸有天。相繼取封侯。有若翻手間。男兒誰不如。可得甘棄捐。讀書反三黜。何用師孔宣。我豈少游徒。規規守鄉田。力弱非志弱。送君心長懸。

同貢甫詠丁晉公園池

一死復一生。一虛復一盈。猶悲門易軌。况乃谷爲陵。曲池久蕪沒。高屋尙崢嶸。自古若傳舍。毋爲方歎驚。

送韓七寺丞知蕭山原註韓穎川人兄弟八人皆仕宦顯名

君家穎川上。時論數八龍。聲華自照映。遠與高陽同。季慈又青出。秀氣凌秋空。安步可遠到。何爲菰蘆中。會稽自禹來。山水天下雄。古人每獨往。勝事殊未窮。聊欲因弦歌。登臨極江東。超然語高邁。令人媿樊籠。我昔更此邑。稚年尙兒童。邇來成夢寐。自笑成禿翁。安得方寸金。換君腰下銅。越吟不自然。極目南飛鴻。

初夜

汲汲晝彌短。悠悠夜增長。貧家不具燭。坐須明光春。隱几四寂默。陰蟲鳴我傍。天時有推敎。物性隨悲傷。感彼忽自驚。喟然發心狂。壯年何所成。憂患攢中腸。咄嗟牛衣叟。婦女知激昂。國恥吾亦羞。如何埽封疆。譬如籠中禽。左右不得翔。知音古亦稀。誰謂歌中商。

靜夜

花影不可埽。縱橫月明中。光芒裏新露。香氣生微風。夜永興不淺。幽人與誰同。

迎恩甫

相別才一月。相憶如一年。豈無白首游。不及夫子賢。邂逅發寤寐。奮飛絕由緣。忽聞乘春浪。千里下歸船。鷄黍可以具。班荆暢幽情。

公是集卷九

五言古詩

雨中獨居有懷江梅

晨起風雨交。蕭蕭秋意寒。出門無所詣。行道如此難。思我平生游。相得他日歡。興來未嘗約。趣合不待言。濁酒有與醉。孤琴能一彈。時時商聲歌。磊落千琅玕。浮雲歸無期。宿草秋向殘。獨咏雞鳴詩。一唱三四歎。過聖俞讀其近文明日寄之。

昨日過君家。雙瞳偶清刮。非無塵俗累。喜見秋陰豁。注瑟請新聲。瑤音邈超越。神驚自束躅。不爲天寒發。

憶梅

豈無棟梁材。爲君構明堂。豈無調羹資。爲君致烹觴。獨使限荒鄙。委之道路旁。歲晏吐奇秀。芬芬有餘香。疾風見松柏。衆穢知蕙芳。譬彼君子質。幽沈道逾彰。安得假神術。徒根儷長楊。遼哉計不果。我心不能忘。

傷胡二

人生期百齡。子適四之一。人仕期萬石。子適升斗秩。稟靈甚純粹。守道復貞吉。無負于神明。如何有倉猝。雖登爵一命。亦治邑千室。名竟未達君。澤亦不被物。鬼神莽無狀。天道眇難詰。冥冥九原深。永與顏賈匹。

觀永叔五代史

大均運元和萬物分一氣。相雜以成文。自然故爲貴。道衰三王末。議出百家沸。仲尼日月也。薄食爲之既。春秋曰筆削。天地復經緯。大法初粲然。亂臣以爲畏。微言迨秦漢。變雅從晉魏。逐末競錐刀。澆淳玩花卉。安知述作本。庸識文章意。中間馬與班。二子稱髣髴。猶云崇貨力。尙或排剛毅。才難乃其然。可以長歎歎。退之不爲史。于道其猶未。胡爲體明哲。曾是回怨誹。國典竟蕪雜。唐風亦隱匪。陵夷九易姓。禍亂森如蟻。儒術駭中絕。斯民遲攸暨。紛紜混朱紫。清濁誰涇渭。龍飛真人出。虎變斯文蔚。天意晚有屬。先生拔乎彙。是非原正始。簡古斥辭費。哀善傷獲麟。疾邪記有蜚。處心必至公。撥亂豈多諱。何必藏名山。端如避羅罟。曰余仰爐冶。有意自剗荆。踵門投耒耜。假蔭親蔽芾。所望窺冊府。無寧辱賙餼。狂者實進取。日中固必費。飲河雖非量。滿腹尙自慰。演孔幸受經。居齋竊忘味。

寄張拱辰

楚人少眉壽。此翁七十餘。荆士多輕揚。此翁乃好書。世醫悅膚淺。此翁識古初。習俗爭錐刀。此翁尙玄虛。數欲見此翁。爲其亦起予。責人必求備。堯舜猶病諸。漁者公閱休。逸人狂接輿。有之幸見告。我且從彼居。休輿比楚人。

竹牀

櫛櫛裁脩竹。熒熒粲寒光。浮筠凝煙霧。疎節留雪霜。甘寢百疾解。側身夏日長。此時四海波。亦已如探湯。

嗟我智慮短。苟爲安一牀。

哀三良詩并序

秦風有哀三良詩。刺穆公以人從死。後王粲作哀三良者。興曹公以己事殺賢良也。陳思王亦作之者。怨己不及死者也。吾以哀三良仍有餘意。猶可賦詩。故復作焉。當有能知者。

士爲知己死。女者悅己容。咄嗟彼三良。殺身徇穆公。丹青懷信誓。夙昔哀樂同。人命要有訖。奈何愛厥躬。國人悲且歌。黃鳥存古風。死復不食言。生寧廢其忠。存爲百夫防。逝爲萬鬼雄。豈與小丈夫。事君謬始終。馬生自汝南來。求入太學。不得請詩以歸。

士貧謀國拙。安得辭泥塗。馬生負長劍。嘆曰歸來乎。尺薪等芳桂。斗粟兼明珠。王門不見容。憔悴如枯魚。我無升斗水。慰子朝夕須。亦有西江濤。路遠不可圖。相勸早旋歸。詩書自爲娛。男兒患無術。餘事從卷舒。時至當奮飛。翩如巢中雛。微物尙變化。況君七尺軀。

詠史

主父希世者。畫策妙縱橫。指麾一言用。震動諸侯驚。日暮臨遠塗。中道方倒行。不忍藜藿食。竟從五鼎烹。寧知鹿門翁。白首長躬耕。天下非所保。功名安足營。

入荆江

此江自岷山。浩瀚浮西極。中爲三峽東。壅闕氣憤激。崩騰得平地。千里怒未息。雖投洞庭闊。爭道猶逼窄。

觸岸皆倒流。勢兼萬牛力。渾黃不可鑑。咫尺蒼玄白。頗似崑崙流。洩源下積石。逶迤屢屈折。九曲乃大直。始信枉渚歌。至今猶悽惻。中流忽沙沸。慘慘半江黑。俄頃成丘陵。方舟渡安得。坤儀理專靜。何故輒損益。多異真窮鄉。所逢豈中國。墨生忍黔突。孔子不暖席。賢聖亦遠遊。吾寧倦行役。

和鄰幾持國景德寺納涼

四時急相乘。五月大火中。天地爲熾爐。萬物皆沸銅。吁嗟望雲漢。長嘯懷清風。覆載雖厚高。跼蹐似不容。蚩蚩道傍子。奔走勞厥躬。外以塵土傷。內爲利害攻。狂醒無由濯。勢與羣物終。安知道遊遊。采真得所從。寶宇豁高巖。劇談叩真空。虛白從中來。清涼脫樊籠。惜哉但獨樂。不與斯人同。作詩寄妙賞。藐若凌青穹。依隱或玩世。詭時在不逢。三復金玉音。曠然已發矇。

送劉初平謁會稽范吏部

劉生大梁客。五十恥獨醒。觀書汎爲通。不肯明一經。壯歲懷慷慨。邊游忍伶仃。擔簦售白璧。垂蒯提青萍。歸來面朝士。口寫出川形。公侯盡高意。禮數爭分庭。落魄破小節。浮遊謝塵冥。談諧若流輶。捷勝如建瓴。荏苒混朝市。繽紛邁年齡。有云致官爵。百說無一聽。二子才劍峽。衆豪固螟蛉。以茲滯玉帛。亦不差巖坰。太尉辟開府。夏竦也。中丞請居廷。孔道輔也。拂衣東南走。高揖千巖青。禹穴發窮寶。雷門叩驚霆。邦侯萬人傑。憂國心無寧。得善輒解榻。發奇肖開矚。抽辭肯聽瑩。宴舊方淹停。箸下進醕酎。鑑中結飛舲。高哉鴻鵠心。去矣窮滄溟。

謝主簿示雜文

少不學爲吏。僮俛亦非良。終日簿書間。忽疑鬢髮蒼。無聞畏後生。素習成兼忘。吾子豈獨迷。相從道文章。上論聖賢心。下救世俗荒。磊落古人風。粲然在我旁。精葶眩日月。爰居惑鏗鏘。置此但爲好。切磋非所望。

開元寺寺在汝寧府本顏魯公眞卿舊居

自古皆有死。豈惟直如弦。魯公旣中天。狂寇不獨延。茲寺數經亂。叢林廢爲煙。若人昔所居。故老廣其傳。直氣觸白日。沈憂凌青天。悠悠穹壤間。肯與蛛蟻捐。事往理冥漠。悲來涕潺湲。作詩識其處。尙想音容全。

漢武帝二首

武帝固英雄。總孽皆軼材。南并桂林地。北守單于臺。軍費累萬金。馬迹窮九垓。時獨卜大夫。規規輸其財。忠義豈不然。告緡自此開。茫茫文景後。田野卒汗萊。孰謂將相謀。竟貽黔首哀。晚悟富民侯。後時信悠哉。洪波漏金隄。河伯獨不仁。不有封禪行。安知愁吾民。翩翩海濱子。自以通鬼神。黃金成虛言。鴻飛邈無因。武安玩天時。獨秉萬國鈞。愴似宣房詩。郎吏終負薪。寂寞千載間。眞僞共沈淪。何乃忘謗書。世固無直言。

楚風四首

三楚多秀士。從古謂之然。接輿旣髡首。三閭復沈淵。大屈備時玩。白珩爲世傳。糝糠鳳鳥歌。瓦礫離騷篇。已矣德旣隱。孔車爲回旋。

嚴嚴章華宮。灼灼高唐觀。慶弔隨俯仰。離合異昏旦。人生詎能幾。物化每交亂。千秋萬歲後。寂寞江與漢。

宜僚樂市肆。叔敖榮寢丘。不惡漁釣卑。吾聞公閱休。顛冥天地間。世與我悠悠。豈悟多種橘。可齊千戶侯。唐侯兩驢驢。夙昔困多難。蔡國雙狐白。豈知反爲患。世衰道回遙。服美自取間。敵緼可終身。鴻飛諒何篡。

雜詠

今年四十一。髮白牙齒脫。未能遊逍遙。意每不自豁。偶尋樂天詩。往在江州日。年幾與我同。衰疾與我埒。伊人了無生。外物均寂滅。而且于形骸。變化難自適。况我狹中者。萬緣日相伐。力小覺任重。憂多使內熱。安能保平和。但有就衰竭。賢哉香山翁。精識妙前哲。懸車未六十。鼓缶終大耋。以茲揆損益。亦似有與奪。至理何心得。吾其守茲說。

二十六日大風寄貢甫

雨止天大風。草木皆怒號。居人不得寐。起見星月高。鳥獸羣悲鳴。空虛如波濤。行子今安至。愴愴我心勞。山川幸非遠。歲月亦未滔。自傷下澤車。不及鄉里豪。袞袞隨飛蓬。悲歌擊長刀。丈夫寒如此。何愧兒女曹。無由託飛雲。更寄身上袍。

黑河館連日大風

空桐倚不周。近戴北斗魁。上天限中外。自古常風霾。我行迫隆冬。周覽窮荒回。魑魅醜正直。共工負其材。初如百萬兵。鳴鼓天上來。日月慘不光。星辰爲之頽。又如海水翻。洪洞奔天臺。四顧無復人。但聽萬壑雷。搖山墮危石。略野荒纖芟。鳥雀失食悲。虎豹亡羣哀。大叫不自聞。卻行尙欲摧。而我仗漢節。何由脫氛埃。

先王外荒服。赤子棄草萊。陰姦竊號令。天網殊恢恢。我車傷崔嵬。我馬勞虺隤。感彼鷄鳴詩。聊以慰永懷。
奉和永叔夜聞風聲有感用其韻

往爲名山客。浩蕩多奇觀。六月湖海臥。飄飄生羽翰。誤升紫垣籍。草野非所安。金火三伏交。束帶愁衣冠。飛塵變形骸。內熱焦肺肝。豈惟天有時。人事亦可歎。適有涼風來。蕭騷庭葉乾。感之意飛動。忽若驂龍鸞。銀漢水可涉。枯槎去無難。洞庭魚正肥。遊子行足歡。飲酒讀離騷。睥睨天壤寬。要當以樂死。日月誰控搏。夫子文章伯。已在青雲端。且方濟一世。詎肯哀盤桓。作詩破冥煩。磊落冰雪顏。慄慄屈宋詞。千秋劇椒蘭。
春旱天多風贈深雨

春旱天多風。十步不見人。自非勢利役。誰肯輕出門。我亦閉戶居。寂寥臥晏溫。歎息中庭花。散隨扶搖翻。百芳半摧折。白日或翳昏。安得超塵埃。高乘雲雷奔。壯心更激烈。中熱生肺肝。愧君憂陋巷。眷眷迂輕軒。高論清我懷。忽然失冥煩。

呂梁

呂梁性天險。魚鼈不可游。引棹出叢石。一絙用百牛。洶湧含風電。蜿蜒噴蛟虬。世自有畏塗。吾仍恥隨流。側見百仞奔。俯窺千丈幽。自非跂達觀。未易寬百憂。夙昔涉老莊。縱心會虛舟。忠信猶足恃。放言禮門由。
蜀岡南麓

山深行易迷。南麓偶清曠。鷄犬鳴谷中。樵童戲巖上。茅茨肖浮居。牖戶相背向。竹徑通往來。清陰亦彌望。

白頭三四老。相見語歡暢。心疑避世子。形迹一何放。行將從之遊。自恨苦羈鞅。不能問姓名。聊作招隱唱。

種竹偶書

少有王子癖。長憐此君雅。常嫌地喧窄。不敢謀瀟灑。昨日山客來。勸我栽砌下。感荷知我心。遂得移遶舍。其中置磐石。可以措尊罍。于此更一座。以待達名者。山禽時復來。清嘯如郊野。其餘卽無見。不辨春與夏。吾惟厭時俗。人亦來者寡。順然兩無議。外譽焉足假。新筍漸盈尺。新枝已鋪瓦。燕雀勿相驚。深沈似隆廈。

勸思弟子南軒種竹

世皆笑幽獨。何不少自貶。種竹南軒間。亦足以相檢。況茲歲華晚。衆卉日凋斂。清節良自如。栽培匪爲諂。豈知牕戶側。秀色窺荏苒。會茲東南美。相對情不慊。楚人昔頌橘。行比伯夷忝。此君最孤高。堅直難外掩。凜氣有精粹。筠光射圭琰。他時雪中客。往往疑清剡。

古俠客行

壯年志慷慨。結交慕英雄。大梁多長者。燕趙有古風。千金起爲壽。一話不顧躬。自謂松與柏。忽爲萍與蓬。市道今乃知。利窮非義窮。

深甫過留宿并示近詩

別長會時稀。樂少憂日多。邂逅非素期。悲歡奈君何。明燈照空牕。風雪滿天地。此時坐相對。達旦終不寐。少年慕結交。徒以此方寸。危生始自感。來日安可問。意氣久已奪。形髮亦已衰。如何切磋意。不廢平生時。

驚禽墜虛弦。病葉損輕露。一聞傷心奏。涕下已如注。

留張十二宿

少年有佳趣。老大意獨驩。常恨離別久。忽忘會聚難。殷勤置杯杓。蕭散遺衣冠。誠知惜短夜。爲我強盤桓。

和鄰幾八月十五日夜對月

外事已波濤。回首已陳迹。獨有雲間月。相見不改色。慰我平生懷。故在中秋夕。我髮見二毛。羈旅多所歷。每逢桂花秋。興發勸更劇。江湖與山林。所至得真適。今年都城游。日與賤事逼。得閒輒昏醉。向晦專寢默。覺醒忽天明。不見千里白。誰令心賞遠。坐使歲華隔。徘徊不自愜。悵望空歎息。見君新詩章。暫若對寒魄。清光動人目。諷詠當自釋。

脚冷

踐霜脚如脫。知我血氣衰。況復齒牙落。鬢邊亦有絲。人生會當老。何計遲速爲。但願多美酒。憂來忽如遺。

和江十飲范景仁家晚宿祕閣睹伯鎮題壁記番直日月感之作五古

阮公有大度。于世無所營。顧獨好飲酒。而欣爲步兵。未嘗語是非。舉俗駭且驚。夫豈知胸中。礫硯獨不平。西登廣武原。咄嗟豎子名。竭來蓬池上。詠懷激哀聲。此風久不聞。寥落成千齡。鄰幾頗其流。貧賤能忘形。校書天祿閣。不忍游公卿。時從好事飲。傲兀人間情。髮白不自疑。歸來臥前楹。願是壁上書。始知歲月傾。喟然感舊交。因欲東南行。黃鵠真去矣。白雲遠冥冥。吾聞至人語。大塊勞我生。天地一毫間。出處何重輕。

但使樽有酒。長醉不用醒。君當解此意。獨往何必清。

賀王介甫初就職祕閣

鳳凰信高遠。矰繳安得羈。非君九韶奏。詎肯一來儀。王子美無度。孤飛絕雲霓。常恐濁一世。斯人莫見之。天子蹈軒虞。公卿聚臯夔。孰言阿閣下。定有朝陽詩。願得調律呂。聆音辨雄雌。毋空著圖象。但取夸童兒。

修府學後同官僚見諸生

用儒沐休運。撫俗奉明詔。雖愧文翁治。猶非武城笑。茲堂丞相規。頗盡泮宮妙。高閣橫書冥。長廊鶩窳窳。春秋大復古。修舊非所誚。庭壇一已新。丹堊歛相照。迂疎賴衆才。簡默希坐嘯。況多都邑賢。歷講道術要。藩籬可目涉。弦誦或耳剽。汜鄉亦何人。千載名獨劬。

煌煌京洛行

紫極開天門。慶雲麗皇居。卜郊定九鼎。懸闕觀寶書。德澤浸無彊。風俗返華胥。冠蓋百萬家。車馬十二衢。輕肥耀朝日。富庶極中區。游俠信陵後。節義大梁餘。願盼生光輝。吹拂動萎枯。貴賤且貿遷。高陵忽爲墟。變化若有神。升沈豈嘗拘。咄嗟鄒魯士。何用空躊躇。

代書寄鴨脚子于都下親友

予指老無力。不能著多書。書苟過百字。便覺筋攣拘。京都多豪英。往往在石渠。作書不可周。寄聲亦已疎。後園植佳果。遠贈當鯉魚。中雖無尺素。加餐意何如。

寄貢甫時隨侍入蜀

曩別百里近。愁心亂清秋。今別百里遙。秋色縈遠愁。我飛乏羽翰。我居悵淹留。忽如轅下馬。局促難自謀。古人有先覺。不願往諸侯。我乃今知之。曰歸邈無由。朝吟南陵篇。暮弦梁山謳。離魂如明月。昔昔西南流。羈旅淹歲改。江臯屬春早。幽村屢獨往。勝事時默討。深竹尙殘雪。陽崖已芳草。茅茨忽連接。鄰里自相保。人猶安道族。景是山陰道。徘徊問耆舊。或遇棲真老。

戴村

種瓜瓠

吾生拙用大。江海思遠適。豈獨爲匏瓜。長繫取不食。漆園有遺意。放蕩豁心臆。樹此無何鄉。近身見多益。五日抽一尋。十日成百尺。纍蔓更相引。甘實行可摘。因之浮汗漫。去矣笑跼蹐。從我其誰歟。由也不可得。

簡深甫

與君一城居。其實跬步間。慊慊不相從。十日俄忽然。一城豈爲遠。十日豈爲短。客子局人事。心與迹相反。而况各異鄉。茫茫隔山陂。歲時若奔車。過去誰復推。伊昔厭幽獨。願子東西鄰。雖鄰尙不覲。何似南北人。人間實如此。千別能一會。興來卽上馬。掃榻聊相對。

贈陳襄祕丞自峽中召歸

淮海南國衝冠蓋。結浮雲。面交固不數。白首猶若新。之子天際來。各自東西人。一語且連夕。歡如平生親。

豈伊名聞久。固以意氣均。馳騫詩書閒。博哉醇乎醇。我昔病俗學。莫明聖與仁。常恐遂至地。豈期晚有鄰。君遠覲清光。一二席上珍。賢者任必重。勉旃覺斯民。陳迴此與共。談性命仁聖之間。留五日乃別。

送冲卿守高郵

鷄鶩守樊籠。鴻鵠游四溟。羨君一麾去。不負人間名。孤帆西北風。海日東南明。回首笑富貴。浮雲亦何輕。我憶童子時。綵衣戲五亭。離懷重自感。墮淚沾長纓。

公是集卷十

五言古詩

聞王十八除檢討

滄海有蓬萊。去人初不遠。舟車有難到。方士曾空返。聞子騎鯨魚。姓名已金簡。誰云路幽險。但怪波清淺。俯窺紫貝闕。洞視白玉版。神仙豈學致。變化絕微顯。乃知淮南藥。力可及鷄犬。相望雲霧深。冥冥白日晚。驅車太山下。過憩任與樊。此地昔建侯。邈哉羲皇孫。市朝非一世。茂草空平原。三十餘萬歲。忽如飛鴻奔。毀墓骨已銷。但有石槨存。縱橫委路隅。冥漠游岱魂。今古一丘貉。成敗誰復論。區區東家翁。乃復哀璵璠。牛山顧千駟。涕下何由諉。忠義獨不朽。庶幾長者言。

任城道中

陳橋別隱直

柔遠在無外。飲冰寧顧家。旌麾辭北闕。原隰生光華。水涸雨亦收。勁風卷驚沙。送車何其多。高蓋垂文綯。張侯平生親。情義固所加。哀我志慷慨。睠我天一涯。出宿水上亭。暮談見晨霞。百里亦已遠。心乎不云遐。我自東西人。豈能守蓬麻。周爰愧靡及。敢不重拜嘉。

答江鄰幾到潁州見寄并封示晏公送行

日夕風雪佳。相念思乘興。忽憶君在遠。離憂紛難定。入門對新詩。滿眼冰玉瑩。因疑君居側。恍惚不自勝。別來雖無幾。日月稍已送。一葦悲河廣。況乃山川迴。遠遊殊風土。孤響謬羣聽。常恐弔原憲。夫子歎何病。幸傳承相篇。復見仁者贈。懸知愜真賞。有以誇歷聘。何用慰索居。一朝再三詠。

寄深甫兄弟時在潁

回面薄領役。終歲無一欣。思君阻晤語。坐想如古人。百里非遐方。書疎絕相聞。亦知平生懷。未爲疎數分。昔君幸見憐。約禮博以文。今也知不及。瞠然已絕塵。裹飯更欲馳。漉漉風雪晨。高會汝潁間。千秋愧荀陳。

舟次潁上寄貢甫

我詩持寄君。宛在汝水潯。君詩欲寄我。蒼茫煙浪深。寒水爭赴壑。駛流激清音。扁舟泝游往。寂寞嗟獨尋。潁煙稍塞望。淮月初清心。恨無知賞同。樽酒誰獻斟。相思意不極。宛抑訴鳴琴。曉燈半明滅。抱膝成苦吟。

古意三首

相逢偶相識。相識竟相離。會知別情苦。寧作未相知。相見如夢中。夢中還相見。薄帷鑒明月。恍惚仍對面。主父昔未仕。頗爲鄉人輕。上書雖晚達。稱說何縱橫。不忍脫粟飯。甘爲五鼎烹。豈不愛厥身。徒爲喪其生。吾聞南山翁。軒冕不得榮。

柳下不違俗。獨恥伐國言。三黜何嘗憂。一問遂慘然。世衰狙詐用。賢者防其源。孟軻不言利。顧有仁義存。

何乃百世後。功名爲時敦。

秋意四首

陰蟲鳴空階。危葉墮高樹。秋風雖昨日。所遇已如故。悠悠歲方晏。采采行多露。芳香日可閔。宛彼蘭與杜。鴻鴈起海濱。凌風自翱翔。冥冥青雲間。矰繳安可望。千里一悲鳴。一里一傍徨。時變感自深。豈伊恨越鄉。鷓鴣信多智。出處能自謀。非無人間畏。而襲人間游。微風動高林。梁棟生早秋。斂翼從所願。落實安得留。翻翻林間藿。昔惟桃李華。飄颻終焉薄。江海無津涯。榮華寄須臾。顛頓空泥沙。良無凌霜節。安得復嘆嗟。

雨晴率張生及諸弟到薦福僧居

沈陰天氣昏。忽霽景物好。牆陰且殘雪。池岸已芳草。愁懷無端涯。強出慰枯槁。白日常青天。所至豁如埽。山僧一飯畢。鐘鼓不復考。庭宇若無人。牕軒照丹藻。徒行不知遠。適興愜所禱。如覺逍遙遊。頗堪謝煩惱。諸子吾宗秀。張生一經老。相顧能不言。歡然屢絕倒。

初鴈

翩翩南飛鴈。契闊萬里道。朔雪常逼秋。知幾諒宜早。敵兵盛西北。弓矢斷飛鳥。側翅鋒鏑間。悲鳴觸懷抱。往時商山翁。自放亦忘老。避地吾所師。相望戒輕矯。

始聞鴈

冬夜何漫漫。北風扇淒測。始聞南飛羽。稍稍過我側。來賓無乃後。恐非歲時忒。朔方稽常貢。物性隨變易。

哀音一何厲。路遠霜雪積。就陽旣云歸。感義寧自默。胡爲堂上士。撫劍重歎歎。

沒蕃士

丁年仕轅門。欲食萬里肉。敵兵方強梁。邊境日局縮。是時十月交。轉戰大河曲。落日天地昏。風塵蔽川陸。我師自憑陵。敵騎出深谷。路窮矢交墜。壯士同僂辱。投身致網罟。南向長慟哭。忠義安可論。功名亦已覆。悠悠捐歲序。忽忽抱心曲。每生悔爲禍。致死倘還福。夜渡黃河冰。獨依荒榛宿。狐狸鳴我旁。虎豹相馳逐。脫身僅毫毛。夜動晝必伏。肌膚存空骨。性命牛鬼錄。十月到亭堠。問人識風俗。回頭復長望。慷慨淚盈目。憶昔萬人出。今還一身復。可憐同時輩。視我猶鴻鵠。永棄絕域中。幾時脫臣僕。叩門謁主帥。長跪向人哭。可汗甚雄傑。其下亦輯睦。努力思長策。勿輕用人屬。

寄子華內翰時亦宿齋是夕風雨

君居白玉堂。我在紅藥署。出處豈不同。咫尺限相遇。風雨聞雞鳴。節物驚歲暮。思君正展轉。夢中亦知路。過澶州橋有感

河水東赴海。還從天上回。寧知今日波。還復前時來。岸柳亦已黃。原田正莓莓。念我平生歡。悵然使心哀。

和江鄰幾雪軒與持國同賦二首

君居近城市。每猶厭囂煩。積雪成高臥。故人來在門。埽除更爽塏。談笑寂無喧。開牕延寒月。拂席置清樽。真得酒中趣。安知狐白溫。

長安雖大雪。車馬無休時。窮巷有高士。閉門獨何爲。朝烟不黔突。彈琴方賦詩。逍遙無忤色。慷慨多逸辭。適有感同好。寄聲贈所思。調高當和寡。無以答君知。

養雞

茅茨一畝寬。生理備委曲。雞豚自古昔。豢養隨世俗。鑿垣安其棲。幼長何碌碌。旦出四飛散。暮還相從宿。頗哀鴻鵠輩。飲啄不充腹。何事萬里遊。羈旅傷局促。衣冠相嫵媚。庭廡更追逐。未悟糞土非。豈知稻粱辱。物理常有此。人情苦不足。安見避世翁。頽然臥空谷。

乘小舟入朝京門訪安道

南山厭清流。春光滿上頭。懷人不勝意。乘興去扁舟。靜吟日光午。孤棹正脩脩。固當見安道。曷若王子猷。

送陳奇祕校遊寢丘

世往人物非。古今共滔滔。聞君寢丘客。因憶孫叔敖。脫身田野間。功業青雲高。憂國不顧家。子孫負薪勞。苟無滑稽士。亦已埋蓬蒿。嗟來千戶封。晚受侯王褒。賢卿尙遺忘。反慕貪與饕。況彼里閭人。安能厭糠糟。伊昔方斷地。許身輕鴻毛。陰德尙有報。天寧給吾曹。努力道路勤。我心良鬱陶。

宴得解進士先是予爲監試

汝穎紀南國。星極麗中州。多奇兆兩漢。粹氣兼九丘。里巷含古風。文章耀前修。上恩榮計偕。博選充詔求。雜沓會駿骨。軒昂出驂騑。曰余嘗深識。有司屬同憂。攻玉固以石。妍媸豈云侔。登龜但投餌。美惡非其儔。

堂上歌鹿鳴。樽前親獻酬。有功幸九錫。與祭爲諸侯。

送胥元衡殿丞通判湖州

平生笑山濤。非隱復非吏。今更欲似之。顛暝老將至。羨君負清識。于世寡所求。能從魏闕下。徑取江湖游。扁舟駕長風。千里破高浪。倚檣一清嘯。佚氣橫雲上。醜碧箸下酒。紅鱗茗溪魚。綵衣起爲壽。此樂天下無。誰不慕軒冕。顧多困朝市。人生難自諧。祿仕當若此。

譏謝十三

利交勢相營。義交氣相得。千歲若旦暮。萬里猶咫尺。昔我相聞聲。但嫌未相識。今我相同遊。又恨莫相益。同時復同道。同官又同籍。平生重結交。然諾亦自惜。子爲太守丞。我爲里中客。雖復戒疎數。不應事形迹。

宿九里潭

潭樹老垂葉。蔭茲千百尋。蛟潛伏遺劍。魚躍應鳴琴。遠客何所羨。神淵涵淨心。

橄欖本草言橄欖解鱖鮓及酒毒最效也

吾昔評橄欖。不在百果後。其材中棟梁。其實過橙棗。俗人多未識。至美或莫售。材以遠見遺。實以苦爲詬。華堂娛嘉賓。甘脆陳左右。此物萬里來。真味寧免陋。欲觀絕倫效。宜與危事遘。江魚肆潛毒。頃刻輒僵仆。昔酒發狂醒。千日尙沈瘳。性命如危絃。一絕不可救。幸能服刀圭。咄嗟反其舊。此亦天下奇。能使天者壽。豈殊魯連子。談笑解紛鬪。功成歸海濱。不願千乘富。

聞伯庸再安撫涇原壬午九月鎮戎喪師復再往

西師又失律。將帥各顛覆。流血丹川原。積屍委山谷。咄嗟仁壽域。短天生理促。王命有不行。國威爲之岵。鄙夫無憂責。感慨祗慟哭。况聞哀痛詔。輟食想頗牧。朝廷足名卿。多壘各含辱。謀議宜深長。瘡痍待湔浴。使乎非常任。天子意所屬。百萬氣未蘇。吾民且局縮。賢人勤功名。報國忍勞篤。往者博望侯。昔時來君叔。再三持漢節。白髮走川陸。豈不久顛顛。事業光簡牘。關河據上游。郡國同心腹。征繕向五年。強宗亦單獨。君乘赤輪車。一一詢比屋。唐虞升平風。惆悵難再沐。

鄰幾過門不留戲作

陳平少負郭。亦回長者車。貧賤雖足羞。猶問道何如。此風固宜少。未謂今便無。所望臺閣賢。尙能念古初。左輔塗朱漆。長綬要銀魚。化我不少留。始知心見疎。彌年寄祿仕。竟日勞簿書。相與同笑言。俱幸逃空虛。春秋期知我。雅頌誨起予。茲意未可忘。君宜誦權輿。

秋雪

剝候凋羣陽。幽陰肆騰涌。清霜飛雲初。大雪吁不兇。繽紛舞鴻鵠。細碎翻蠖蠨。北風故相資。凍雨仍更縱。泥塗絕行道。珠璧棄郊壠。峨峨九重高。兀兀雙玉聳。寒光坐輝映。凜氣彌衝擁。壯士歌慷慨。儒生議刑寵。長年昔未逢。噤語空多悚。皇天無私尤。德惠答虔鞏。豈伊傷時和。蓋亦遵順動。况茲秋方高。民麥皆在隴。龍蛇蟄既坏。鳥獸毛亦毳。農夫樂休役。天子寬垂拱。信此豐年祥。爾曹何必恐。

秋雪寄獻臣

三年海水旁。卑濕厭歎熱。都城幸相從。比歲秋逢雪。秦吳乖風土。南北異時節。惟君歲寒姿。一致乃欲別。出門顧道路。冰霰埋車轍。咫尺阻相過。誰當慰寥泬。

月夜期江梅兩君不至聞在李二審言家飲

日入更灑埽。翛然庭檻空。酒杯落明月。白羽來清風。佳興自不淺。幽人無與同。徘徊臥林下。重露沾蘭叢。

城樓

新晴彊人意。步上西城樓。雲煙開井邑。綺繡錯田疇。離離麥就熟。翳翳桑尚柔。懷歸感初服。覽物悵淹留。

子高作司諫見舉自代

智短多不堪。冗官略自保。念非撥煩用。猶覬趙魏老。故人紫微仙。自致青雲早。回首記平昔。露章慰枯槁。先容輪囷木。進取萬里道。妄意巉巖石。庶幾千金寶。過聽爲君羞。貪名怯陰討。人亦謂我何。自笑方絕倒。

聞子飛作諫官寄隱直

玉以三獻珍。金以百鍊精。錢侯困躓時。詎免時俗輕。感激生憤勇。辛勤就功名。居然取高第。自此凌諸生。諫官近冕旒。地望臨公卿。報國須薦賢。致君在舉能。蕭朱尙結綬。張杜猶提衡。小雅紀伐木。微禽識同聲。此風久已無。賢者當肯行。念子早治裝。復令世人驚。

賀隱直錢子飛言之中丞中丞奏辟主簿

三年守一官。五年調一職。選門萬餘人。過半頭髮白。賢愚必待次。先後各循格。相與爲波流。其誰辨白黑。子今特招起。方與塵土隔。翰林誠知人。錢子飛中丞。亦好德。古來御史屬。自與二府敵。于今任雖卑。其實名不易。必將寄紀綱。豈獨親簿籍。鴻鵠須遠飛。騏驥無近迹。往矣勿自疑。天方佑正直。

賀王純臣

昔者巖穴客。多隨辟書起。榮名耀山澤。高爵下閭里。此道不復振。此時竟已矣。不圖廷中賢。有意及之子。十年困鄉書。三黜竟不仕。一朝遭知音。籍籍到天耳。窮通諒有數。自古多若此。年華猶未晚。富良方自治。伐木情所深。彈冠坐增喜。請歌反招隱。以激南州士。

詠庭檜贈深甫

自吾臥家巷。幽獨謝鄰里。顧憐庭中檜。常以比君子。春秋色不變。朝夕影雙峙。誰言冰霰繁。稍亂兼葭毀。始知歲寒甚。慘慘不自喜。悵然對之歎。爾復那至此。陳蔡稱慍見。由也德可鄙。天損吾能違。放歌有焱氏。

檜花

百花乘春輝。紅白相嫵媚。暫開已半落。過眼如夢寐。繁奢能幾時。寂寞都埽地。兒童惜徘徊。婦女瞻歔歔。中庭兩檜樹。百尺浮雲際。芳意不玩俗。秀色亦自喜。綠煙凝參差。金粟點細碎。霏霏墮疎香。裊裊隔清吹。足明後凋節。不與衆草類。忽思折瑤花。自放天宇外。

初秋病中作五言呈君錫待制介夫學士

蹇淺聞道墮。惇自焚和負。茲歲陰改。閉閣秋風過。濃露變園草。號蟬翳庭柯。覽時悵頽暮。顧影驚婆娑。平生江湖尚。薄遊不願多。奚爲役外物。況乃淹舊疴。徂西識芑野。采菽聆悲歌。今昔容不同。情感殆靡他。勞生共逆旅。馳景均騰波。行矣自免歸。息陰安薜蘿。

送王子直還斥溝

薄薄雲蔽日。淒淒寒中人。飛飛燕歸蟄。漠漠鴈來賓。送子獨無友。悲秋空病身。登山復臨水。便覺二毛新。

初卜潁州城西新居

羈鳥能擇木。游魚知赴淵。飛沈豈異意。行止私自憐。玩世本無術。辟人庸得賢。卜居幸樂國。負郭依良田。心與地俱遠。我徒共熙然。生涯亦何有。聊以忘吾年。

早行

虛舟卻煩暑。初旦更清和。塵襟暫軒豁。幽興亦滋多。黃鳥嘯深樹。良魚躍層波。岸花間紅紫。村叟雜笑歌。稍忘溯洄力。未悟歲時過。側肩市朝客。偃蹇奈予何。

晴日後園

羣鳥飛朝日。鳴鶴響晴空。宿雪乍消釋。滯陰反沖融。幽居亦可愛。老圃願與同。負暄空林下。游目故城東。世事見流水。歲華指飛蓬。酣歌用自適。貧賤何必終。

公是集卷十一

五言古詩

新作石林亭

朝廷入忘返。山林往不還。念無高世姿。聊處可否間。築基傲崔嵬。鞭石輕險艱。羣玉相磊落。萬峰正孱顏。種樹亦蒼蒼。激流復潺潺。澗渚歛在眼。崑閬若可攀。自我嬰世網。邇來鬚毛斑。邱壑成弱喪。簿書常自環。及爾滅聞見。曠如遠塵寰。豈敢同避世。庶幾善閉關。子牟困懷魏。謝傅悲徂山。茲焉可遺老。詎厭終歲閒。

樊口

回舟武昌郭。暫往樊水上。樊水何清冷。樊山亦孤壯。壽藤驗百歲。喬木過十丈。絕俗殊崎嶇。攀緣幸可傍。林端見漁舍。戶牖相背向。雞犬鳴雲中。神仙豈殊狀。昔聞元次山。于焉寄荒浪。鄰里俱已非。陵谷平得喪。茅茨固微物。蕪滅不可訪。向乏數卷書。終隨衆人葬。清時易直道。末俗擯高尚。陳迹成渺茫。孤吟屢惆悵。宿州道中逢聖俞入京

翩翩河中船。一西復一東。相逢且不留。相別何時逢。黃鵠安稻梁。有時顧池籠。一爲滄浪去。不復思樊中。哀君蒼髮白。擾擾悲途窮。努力千萬乘。寄聲謝醉翁。

謝學士赴闕還京師謝之先德營典記注。

公提史臣筆記注天子側。日成唐虞風。噩噩在典策。家聲繼純粹。論著多切直。周南未成書。流涕嘗感激。忽從東溟飛。上拱宸斗極。清淮淨無波。歸馬閑且奕。帝宮青冥間。白日升曉色。儒人相慶語。文道宜久職。公歸演綸誥。制度期能覲。

和甫自京師至

過事與日多。歡憂兩如夢。安知盈樽酒。此國今宵共。寸心不如昔。感遇每易動。孤笑破羣愁。強顏不爲用。天河轉屋角。缺月照樑棟。燼落屢繽紛。良時亦倥偬。驪駒晨在門。十里起相送。暫醉醒不遲。舊愁來更重。

得鄰幾書

君乘使者車。我爲列郡守。地理秦與越。天文井兼斗。夢寐且不通。言笑安得同。忽傳咫尺書。遠愧西南風。衰老容貌遷。憂患志氣落。聞君自紛如。我亦不如昨。捨書計離別。忽忽三四年。一日成九秋。此語猶信然。天地大逆旅。外物不可必。出處多舛馳。相逢定何日。尙禽晚且游。沮溺長耦耕。此意雖未合。且當勤寄聲。

答李谷同年書

歸客江南來。迢迢數千里。故人遺我書。細字三四紙。上言平生懷。伐木義所倚。下道相知心。結綬方獨喜。寧知淮陽翁。棄外甘臥理。不預朝廷議。何由發吾子。

楊彥文過

病起時節改。遠池飛脊令。賓交絕來往。門戶常晝扃。朔風擗閭闔。凍雨翻滄溟。泥塗墊后土。氣象昏圓靈。局促久增欬。據梧目思瞑。窅然顧環堵。嗒若亡我形。夫子亦何事。羈旅復伶仃。孔懷在接淅。過我不遑寧。歲晏絕晤語。誰當慰長醒。

晚過深甫

忽忽衡門下。幾希田舍翁。有時寄一笑。目送南飛鴻。今日天正佳。草樹搖春容。忽驚枝上花。飄落隨西風。偶然幽興展。思樂古人同。塵埃比殊深。杖屨亦可通。誰謂車馬多。澹如初不逢。

讀鄰幾泰山十二詩

宿心慕鄒魯。寤寐泰山杪。慷慨念遐觀。滯留想輕矯。人寰何鼎鼎。羣動困擾擾。安知有神靈。獨立萬物表。圓天似車蓋。滄海稱池沼。丹梯無留迹。絕壑通過鳥。古今更廢興。萬事論莽眇。七十二家舊。永與耳目窅。羨君能自力。窮覽謝煩湫。超然昔賢趣。處覺茲世少。吐詩狀奇麗。思與雲縹緲。忽如按圖畫。所向得了了。悠哉仲尼意。信彼天下小。

休復謹次韻和呈垂覽拙詩之作

朝躋天門路。暮宿白雲杪。超然六合外。如翼鸞鳳矯。運眸極遐曠。收念息奔擾。盤盤上絕頂。獨立顛氣表。天壁涌神泉。玉龜泳靈沼。凌奧無螿蟲。集灌盡百鳥。勝境窮賞踐。陳迹嗟緬眇。接遯終焉託。真仙事殊宵。雲露相飄飄。塵途忘湫湫。躡屐游已屢。操觚才患少。思軋幾沈伏。神馳空縹緲。謝客興不淺。尙子

計未了。何時出塵籠。重看衆山小。

送從兄

東門楊柳深。下有還鄉路。之子千里行。春風三月暮。旅心常草草。飄忽不可駐。居者空徘徊。行者亦反顧。丈夫方貧賤。四海無所遇。不如轍中魚。猶以沫相煦。悠悠大江水。日夕自東注。何當激風雷。慰爾飢渴慕。

山光寺送獻臣

嘉集常苦難。送歸豈辭遠。櫂舟故相逐。攜手行自挽。古寺何崔嵬。深林象巖巘。幽尋取乘興。造適非素選。寒泉冰深池。衰草被長坂。歲窮景蕭條。僧老意繾綣。勝賞竟誰同。相知幸非晚。離懷自無極。日暮仍忘返。燕譽堂飲別。朱著作

歲晚節物變。會難羈旅悲。疎燈照四座。殘菊醉空卮。歌闋風雨起。舞餘冠佩敝。天明念陳迹。忽忽叢予思。以石爲玉

梧臺有沈璞。由來非一春。時無司南駕。自比連城珍。寧如崑丘叟。相與笑緇磷。勿以名夸世。而將暗投人。夜分東牕見月

逾望月彌晚。宵分在東牕。隨風漏疎隙。散彩奪寒缸。留翫坐忘寐。啓書對空缸。惜哉皆陳迹。誰爲足經邦。

酬某

讀書與博筭。亡羊信多岐。何以消煩憂。謝墅觀弈棋。寓物取歡適。吾道有張弛。誰能長刺促。屈首就鞅羈。

陳遵嗜盃酒。伯松見誚嗤。袁絲沈里閭。劇孟相追隨。君方總府事。吏牘正紛披。走見固所願。清閒在他時。酬林國華先輩。

昔吾臨汝南。休騎思俊賢。此邦號多士。今世猶依然。奉詔選計偕。至者皆比肩。子時避逃我。常獨懷悁悁。豈我非其人。長鯨隘蹄泉。將由求之失。黃鵠去不還。察廉未塞責。負課終彌年。解印歸臥家。百憂正纏綿。聞子來在門。華裾燦雲烟。手攜一卷書。金碧紛蟬聯。慰我平生懷。意好何深堅。始知向難進。非以相棄捐。鄉評讓父兄。觀國氣無前。翰飛果自致。大笑諸老先。毫末爲豫章。衆流成深淵。物常積于久。念子亦勉旃。令名百世榮。文學貴本元。愛至相期深。愧無長者言。

夜雨

盛陽爍微陰。五月氣蘊隆。天地爲大爐。萬物皆廢銅。俯欲濯江漢。仰思凌蒼穹。縮身投蝸角。救喝號天公。天亦哀人謀。玄雲送雷風。須臾雨如瀉。一掃萬里空。有似脫炮烙。又如逃祖龍。大哉造化力。因見王霸功。

登呂屯田清暑亭

日永雖徂暑。虛堂自清幽。主人意未展。改席茲城樓。嘉樹遠近合。清川縱橫流。好風萬里至。浩蕩開客愁。長嘯欲飛動。勞生局遠遊。眇然不自愜。目極孤雲浮。

許州西湖

羈旅懷江湖。氛埃願臯壤。及茲已俱適。初意恨獨往。樓觀湧差參。軒檻豁高爽。清光見毛髮。衆影兼俯仰。

昔者廊廟客。于茲濯塵網。疏源不憚遠。勝事日以廣。美矣流水意。當爲知音賞。

晚過西湖

日暮無與適。緩帶此逍遙。湖光悅我心。步上西城橋。遠烟被林莽。樓閣隱岩嶽。歸鳥先後飛。夕風正飄飄。悵然念遠渚。興盡復行謠。

睡起

日午更稍休。池上逍遙眠。水木澹相映。庭戶清無喧。時有山中禽。來鳴高樹巔。微風拂徑過。會意成翛然。有生滯形役。萬物安靜便。愧無淮陽績。高臥亦終年。

奉和府公新作益山激水若泉見招十二韻

誰謂山水秀。忽登君子堂。乃知仁智樂。不與冠蓋妨。濃靄萬疊碧。懸流百尋長。列峯映落落。遶溜含蒼蒼。氣爽變衡霍。聲幽激瀟湘。意真景自遠。趣逸累已忘。鳴玉無時續。翠屏終日張。賞音得虛寂。寓興成軒昂。夙昔慕丘壑。邇來倦簪裳。欣符洗耳願。遽有尋源狂。縱目寄歷覽。挾琴寫鏗鏘。但疑主人厭。應接殊未央。

遊五嶽觀寄鄰幾聖俞

五嶽神仙境。可聞不可攀。安知采真遊。近在都城間。樓觀橫飛雲。虎豹司重關。車馬自茲止。始覺非人寰。層波漲滄溟。參差出三山。金銀麗宮闕。日月相循環。東來復幾時。花草紛斑斑。長楊垂輕絲。若委千髻鬟。氛埃無由及。魚鳥相與閒。造適不自知。忽如脫沈痾。那得窺壺中。逍遙去塵闕。主人白瑤盃。勸客流霞殷。

此中可遺老。豈獨聊忘還。嗟嗟二三子。世路迷險艱。流光競奔走。俯仰移朱顏。誰肯委俗紛。相從解朝班。濯君冠與纓。春谷水潺潺。

谿上避暑

滴瀝松下雨。清微萍際風。欣然此時賞。我與斯人同。倦鳥墮水上。游魚翔鑑中。不言閱羣動。未覺幽興窮。東館避暑

得隱直書

庭柯結浮陰。深竹聽鳴鵲。晚涼愛軒宇。默念得佳客。適有南逝鳥。墮君一封帛。眷予方幽獨。慰我正相憶。洛中輕肥地。子復顛顛色。富貴若可求。吾從執鞭役。

隱直近詣闕獻書報聞

炎暉若探湯。周道行倭遲。之子忍重躋。斯人方病痲。上書蒼龍闕。移副鼎足司。卓犖動羣聽。謂言卽張弛。虞卿萬乘相。子房帝王師。古事可髣髴。世塗實參差。天關虎豹深。棄我忽若遺。卻走國西門。素衣化爲緇。行行屢回首。未忍從此辭。賢者愛其君。肯如悻悻爲。吾聞先達語。進退自有時。版築不爲辱。飯牛豈嫌遲。男兒建功名。或與老大期。努力梁甫吟。古人不予欺。

將入京得淮南王工部書及遣壽州官船以來五言寄之

生理厭漂蕩。三年若棲苴。春深感松柏。涕流望京華。誰言數舍近。局滯成天涯。鬢色新二毛。悵然空復嗟。明侯平生意。雖遠不云遐。叩君金玉音。眷我需于沙。旭日明清川。扁舟問貧家。雖非方外遊。此亦海上槎。盡日庇短篷。不慙負舍蝸。愧君濟川才。引領隔雲霞。何由一乘興。世累紛如麻。

答君章譽兩兒見寄

窺鏡見二毛。自憐憂患餘。豈惟壯心盡。方與功名疎。終歲不捉筆。歷時長束書。顧常念絕學。正復傷離居。忽忽莫自聊。悠悠空歲除。過壯而無聞。我其衆人歟。故人來江南。丹轂暎隼旟。尙持平生意。期我相得初。殷勤作新詩。爛漫聯瓊琚。溢美及兒曹。倅來問起予。雖知非其實。但愧情相於。矧乃筆力雄。駸駸逼曹徐。一讀必三歎。何由望儲胥。故人昔流落。襟袍久不攄。乃者始再遷。通直承明廬。蒼龍脫鞵絃。快馬從輕車。神至氣自豪。心廣體亦舒。淵源未易測。變化天池魚。甯獨揚子雲。其工似相如。苟能哀顛頓。有以慰空虛。月寄三四幅。窮愁直見祛。

答徐無逸秀才寄示新文

金華神仙境。山川天下無。之子復清發。自與常人殊。問學當世賢。不違智如愚。歸來守桑梓。寂寞安故廬。此風足礪俗。有以光吾儒。如何臥空谷。自樂詩與書。我辱廷中臣。一麾寄江湖。薦賢力不足。相望空長吁。

對酒憶諸子

以酒自足飲。胡爲坐無歡。念我意中人。四顧用長歎。平生交遊少。而復聚會難。萬古膠漆姿。各在天一端。用兵輕文儒。諸子俱小官。物生繫所逢。窮達何足言。但恨適有酒。共醉乃無緣。

出塞曲三首

桓桓良家子。趨趨羽林兒。恩讐久未報。感激氣拂霓。無用丈二組。不須一丸泥。獨身斬敵首。手攬封侯圭。丈夫不懼死。所懼潛鬪茸。出身義許國。桀石賈餘勇。豈無親戚憐。決去甘登隴。人生在奮發。將相寧有種。茫茫郊塞遠。木落原野空。鼓鼙濕前雨。笳吹悲後風。山州行無極。敵窟未可窮。生當取榮名。死當爲鬼雄。

移葦

蕭蕭江上葦。夏老叢已深。悠悠文王死。常懼牛羊侵。遷根潢汙池。慰我江湖心。清風日夕過。白鷺時見臨。疎響拂琴瑟。綠華曠衣襟。處卑節不改。習靜情足欽。炎暉已堪愛。秋景坐可尋。願及構明堂。甘心辭故林。

欲于舊州石橋作偶活臺以備遊覽先爲五言

河決鉅野溢。此時吾山平。百川會兩澤。千里圍孤城。桑野就蕪漫。石橋尙崢嶸。往往有白鶴。飛來羣悲鳴。我欲覽風土。因之省民耕。誰能同我樂。誰肯從我行。楚人哀江南。倚沼而哇瀛。臨高誦斯語。正復傷人情。當築十丈臺。偶活爲之名。上可容宴豆。下堪列旆旌。棹歌出中流。簫鼓會前楹。浮雲來東山。落日隱北溟。此樂或難忘。請公爲我評。

意華臺

楚子志方盛。築臺臨章華。度高累百尋。計產逾萬家。參差蔽日月。煥爛生烟霞。侍酒皆列侯。佐歡盡名娃。嬉遊未云樂。荆棘紛已芽。奈何竭民力。用此爲盜誇。蔓草匿頽基。長風卷飛沙。廢興若糾纏。故老猶咨嗟。

曲水臺

杖履不能遠。逍遙池上林。微風起衆響。炎日隔繁陰。斐亶激流泉。間關語鳴禽。放懷在離人。寄賞欣會心。既謝朝市喧。亦忘山谷深。雖知非吾室。獨以開煩襟。

暖景偶作

垂楊欲吐花。芳草遍抽芽。低風動簾幕。細雨濕堤沙。暖景蕩愁思。一城千萬家。

冬雨偶作

江上朝來雨。城中起寒色。淒淒濕塵土。漠漠蔽空碧。築場看已晚。及物悵無益。苞蓄怨下泉。客子長太息。

豫章儒者

豫章有儒者。讀書三十年。但識上古風。不知時俗遷。一聞西戎叛。有意摧羣頑。詣闕上封章。臣知用兵權。不在勞士卒。不須役戈鋌。要先正其本。本正末自安。臣觀朝廷中。或有可廢員。臣觀草澤中。或有可用賢。國家既失此。奸吏隨矯虔。吏奸萬事隳。外患隨因緣。所以子玉存。文公積愁顏。所以汲黯亡。淮南爲無難。天子覽表歎。當朝常拳拳。迴頭謂羣公。可付史館編。可使糜好爵。以補風化源。豈知貴臣忌。投爾南海壖。不得面指陳。胸襟曷由宣。走卒驅使行。行行酌貪泉。名與囚隸俱。位乃胥校聯。九重竟不知。猶謂列王官。

奈何樂堯舜。乃是取危顛。誰云遇明主。未免遭棄捐。遂令天下士。齟舌戒勿言。寧有死壑中。安有議君前。浮雲蔽白日。自古同所歎。豈爲此生悲。我歌願臚傳。

賀尹學士辟經略府

年來方苦兵。邊氛蕩區夏。西陲亭障盡。人骨蔽荒野。漢家飛將多。程李相上下。試問誰董之。王朝大司馬。分廷授斧鉞。號令從此把。主憂臣當辱。開府納儒雅。堂堂蒙山舊。乃是謫仙者。謀畫當代無。胸襟一朝寫。誠知鑠鉛鑛。不合煩大冶。要使借前籌。非公諒誰假。鷹飢肯擇肉。驥逸始流赭。由來抱軒昂。可得不脫洒。昨聞負芻粟。中戶困楚檣。此事已大急。哀哉動鰥寡。兵家尙神速。世務忌苟且。願公更深謀。卻敵如破瓦。鱷鯢埽封境。疲瘵沐純嘏。豈令魯仲尼。獨贊王孫賈。

鷓鴣巾余率意作之。以便當暑。其形制如燕也。

遠思意而子。因作鷓鴣巾。處世本遺物。全生翻近人。輕涼便肌髮。瀟灑外埃塵。山林有獨往。此亦陶唐民。

望洞庭

洞庭七百里。浩蕩敵溟渤。雲夢開其胸。巴陵束喉舌。東流匯羣川。盛漲五六月。飄颻浮乾坤。倚蓋低兀臲。吾行寰海間。未見此水闊。峽流下衣帶。島嶼盡毫末。高秋卷氛翳。兩涯浴日月。何得徑寸珠。晦明互出沒。蒼茫蛟龍宅。溷雜魚鼈窟。太古到于今。沈潛孰分別。風帆引北極。波浪限百越。國絕南顧憂。獻琛各通達。山川非一險。此實輔明哲。俯笑三苗愚。竟爲獨夫滅。遠遊世俗隘。偶此耳目豁。浙瀝臨清風。滂沱濯炎熱。

蕭蕭霜林暮。藹藹芳草歇。壯觀激我懷。當歌意復咽。寂寥軒轅樂。萬古逸響絕。慘淡虞帝魂。九疑莽嶺嶮。況聞屈賈輩。各賜楚漢玦。至德無復還。後王寢衰缺。滔滔更南征。鬱鬱抱怛怛。太湖雖云深。未救懷古渴。

公是集卷十二

五言古詩

同聖俞寄金山曇頻次韻是時予方欲請東南一郡

我雖游都城。心亦無所住。誤得世俗償。形骸寓冠屨。少時侍吾親。游覽愛北顧。至今頗思之。想見江上鷺。白頭曇道人。夙昔竟未遇。聞其最安禪。無念無作故。勞生有喧寂。得意無早暮。塵埃未易厭。臯壤固多趣。若復乘桴行。從君款幽素。

送僧歸君山

羈旅頭髮白。寤寐君山青。遠遊負雅志。舉俗笑獨醒。西風吹新秋。幽興浮洞庭。忽見九疑峯。如列枕上屏。遼遼伯牙意。寂然誰爲聽。歸客適我願。歡然叩柴扃。振錫循東道。汎槎問南星。瀟湘落君手。去矣鴻冥冥。橘柚雨初熟。杜蘭晚更馨。上方試回顧。笑指江漢萍。

入山

連山何叢叢。相背復相向。盤溪殆千曲。險石彌萬狀。或疑天地翻。斗起渤碣浪。蹙沓更騰凌。變化倏奇壯。舟車未爲用。夷夏永缺望。鑿空伊誰氏。重譯肇霸王。茫茫千萬歲。冉冉道交喪。薄伐策已卑。割據事逾妄。

衣冠慘分裂。玉帛敝辭讓。至仁有柔服。遠馭恥懲創。非無一九泥。不乏萬人將。齊讎紆九世。魯錦輕百兩。羊腸勞躋攀。魚齒困沿竝。彼岐亦云岨。易簡德固曠。大哉天作詩。因見聖者量。

治渠

早久溝畎廢。忽雨浸我廬。晨興不及履。出門自手鋤。一直復一曲。水流若江湖。蚯蚓爲蛟龍。蟻封即丘墟。生理避燥濕。一室足有餘。人事戒偷安。未能輕須臾。豈恨規摹小。所傷筋力劬。衰疾實使然。不勝一匹雛。伊昔論五帝。每嫌盡信書。及茲始欲歎。微禹吾其魚。

東門行古曲言貧士不安其居妻子留之今改言時薄不恤賢士士欲遠逝猶顧念舊國

拂衣趨長道。撫劍獨歎息。并歲不易衣。期旦曾一食。悠悠風俗薄。顧我若異域。積金要能笑。彈鋏輕下客。豈辭蓬蒿居。未與塵世隔。黃鵠非池禽。東南舉六翮。出門尙徘徊。悲鳴念舊國。何日復來還。爲君涕沾臆。

步登南門呈府公

秋至久獨醒。今日始一醉。非公愛賓客。何以強茲意。清風與人期。蕭瑟萬里至。落日高城西。參差數間地。顧茲景方夕。悟彼歲亦逝。造適常若希。開懷欲誰忌。暢然就酩酊。更盡酒中味。

小雨

春陽轉爲旱。惠澤積不泄。稼穡亦已晚。泉湧爲之竭。吁嗟叫蒼天。閭闔不可越。精誠憑土龍。神化空恍惚。今日微風來。朝陰度城闕。霏霏墮疎潤。稍稍漏白日。塵埃暫掃地。草樹纔沐髮。終宜雲漢枯。尙喜雷電發。

帝方復威令。世莫患妖魅。寧作成湯時。彌年困飢渴。

淮上微雨寄天隱彥文

海風吹微雲。載雨淮上來。灑掃區宇間。削然無塵埃。四月雖徂暑。幽襟爲之開。思我同心人。閱茲千里懷。悠悠日已遠。勤勤首屢回。安得乘輕颿。相從孝王臺。

細雨

小雨滿前軒。濃陰不時卷。隨風氣潛潤。竟日花微泫。池光慘澹昏。樓危依微辨。寒添夕景長。坐逼秋容晚。楚客歌沈寥。吟懷孰云淺。

吳九秋過西池作詩持國和之邀予同賦

三山凌波濤。雲漢邈氛埃。世無乘槎客。安得窮昭回。天門洞闔闔。海池含風雷。淵淪蛟龍室。焜炫金銀臺。西顥何蕭條。百芳日已摧。誰能瑩心賞。喟子懷仙才。時變感所思。駐車載徘徊。已秋孰願夏。覽物彌歡哀。韓生肆爽言。觀變均齊諧。而我拘俗者。俊游日已乖。欲濯纓上塵。何時與君偕。

讀雜說小書

長日無與語。聊及齊諧書。紛紜六合外。莽眇三皇初。近旣難必有。遠亦非必無。古今夢寐間。過事蚤蚩如。達生齊萬物。曲士拘一隅。苟以忘吾憂。焉能識其餘。

初到淮西讀書申申堂寄友

稟性實無用。干名謬所望。中爲祿仕逼。誤有世俗償。組綬見羈縻。簿書正搶攘。語言畏時忌。談笑憂事妨。往者託山林。未能下羲皇。邇來失吾真。終日幾發狂。期會非本務。米鹽豈大方。洒心賴篇籍。發興依松篁。朋友素所畏。道路阻且長。怨極倘見思。寄聲慰離腸。

夜讀漢書

明燈一編書。往古千歲事。值歡輒孤笑。觸憤還累歎。四旁寂無聲。童僕正熟寐。歡憤雖不同。均非平和氣。可憐自戕伐。忽忽老將至。反愛童僕愚。冥然不識字。

和永叔寒夜會飲寄江十

昔與江翁別。酣歌國門道。黃花落酒罇。白髮藉霜草。本謂此行遠。定知此樂難。豈意二三子。復爲今夕歡。主人文章伯。談道輒忘倦。每至絕倒處。恨不使君見。鳥迹上古書。龍頭冢中器。其人骨已朽。感此相與醉。呼問西飛雲。游子何當返。寒風吟枯梧。歲月益已晚。吾聞太華峯。乃有神仙居。莫逐秦時人。獨結山中廬。
永叔出所收古文碑碣及龍頭銅鎗示客以張飲興也。

三日同景仁鄰幾濟川晦叔景案原缺一字呂祕校劉判官會南曹飲五君皆尙書外郎劉呂

修唐書官

秋氣迎節至。立秋前一日涼雨乘高風。車馬散北闕。冠蓋會南宮。從吏殆成隱。玩歲復將窮。簿書幸無他。談笑偶多同。郎選冠一時。史才映羣公。著書駭深妙。聞道惴顛蒙。但願竊餘論。常此樽不空。寄迹三署老。

不慙顏與馮。

期鄰幾飲不至醉作江侯詩并解座客

秋雲樂邂逅。拂我榻上塵。江侯舊多信。今作叵信人。我求江侯意。因得江侯真。乘興本當出。興盡便回輪。已諾雖可嘉。將非俗中倫。棄言似不誠。未害方外羣。江侯不爲名。名者實之賓。江侯不爲貌。貌疎意自親。作詩解江侯。飢渴夜復晨。

十月二日邀鄰幾飲裴二如晦來遂留至夕

晚下石渠閣。方轡得傾蓋。天寒畏于人。卮酒自相對。裴侯非宿約。來預心賞會。吾季方家居。四坐客解帶。獻酬雜嘲謔。歡笑以爲快。幸無俗中士。形迹一不怪。蟋蟀鳴高堂。歲月聿已邁。于今鮮吏責。無所憂其外。但當勤來顧。數醉此庭內。良無德與汝。聊足紓慷慨。

和貢甫瓜步詩

江介多悲風。川廣不可越。畏塗非吾土。游子愴明發。羣山起楚蜀。衆水會溟渤。地險自適然。天衷豈端設。憑陵三雄際。偃蹇五國末。非無英雄姿。于此智勇竭。疑城尙虎踞。戎馬餘飲窟。人謀雖工拙。神物有予奪。請陳真人朔。頗事丹浦伐。風雲掃氛埃。雷雨救焚渴。禹功東漸海。漢使南誚越。太平自茲始。盛德信貽厥。

和江十雨中與持國師直飲

旦上天祿閣。暮直承明廬。避喧雖足慰。取適固已疎。佳雨及我暇。茲晨殊晏如。紵絺委冠帶。高枕睨庭除。

熏風散微涼。潤氣浮郊墟。沸聲湧江瀨。暝色晦綺疏。驚電時爍目。疾雷不廢書。商歌動金石。塵谷盈鼃魚。此樂不可改。古人良起予。惜無同音賞。幽獨成離居。聞君達壘壘。樽酒會朋裾。高賢臥家巷。固多長者車。寧無寂寞者。閉關講玄虛。

不飲

憶昔常好飲。非以酒多味。親友惠茲適。笑語坦無畏。不知天地廣。豈問歲月逝。爾來顧可憐。自覺不如意。秋風正蕭騷。萬物盡憔悴。頗欲濯旅懷。無人共昏醉。獨遊何時歡。白眼向茲世。

石頭城

石頭非人力。翠壁百仞高。上盤巉巖雲。下激瀕湧濤。攀躋猿猴苦。游涌魚鼈勞。乃知百萬師。未易損一毛。混茫有開鑿。形勢豈一朝。太古至德世。斯民各逍遙。艱難非所嬰。秦漢仍寂寥。發揮自孫氏。力控劉與曹。基業何崔巍。謀謨亦雄豪。龍蟠與虎踞。勢足萬古牢。德義苟不修。忽焉亡其操。繽紛不一姓。氣象何蕭條。往者游獵區。盡爲黍稷苗。前事不可忘。後來鑒孔昭。客行倦煩促。勝槩愜所遭。眇然抱幽想。慷慨成鬱陶。古人若騰波。逝者日已滔。壯觀誰與論。悠悠背行舫。

直舍留道粹廣淵君實聖民伯初飲是日鄰幾濟川宴王金吾園亭不預會戲作五言寄之

校讎中祕書。聞子宴城隅。大第丞相府。主人執金吾。浮雲駐清唱。回雪舞妖姝。金壘溢醕液。犀筯厭鮮腍。高談鬱不發。應接固已劬。我從四五公。置酒此石渠。開牕掃殘雪。列俎焚枯魚。欲言規姚姒。小說本虞初。

不知敝縕寒。未覺膏梁殊。從容忽竟日。此樂亦誰如。長安事交游。貧富固有徒。不恨我失君。恨子不顧予。回頭成陳迹。萬事與化俱。題詩寄餘歡。毋乃笑其迂。

過聖俞飲

積雨不出門。局促如井蛙。初晴強人意。今日來君家。下馬笑握手。埽塔去塵沙。銀瓶撥醅酒。紫碗雙井茶。黃雀隨素魴。安榴雜木瓜。舉非一方物。遠或萬里遐。不知王侯宅。此味何以加。扶疎庭下槐。燦爛盤中花。春事豈不多。遊覽何必賒。與公平生親。總角見髮華。飲當外形骸。語當恕喧譁。縱心倒所詣。相對白日斜。江韓亦我徒。但恨宿約差。願使公多財。此樂寧有涯。

招鄰幾聖俞和叔于東齋飲觀孔雀白鷗及周亞夫玉印赫連勃勃龍雀刀辟邪宮壘數物又使

女奴奏伎行酒聖俞首示長篇因而報之

前日俱遠別。夢中每難期。何言一堂上。相與同宴嬉。幸勿卑陋巷。陋巷何獨卑。幸勿辭樽酒。樽酒安足辭。君看籠中禽。亦有山林思。習習不如意。焉用文章爲。君尋古人物。信有陵谷悲。擾擾不自適。會爲後世蠅。促節無窄袖。緩歌逐鳴絲。自美亦自惡。貴賤吾不知。縱談劇虛舟。快飲若漏卮。人生但如此。爲樂自一時。誰言冬夜長。俛仰星漢移。念無千金壽。愧子勤稱詩。

答黃寺丞紫薇五言

紫薇異衆木。名與星垣同。應是天上花。偶然落塵中。豔色麗朝日。繁香散清風。嬈娟雖自喜。幽寂逝將終。

主人謫仙籍。浩歌滄浪翁。卜居抗靜節。奉秀憐芳叢。猗猗庭中華。固爲悅己容。如何又將去。含意默忡忡。青苔侵履綦。搖落知歲窮。獨賴君子德。庶幾甘棠封。

曲陽亭送別

海濱寂寥地。送別何須頻。數上曲陽亭。自然愁旅人。晴日排寒色。清光湛齋淪。微風海上來。滿目飛魚鱗。孤雲去無所。野鳥鳴相馴。信美非吾土。送目倦南津。

寄貢弟

勁雪翔空林。積雨荒茂草。哀鳴聞離獸。驚棲見羈鳥。時逝運自頽。物壯勢還老。感至境寥愴。悲來色枯槁。玩此豈有極。辨之苦不早。如何復傷別。咫尺成遠道。

和弟自京師來

四海無風濤。五年再相逢。會合如此難。況我罹百凶。悲端素填膺。觸事淚滿胸。欲言不能語。豈知涕所從。良久得仰視。恍忽如夢中。非復平昔遊。豈復平昔容。危生若霜葉。懷懷待烈風。不有親戚歡。其如憂思攻。破啼強爲笑。意氣徒衰翁。慰爾友于情。急難義所隆。

送秦州通判陸學

秦地天下險。秦兵天下強。曩在景祐末。叛國正陸梁。渡河窺中原。不見飛鳥翔。漢將雖城守。覆沒猶相望。時秦獨高枕。毫髮無所傷。豈惟形勢然。固亦任使良。近者敵已弱。旄頭滅無光。尙須得猛士。分命修封疆。

陸子吳中賢。英英富文章。作人易感激。遇事殊軒昂。舊知軍中樂。復愛邊地涼。不忍京塵間。著書鬢毛蒼。拜疏如終軍。請纓督羣羌。大笑朱買臣。衣錦憐故鄉。旌旗導前車。絲竹鳴後房。指呼百夫走。談笑千里康。雖云半刺史。其實專一方。古來成功名。奇偶不可常。得時或幸會。微賤升廟堂。況君閱詩書。智策未易量。協心得元帥。展意輸所長。朝廷酌勳閥。曾不矜銀黃。他日重見君。非復東觀郎。

貢甫在京口阻潮未渡

向晦月消魄。楚濤爲之衰。坳堂無深涉。客子緩歸期。吟遶沙步闊。眺賞秋山時。大川奔南島。落日明西垂。登高旣易賦。懷古豈難詩。喟彼一帶阻。積此三歲思。何當命海若。利涉慰調飢。

淮西延平以詩見寄因書陝城卽事用酬來唱

陝郊古云重。雄勝地所該。羣山左右顧。大河西北來。府署憑中高。一日萬景開。是時八九月。秋色清池臺。樽酒雨餘酌。笙歌雲際回。追歡緬前會。真樂非昔陪。賓客雖日過。禮俗多嫌猜。于焉備廚傳。安得忘形骸。神交與心賞。懷舊何悠哉。

送獻臣是時獻臣侍親之淮南予亦旦侍行臨荊州獻臣先從東門出故有此作

風土樂荆楚。塵埃倦都洛。東遊欣邂逅。勿復驚離索。尙悔不同舟。令人慙李郭。

送客不及

欲折楊柳枝。贈言別所思。日落飛鳥息。孤帆奔何之。行人樂前途。何以寬我懷。還將別離思。吹示橫笛兒。

送鄰幾

日沒崑丘峯。月出滄海波。區區三萬里。相望能幾何。一出仍一處。一合復一離。正爾人間世。無復懽笑時。子行何忽忽。將老思所試。恨我無羽翰。不能省君治。黃河從天來。太華出雲上。登臨若相思。寄聲問無恙。蒼蒼南山桂。歲暮獨華滋。非無棟梁用。道遠莫致之。黃雀巢其巔。螻蟻穴其卑。全生亦以遂。匠石空復悲。兩唐邁清節。千歲接光輝。珪璋固特達。鴻鵠佳羽儀。庶幾朝廷老。出入王者師。何事江湖間。浮沈衆人爲。我實牛馬走。不能強繫維。欲往路苦艱。愴茲四愁詩。

送直溫

終軍西入關。棄繻笑路旁。丈夫貴成名。用此還故鄉。雖無魯儒操。意氣殊激昂。稚齡如頽波。詎忍鬢髮蒼。若人汝南秀。契闊升我堂。宿昔夢生翼。已排九門翔。未盡復來歸。帝閭隔微茫。高臥三年暗。忽隨南風揚。萬里快超詣。豈知道路長。努力戒後時。相勸不可忘。

送孜生

遭遇爵位輕。治平進取難。不見明經士。白首成一官。憐爾吾家駒。學問知所安。得名萬衆中。奮迅生羽翰。天子臨廣廷。公卿肅衣冠。傳呼署甲乙。誰不傾日觀。我時忝陪侍。趨拜玉座前。鄂秀萃亦榮。不自知欣懽。勿言勢尚卑。無以地固寒。鸞鳳曾棘棲。蛟龍亦泥蟠。孟軻稱三樂。富貴不與焉。恨我不如爾。千鍾益悲歎。


奈何方遠別。浩蕩江湖間。臨分豈自勝。流涕空洄瀾。

過楊十一公縉之延平

寡欲求易給。縱心居常安。一爲淮陽臥。及再芳歲單。處事非事事。居官豈官官。念以拙者效。而爲朝責寬。故人懷英邁。撫轡辱盤桓。心期謝外獎。談笑用爲歡。淹泊遂將永。望舒毀其團。別君感匏繫。更欲愁且歎。功名世所濟。時節不可遲。夙昔聞斯語。至今良獨疑。筋力與時背。進取將願違。譬如寶燕石。無用于重貨。不恨歲月晚。畏爲豪俊嗤。見君復感歎。吾道其如台。古之英賢人。隱顯亦不齊。出處各努力。悠悠慰我思。

送子南

南師鼓琴者。餘力推步精。千里求知音。徒步入王城。能高頗自負。一一游公卿。朝廷富貴人。寵辱心若驚。聞至必解榻。招邀劇生平。以茲祿命術。獨得當時名。朱絃與素徽。棄置莫爲聽。往往默自撫。或疑非斷聲。紅塵車馬中。隨俗翻營營。振衣忽長歎。吾已知時情。卷橐卻東下。野風蕭然清。且賈山水意。永待鍾期生。



公是集卷十三

五言古詩

幽懷

山梁鳴雌雉。節物春已深。故花稍辭枝。新葉漸成陰。流光不可挽。四序密相尋。今晨已非昔。明日豈復今。自我愜幽獨。放言冥此心。胡爲復屢嘆。孔聖有遺音。

送隱直侍行陝郊

相如忽將老。推輓竟無力。如何羈旅後。棄我復遠適。貧病束我身。送子恨不得。時登高丘望。塵土蔽西北。山河繞秦隴。關陝入胸臆。形勝懸眼前。顧盼生感激。指陳出圖像。踴躍効功績。朝廷厭兵久。勉上平戎策。

九月三日遊樂郊作五言贈同遊

昔在西省直。常有中園思。今來非吾室。猶稱宣城詩。芳郊後搖落。秋物尙華滋。丹實何纂纂。黃花復離離。俯見淵魚翔。仰觀雲鳥嬉。物性附所適。吾生亦爾期。置酒得同好。追勝不知疲。和歌涼風起。看舞白日移。興言想丘壑。弱喪慚旌麾。負郭如辨此。懷金寧足爲。

夜月露臥

微月翳西林。繁星燦如錦。歡言戀清景。展席不遑寢。涼風能相期。沆瀣若可飲。勞生傷局促。徂歲急苒荏。爲君捐萬慮。高臥且安枕。

因季點同幕中諸君過車輞湖步行野間

山野宜獨往。出郭愧賓從。終爲吏事役。猶與賢者共。平湖色清淺。霜落冰始凍。遠郊氣氤氳。臘近春稍動。鳥飛甚閒暇。獸起或驚縱。愛此去人遠。相勸解君鞚。崇岡象嶠阪。宿莽似雲夢。游目際天地。褰裳凌菰葑。吟非騷人怨。賞及舞雩誦。塗遠意逾適。笑彼阮籍慟。

適野

夏至無與適。驅馬出東城。漸去市井喧。稍增耳目明。風勁山瘦高。露寒水澄清。造景不及言。暢然得此生。姓名謝朝隱。出處與物冥。豈伊漁樵合。鳥獸亦不驚。待此用卒歲。優游諧我情。

挽葉翰林

翰林氣英發。博學起徒步。初射東堂策。已稱濟時具。出人三十歲。差池千一遇。青雲得自致。白眼與俗迂。勁節凌秋旻。玄文匿深霧。尺璧可令毀。堅石難使鑄。董生膠西相。賈子長沙傅。終疑希世才。良用制作誤。銜悲去修門。舐望動行路。落落長松姿。歲晏悴霜露。平生慕高名。邂逅隔清晤。心許千金劍。無由挂君墓。

端居

端居亦無賴。幽賞每多違。扁舟試獨泛。鷗鳥肯相依。日暮無所詣。興盡復還歸。

答黃寺丞九月二十一日出郊

閉關予非用。適野子能謀。勿言雅俗異。卒歲共優游。清詩狀景物。秀氣豁霜秋。篇終寄一笑。因以緩心憂。

讀三國志

獨夜一卷史。上尋千歲間。咄嗟興廢更。俯仰朝市遷。古人病無聞。愚智矜後先。共樂無窮中。正如朝露然。向觀功名際。自以皆萬年。邇來令人悲。蚊蚋過目前。安得謝浮俗。高舉凌九天。捐書以絕學。寄心崆峒仙。十二月二十一日雪中早朝

海風水羣飛。中夜滿城雪。聞雞倒衣起。猶謂庭下月。出門望天地。高下同瑩潔。念非汗漫期。驅馬正迷轍。我本江湖人。雲端想華闕。今來悅自失。旅唱空愁絕。

彥文書將遊吳中

微霜下芳草。日月逝逾邁。青青松與柏。歲暮兩相對。念我平生遊。孤懷用慷慨。誰言千里近。引領若海外。清潁流東南。浮雲向吳會。臨風意莫展。將子多自愛。

寄王子堅時在寢丘治東臯

達人視天下。輕重如浮雲。震雷不經聽。蟲飛寧足分。吾慕龐德公。谷口自耕耘。身世兩相棄。放言麋鹿羣。此風久難尙。之子今復聞。我亦問津者。滔滔遠慙君。

菊花枕

鮮鮮秋菊花。粲粲黃金錢。採掇時苦晚。棄遺情所憐。道人教爲枕。示可以延年。早昧攝生術。恐爲多病纏。又從省俗事。視聽苦不便。往往發昏憤。未知所除蠲。但使寐無覺。不謂藥可痊。今者誠有遇。祕之慎其傳。愈風得難老。高臥齊古賢。作詩敘終始。物薄戒輕捐。

答張洞推官

憂患使志衰。羈旅哀年邁。夙昔仰高山。邇來得傾蓋。孤游幸無恨。三益良有待。惠我金玉音。醒如濯聾聵。悵然反自感。久矣病昏憊。微君念氣臭。誰與振菅蒯。聆弦感英韶。觀海憚珍怪。內省終懸罄。無由報雜佩。

洪州黃推官

江表山水區。南昌神仙宅。固宜生賢俊。邈與塵土隔。昔在君伯氏。實爲萬夫特。文采何輝煌。聲名盛赫奕。差池中道天。冥漠神理默。德業誰與倫。天倫自準的。龍蟠豈終潛。鳥伏必遠擊。君今鍾其美。遠到未可測。

聞官輸竹箭毛翎

邊兵未云備。競矜弓弩強。斯人久銜恩。獻力固所當。上山伐檀欒。入林候飛翔。豈無解網心。大義須勤王。安得會稽嶺。集居共工旁。安得解羽澤。在君禮義鄉。山海經。羣鳥解羽有大澤。翦翎副之箭。一一堅且良。朝發摧西戎。夕發斃東羌。不煩天下民。萬里坐寧康。

秋日

平日日在簷。今日日在堂。西風稍已急。百草不復芳。蟋蟀何獨悲。戚戚鳴四牆。客子多所感。中夕起徬徨。

貧病自早衰。何必秋氣涼。心憂不能眠。非惟寒夜長。

桐軒晚坐

孤軒遶危桐。颯颯聞鬧雨。驚起視前除。飛花亂如舞。輕香密侵席。晚景容當戶。玉粉散游蜂。珠華濺高宇。紛紛綠苔上。半已隨泥土。邈彼丹穴鳥。何年翥文羽。芳時不可驟。歲晏柳容與。

李觀以太學助教召曾鞏以進士及第歸俱會郡下素聞兩人之賢留飲涵虛閣

孤鸞方北游。威鳳復南翔。邂逅中道遇。其音何鏘鏘。太平向百年。此固多美祥。擾擾都人士。爭先顯輝光。雖無醴泉流。江水清且長。雖無朝陽桐。翠樹茂且芳。念將萬里逝。願得少徬徨。爲君賦卷阿。因以謝楚狂。

秋晴

浮颿解重陰。白日麗青天。凜凜秋氣肅。蕭蕭風景鮮。脂車駕我馬。覽物往于田。幽興未能盡。中途復來旋。古人不可及。獨往祇自憐。豈若偃吾室。優游以忘年。

曉晴

朝光出屋角。鳥雀聲正喧。天寒未能起。緼袍有餘溫。智士困朝市。勇士敝中原。自古貴高臥。豈嫌長閉門。

送蔡奕同年

功名貴早達。時俗輕小官。念子兩未適。出門何獨歡。古賢有祿仕。先聖戒色難。義慊固爲美。勢卑豈足歎。采蘭歲云暮。接浙心不安。宛轉腰間絲。崔嵬頭上冠。車馬有光輝。里閭有簪觀。勉旃愛玉體。自致青雲端。

送裴煜同年

裴侯江海士。往者未相識。但聞太學生。素號萬人敵。羣雄會南宮。精鑒動宗伯。先鳴氣軒昂。一日聲烜赫。青雲開岐路。黃鵠張羽翮。多幸旅後陳。同時被親策。指縱聽高論。洒落駭餘力。不意沈下僚。予予有愧色。蘭臺校中書。幕府贊婉畫。起家固多榮。負米輕遠役。此心古人少。于義吾子得。秋風感羈旅。道遠思自適。

送楊關同年

昔在谷子雲。語妙氣縱橫。遨遊五侯間。談笑臨公卿。丈夫伸知己。未必老一經。懷寶迷其邦。古人誰謂平。楊侯東州客。三歲不飛鳴。雜沓二府書。繽紛委弓旌。結鞞西入關。長揖謝諸生。風霜豈不永。意氣故自輕。伊昔惟一劍。蒯緱吐悲聲。當令代舍長。見我珠履榮。

秋月

暮歸欲投息。明月強我行。越陌復度阡。古人知此情。叩門童奴走。升堂兒女驚。呼酒徑就醉。益復招友生。不可不與飲。子真勝公榮。顧聞四壁間。絲竹金石聲。此非孔子居。那得爾鏗轟。夜闌興不盡。積雲解我醒。噫嘻王子猷。浪得千載名。

韓文公畫像分題

微言昔廢絕。大道隨荒榛。上下千歲間。天將復斯文。若人實命世。述作參鬼神。橫制萬里波。不爲流俗珍。大音破昏聩。有若雷霆震。惜乎世莫用。竟以奇怪聞。哀哉揭陽貶。勢屈道則伸。孔子亦有言。求仁而得仁。

我昔讀其書。固常見其人。邇來觀遺像。忽若平生親。輪扁不言巧。丹青豈復真。尙存高山意。俯仰冀日新。

楊十一沒後重登見山樓有感

平生交一臂。觀化此山川。俯仰成陳迹。高低俱絕弦。浮雲杳何處。衰病兀蕭然。擾擾紅塵合。誰予慰目前。

臥北牕下讀書

高枕北牕下。柴門晝仍關。偶有微風至。欣然解人顏。瞑目恣遠想。超遙出塵寰。自昔太古來。幾人得此閒。讀書取適心。名譽非所攀。堯跖本不辨。況乃章句間。牛羊死牢筴。麋鹿安深山。牧性有不齊。何知智與頑。

寄贛

相去不在遠。百里若異方。相別不在久。一日如歲長。我昔不願仕。會知出處妨。因循竟不免。密勿猶自強。默默抱遠志。悠悠視流光。豈知豢雞鶩。止欲歸稻粱。飛鳥呼其儔。羈馬憶故鄉。況茲平生懷。奔走非所望。朝吟在子邊。夕夢居子旁。歲暮菽可採。云誰助傾筐。桑落酒當熟。誰復共稱觴。忽忽無一歡。昏昏坐中堂。拂衣告言歸。念彼穉且狂。作此聊自娛。我思不能忘。

八月六日寄鄰幾諸君

謬爲天官屬。得與選事親。略計三百州。綠衣九千人。今日以前在。曹人數較材。迷長短。守法愧因循。救末知不足。澄源力難伸。諸君備鄉老。多士競國賓。鑒形肖止水。播物參洪鈞。解論皆造微。詳延必逢真。仰成寬吏責。端本慰吾民。功則太平始。任非百職倫。聚精會冠劍。重鑰闕埃塵。寄重地必禁。問迹疎無因。風雨

何蕭蕭。雞鳴夜將晨。一日如三月。況茲別累旬。

寄王深甫

前日君遠遊。相憐每獨悲。寧知君未返。自笑還若茲。賢者易姓逃。聖者微服馳。聖賢不必容。吾道其如飴。浮舟潁水清。遠與塵囂違。卜鄰西郊郭。得近樵漁期。主人文章伯。聲望高一時。平生莫往還。見我如舊知。勢與年俱忘。胸中坦無疑。人當意氣展。何有憂寒飢。反思萬類情。糾纏未易推。向者雖定居。睽孤常不怡。邇來暫奔走。師友足自持。物或損而益。吾又何怨爲。且苟無陳人。吾豈能至斯。歲窮景蕭條。多感令志衰。須君濟其弱。嗟子何當來。

風雨寄貢甫

積雨不自己。季秋聞驚雷。行子方遠道。憔悴感我懷。流潦紛縱橫。高岡蔚崔嵬。左右無所覩。出入蒿與萊。百步一躑躅。十步一徘徊。村墟斷人煙。沈竈或產蛙。日月懸一隅。雲霧安得開。天遠人事邇。勞生使心哀。獨不如鳧鵠。奮翼超高飛。相望空長歎。撫襟泣如頽。

寄王深甫

城東與城西。相去咫尺耳。不得同朝夕。譬如隔山水。況茲歷三秋。正復累百里。念我誰與遊。悵然豈能已。古人稱莫逆。未必居密邇。自嫌感豫深。更失笑談理。寡陋使心憂。空虛見人喜。觀過而知仁。且當謝君子。

寄論翊

走馬平舒道。初日明三峯。嵐光共淡蕩。千丈青芙蓉。伊昔臨畫圖。但愛神仙蹤。安知復壯麗。翰墨難爲工。我行天地間。異景曾此逢。至今想見之。秀氣常沖融。世事勞人生。壯年成老翁。山中定見佳。恨未與君同。

寄永叔永叔後予數日使北

俱持強漢節。共下承明殿。相從不相及。相望不相見。平生慕儔侶。宿昔異鄉縣。展轉多遠懷。恍惚猶對面。桑乾北風度。冰雪捲飛練。古來戰伐地。慘澹氣不變。贈君貂襜褕。努力犯霜霰。一尺握中策。無由奉深眷。

寄鄰幾

昨日非今日。今吾非故吾。蟲鳴知歲晚。鬚變哀年徂。萬事異俯仰。達者與化俱。故人千里外。高義獨何如。眷眷尺素書。湛湛雙酒壺。勸我加餐食。示我長相於。可憐平生好。不異東西居。我今心如結。那得從公舒。

寄佑之

長安風塵地。見子若舊交。意氣何激昂。骨幹真蒲梢。戎馬擾邊封。殺氣連二嶠。丈人國長城。多壘憂四郊。勁兵向海西。千里沸鼓鐃。共傳校尉印。勇略如虎虓。功業繫感激。念當覆妖巢。秋風日夜清。敵人知折膠。努力張國家。寄聲慰衡茅。

寄貢甫

貧別書信闊。接壤如天涯。沈憂心腸窄。少日如歲時。食荼苦在味。集蓼辛在外。百感從中生。通夕不遑寐。世路豈飄風。游子常轉蓬。鏡中見二毛。何啻非老翁。晚慕馬少游。結廬守鄉井。簡略或易足。長當並形影。

寄張宜 福州人教弟子數百人多成進士者

張君子禮樂先進野人也。曩者吾見之。大驚彼何者。鬚眉交蒼白。被服必儒雅。故善殷周間。不居王鄭下。諸士多及門。之子獨在野。食有脫粟飯。出無款段馬。鄉閭行雖高。時俗知亦寡。昨聞修庠序。造士繫陶冶。斯人宜聘起。可以專楚檮。養賢須勤渠。風教隨用舍。望君萬里餘。誰謂我心寫。

寄阮二舉之楊十七彥文

我昔居宋都。潛有伐樹憂。不期得君子。卒歲同優游。楊生舊相知。情分故綢繆。阮公出傾蓋。而肯如白頭。古人有忘年。嗟我非此儔。譬如羔袖微。豈可參狐裘。知人視其友。孔聖稱焉廋。所以梁楚間。亦聞東家丘。相從未云厭。相別難自留。贈我數百言。精神露蛟虬。楊子期我用。謂當佐王侯。阮公推我文。云可齊尹歐。斯言豈易當。斯道豈易求。奈何千金珠。中夜而暗投。書紳願自勗。雜佩非可酬。欲知相憶心。淮水清悠悠。

寄楊阮

中堂明華燈。宥坐湛清酒。筆硯居我前。史籍在我後。君知我不樂。我念平生友。強醉誰與歡。悵然夜將久。

溫柑

后皇富佳樹。柑實掩羣衆。磊落驪珠圓。參差金壺重。剖丹瓊瑤碎。蓄潤霜雪凍。封苞萬里險。照耀高堂供。憶昔伯禹籍。蒼茫闕斯貢。及乎騷人賦。流落遺爾頌。反登橘柚輩。海物隨錯綜。圖讎迷萬世。不平竟誰訟。頗疑古未有。彼故得豪縱。溟海通蓬萊。近由仙者種。又疑美過絕。讒口斥不用。寂寥三王時。此理彌可痛。

安得舉其族。北遷越巖洞。歲比萬戶封。獨煩與人共。

贈山僧

貧病不出門。趣與時俗乖。高臥謝賓客。秋葉忽滿階。今日爲誰婦。釋子遠見懷。問我平安否。曠然外形骸。貌疎意如真。語淡情反諧。旅人非一感。及爾能安排。聞道常愧晚。智也豈有涯。他日更解榻。虛談慰心齋。

達師

師雖支離流于道。乃全人未嘗事感豫。來者自欲親。時時平是非。往往動精神。縱橫及萬事。慷慨驚四鄰。乃知全一身。不必山野民。乃知憂當世。不必朝廷臣。語默兩有適。動靜皆可循。彼哉小丈夫。孰能識吾真。

喜晴寄彥猷

積陰向十日。不見江南山。何意浮雲盡。依然庭戶間。芳草晚已歇。瑤華初可攀。故人在遠道。悵望凋朱顏。

永叔西齋送冲卿知陝府得華字

我求一州牧。竟至無津涯。相看佩銅虎。似欲凌青霞。分陝本相事。憩棠成棣華。君元兄大資。政于陝有遺。愛優游山河勝。肯厭多風沙。

後出郊二首

人遠地形曠。氣收天宇高。不辭乘興出。直恐應接勞。送雁時揮弦。羨魚復臨濠。君知適意樂。未悟生二毛。歲晚農事畢。里閭競歡然。相見有餘情。獨游頗忘年。上懷羲皇世。下感沮溺賢。豈以六金印。而輕二頃田。

黃詩中頗有田野意故及

涼榭許道甯畫山

許生擅邱壑。融結隨毫端。醉掃堂上壁。參差皆可觀。飛雪暗連峯。對之中夏寒。吾能捐萬事。于此聊盤桓。

公是集卷十四

五言古詩

獨釣南湖

澄澄春波深。中有魴與鯉。無人收潛隱。好生得吾子。投竿坐孤石。盡日倦未起。既失常若驚。有逢忽然喜。子心豈殘物。子道豈娛己。人誰辨子意。我請盡其理。垂釣須得鮮。治國須得賢。所以不憚勤。豈無蝦魚間。君子愛其君。諷諭以爲先。詹何臧丈人。古事皆已然。誰將子之術。更誦吾君前。

負暄四首

歲晚天地閉。積陰凍乾坤。大鈞止亭育。羣鬼私自尊。竊弄造化柄。擅令衆陰存。幽紆發玄漠。死氣蒸黎元。朋黨漸相蔽。大辰訴其冤。帝惟百物憂。恐不見陽春。敕使拘衆鬼。朝曦送微溫。大明煥幽鬱。和氣迴崑崙。初曉尙餘稟。漸高遂增暄。煩冥避窮朔。玉燭調中原。衆蟄久僵殍。今來更騰騫。微禽鷦與雀。弄影勢飛翻。草木反生意。益思擢鮮繁。潛魚離冰穴。無數遊清源。嗟我同此慶。兀然坐朝昏。緼袍幸可賴。卒歲無復論。稍稍出辭氣。仰天荷公恩。始知過狐白。願得陳至尊。昔宋有愚叟。亦能款君門。況今事西討。十萬羅囊鞬。烽火通警急。鐵衣遶夷番。幸悲墮指魄。少慰無衣魂。誠使勝挾纊。豈在衣便蕃。斯言出感激。忠信非詐諛。

何由露天聽。虎豹守天關。

南極無永晝。北方多苦寒。負暄意頗適。容膝居亦安。嘯傲長者轍。崔嵬切雲冠。道書異俗味。稚子同大歡。不覺老將至。安知利害端。

被褐暖不足。負暄溫有餘。內慙意氣狹。婉孌在庭除。清晨倚西楹。夕暮守東隅。常恐浮雲起。冰雪不須臾。靳靳懷薄願。安得留飛鳥。

日出東南隅。晨光散瞳矐。山形西北去。暖氣浮沖融。天地大逆旅。客身一飄蓬。胡雛啼朝霜。邊馬嘶朔風。獨懷負暄樂。未許斯人同。歸當獻天子。無乃笑愚忠。

遊仙

焦明滯常處。蟪蛄愁永年。淺俗更相訾。曠懷自邈然。我從造化遊。竄立萬物先。四海固咫尺。大椿不獨延。日月爲我駕。昏明相回旋。超遙無終薄。浩蕩遺拘攣。豈與功名士。姝姝以暖暖。智極蝸角下。形敝朝榮間。

種萱

種萱不種蘭。自謂憂易忘。綠葉何萋萋。春愁更茫茫。古人有虛語。名實未必當。南箕與北斗。燦爛空成章。

讀莊子三首

簫韶豈不美。爰居終自悲。俛仰魯城上。驚顧不能怡。伊昔舜廷內。鳴鳳爲來儀。和聲詎中變。衆聽邈難齊。澆淳懸異代。聰昧未殊施。咄嗟播鼗武。永泛滄海歸。

漢陰灌園叟。抱甕力難任。規爲一何拙。機事自傷心。賜也不受命。媿之汗沾襟。至言與世邈。幽操非俗尋。以此高宇宙。豈知倦山林。彼哉夸奪子。佩服爛朱金。商丘有奇樹。厥生非一朝。脩根走靈社。騰榦擎赤霄。拳局無大用。液穡不可彫。誰謂非世器。終焉托逍遙。致身適有遇。松桂寧免樵。

吳中大水有負郭田在常州云已漂潰作一首示公儀

百谷馳東南。三江繞吳會。積陰漏雲漢。涌水翻積塊。斯民旣昏墊。我稼隨顛沛。魚鼈有餘糧。郊原靡遺穗。餬口竊自恕。矜寡將何賴。天道有盈虛。吾寧罪于歲。救飢苦謀拙。禹稷不可待。行矣帆長風。因之浮海外。

覽古二首

固國不須險。用兵不須強。域民在所守。威敵在所良。由余仕諸戎。秦穆警封疆。晏子猶在齊。范昭識難亡。小國有其人。大國豈易當。奔何億萬師。牧野遂煌煌。天馬出西極。由來中國用。榘楠秀荆楚。乃作晉梁棟。遺材彼興憂。得寶此以重。伍員楚亡命。一旦摧郢衆。世薄事有然。申胥得無慟。

和聖俞織女無恥羞

織女有恥羞。歲一過牽牛。暫來已遽往。光景不少留。會合一何亟。別離一何脩。不知靈匹意。正使令人愁。河漢清且廣。風波無時休。蹇修古不存。烏鵲相爲謀。理拙心莫同。誰令結綢繆。蛾眉坐自老。紈扇空悲秋。

同獻臣七月七日夜詠牛女

熒煌昭回章。婉孌靈匹燕。薄霧垂網衣。明星綴華瑱。潔身奉君子。所幸長願眷。風浪既多艱。歲時劇飛箭。會賒別堪疑。那能鬢不變。願構虹蜺梁。與君長相見。

觀水

楚山積陰霖。百谷盛號怒。虎豹亡其曹。蛟龍失所據。勢排蒼崖裂。力與巨石注。頃刻浮青天。微茫浸高樹。茲城依平原。自古比懸瓠。汝南城謂之懸瓠。墊隘安敢辭。漂浮實所懼。禹功不可及。河伯欲誰惡。甯以蛙龜歡。姑爲下民蠹。築防力不足。疏瀉志猶慕。安得鞭馮蠡。從茲萬里驚。

喜雨

海上雨初至。中庭樹交翻。幽人整冠帶。喜見雷電存。積潤瀉河漢。餘滋被丘原。魚龍儻可活。鼃黽誰嫌喧。稍稍秋欲變。微涼入前軒。古人致豐饗。吾亦開吾樽。御叔小丈夫。頗知笑臧孫。賢愚定誰是。興盡忽忘言。

送張氏家姊至丹陽早別

曠野涼氣早。八月風已寒。遙雲結層陰。白雲被芳蘭。徬徨步皋隰。忱惕傷肺肝。奈何遠別離。涕下若波瀾。

木鴈堂

聽訟吾猶人。安得終日閒。從吏已可知。拂衣未能還。逍遙及餘暇。苟且寬心顏。洒掃延清飈。空涼闢重關。古人有所處。才與不才閒。持此以自娛。將非真隱然。

寄題蕭山歲寒堂

伊堂早頽挫。松柏亦憔悴。常恐摧爲薪。中途失蒼翠。昨來始營葺。榱桷復高麗。蕭蕭青雲榦。始有百丈意。神明頓來還。故老咸歔歔。朝燕得所常。問誰救其敝。吾家渥洼駒。頗有超絕氣。好事能復古。愛奇輒起廢。後凋甚明白。來者思髣髴。此實賢智謀。古人貴豈弟。仲尼頌子產。其養民也惠。召公憩甘棠。後世歌蔽芾。勉旃崇其業。事足伯父繼。伯父曾宰此邑。令名與佳樹。自可俱億歲。

示鄉人陳生祖母之姪曾孫

我祖學廬山。潛光玩詩書。君家獨先覺。一見矜里閭。固有如陳平。長貧賤者乎。青雲果自致。遠鑒驚羣愚。鳴鳳兆有媯。懿占信不誣。粲然諸子賢。仕各列大夫。號稱萬石君。盛事衣冠無。聲華輝圖史。豈獨榮粉榆。外族繼清高。恥爲事物拘。未嘗入城府。奕世風不渝。宜有羔鴈求。怪其久闕如。君來就鄉賦。信足光慶餘。郡守勸駕行。紫庭與計俱。努力事學問。豫章擢扶疎。游子懷故鄉。矧伊接葭葦。勉率爲歌詩。尙能念起予。聽府妓歌憶春卿資政給事

南方酒如澗。醉倒本容易。蔡姬緩聲歌。清響動雲際。惜哉知音稀。此輩自難值。曩者東山游。一日已三歲。人遐成陳迹。興盡失超詣。寥寥方外歡。獨數嵇阮輩。凍雲臨寒空。掩鬱邁往氣。引杯亂愁思。擊節還拊髀。

招數

鑿井不及水。雖勞乃無功。耕田捨終畝。歲暮安俟豐。人當少年時。耳目明以聰。所爲患不能。所學患不通。

患之不自勉。老去逾顛蒙。雖復欲自力。歲時已飄蓬。譬彼涉大水。不能曉西東。諭爾安可忘。我嘗夢周公。

朝乘

朝乘日車出。暮戴星影還。顛冥朝暮中。出入咫尺間。已覺素志非。更知人理艱。小利專欲速。大德不踰閑。

雪

楚塞常閔雪。窮冬未爲晚。欣看朔風過。想自萬里遠。崩騰龍沙飛。浩蕩北溟卷。勢排炎荒瘴。力救南國旱。悲鴈飛何之。蟄龍臥終偃。至神亦憔悴。爾輩何繾綣。歲陰倏將改。天運有必反。慷慨吾何言。短衣數自挽。

復雪二首

十日三雨雪。同陰錯朝昏。幽人感歲晚。更覺日月奔。勁風西北來。轟哮動乾坤。中州非崑墟。四徹皆璵璠。鴻鴈遊可哀。竹柏生僅存。念此使心悲。何時見陽春。志士則憔悴。薄俗安足論。鄉里狐貉兒。反怪天正溫。前夕盛雷電。謂言春和發。典衣貫春酒。歲事亦可悅。不知天難謀。言宿更凝冽。朝來雪盈尺。初計頓乖越。吾廬甘重塞。敝褐忍百結。豈敢咨祁寒。又非慕炎熱。陰陽相交錯。萬一成災孽。憶昔魯隱公。九年春三月。癸酉雨震電。庚辰大雨雪。春秋書爲法。其事何照晰。曾經聖人筆。下學而上達。況此四月間。復當季春末。願排閭闔戟。一獻春秋說。路遠泥阻深。愁哉臥巖穴。

書堂

客身困旅人。未如負舍蝸。滾滾荆吳間。所居不常家。宴安非吾事。但恐髮早華。且復一日暮。隨時具生涯。

白盛爛四壁。瑩淨磨疵瑕。虛明豁心府。永使思無邪。愁來莫與語。起就書龍蛇。亦足寫方寸。放歌快咨嗟。苦嫌中庭窄。所生野草花。故須種松竹。反憶日月遐。歲寒與誰共。惆悵終無他。

答江丈雨中

繁陰乘炎夏。晦色竟朝暮。蛟龍困雲雷。虎豹病氛霧。過時畏昏墊。推分縱所遇。閉閣空自愁。救飢眇無素。江侯臥閭里。本自濟時具。方與造物遊。昔同斯人慮。作詩破幽憤。極筆紆遠慕。磊落三賢人。千秋如面晤。道同義相契。未必形影附。長謠雞鳴篇。因見君子度。

九月十日雨中孚先見過園基嘗茶

幸從大夫後。而無吏事憂。出沐風雨夕。閉門松菊秋。素交辱見過。意氣何綢繆。車騎皆雨立。富貴若雲浮。園基紆壯心。酌茗當獻酬。豈惟鄰里好。足慰平生游。書籍可許通。水火得所求。獨恨雞黍薄。無以充淹留。我窮若匏瓜。于世良悠悠。寂寞守一隅。非君誰見收。庶幾除三徑。玩此歲方逾。莫令子衿詩。更作商聲謳。

渴雨示府僚

東風破窮陰。農者亦望歲。宿雪滋已消。驕陽更爲沴。璣衡運元化。律呂導和氣。四序宜平分。斯人尙憔悴。關中大兵後。所向半凋敝。荆棘獨至今。睠言可流涕。憶昨辭紫宸。從容畫民事。焦勞見顏色。曠蕩洒恩惠。開倉出其陳。履畝奪浮議。乃知聖神心。獨在舜禹際。所憂吏不稱。未足效兼濟。安得三日雨。滂沱澤厚地。百昌奮皆作。吾亦免于戾。吁嗟望雲漢。冥漠想萍翳。交泰及此時。羣生豈終否。某朝辭日。面陳發倉救飢。

及罷均田履畝之擾皆見許

成冬

富貴抱憂患。貧賤苦煎熬。居此二者間。幸無終歲勞。養生賴裘葛。卜隱開蓬蒿。既不碌碌冗。又不巍巍高。炎涼縱所遇。寒暑俱可逃。竭力供子職。大歡對兒曹。至人貴真樂。名位豈所饗。咄嗟路傍子。生死堪悲號。

卜居謝晏公

燕雀赴廣廈。雞鶩就卑棲。我身共有託。生理于汝齊。憂患歷險艱。轉徙疲東西。常慕蠻與觸。所居能自贖。哀吟蹈楚郊。主人欲招攜。卜築煩里旅。婦姑免勃谿。此邦非故鄉。習俗素所迷。頗以羈見忌。得安糝與藜。下見賢相仁。恤隱逾天倪。陰德少陽報。眉壽與介圭。已當受一廛。終身恬灌畦。

卜居

清波照華門。垂柳拂危軒。靜境偏相慰。鳴禽時一喧。羨魚還結網。引米自疏源。嘯傲陶唐世。幽憂不可諼。

蘆泉

吾山會雨澤。汗漫千里秋。不如蘆泉水。來入城中流。經營萬餘家。澄澈去無際。我樂與衆同。泉能起人意。泉旁宜嘉林。時多桐與梓。泉間宜美魚。時有魴與鯉。誰能捐萬事。來我泉上居。我欲解章綬。從之泉上漁。

浮光山人居山中與虎豹處初不疑憚有母八十餘

先生方獨往。逝與一世辭。雖未超雲霞。豈嘗顧喧卑。事親止于適。接物能不爲。谷中虎豹多。往往行自隨。

此是真人風。何必太古時。吾欲從之遊。自嫌跡尚非。寄心逍遙間。聊可以相期。

初到東平得雨

少服逢掖衣。又爲梁甫吟。謬膺東藩守。似慰畸人心。宣布祇上恩。浚明肅官箴。治醕俗易美。事半功反深。嘉雨蘇旱苗。慶雲結重陰。天將假民樂。我以開煩襟。鉅野會百川。東山凌衆岑。庶幾緩吾帶。一一窮登臨。

雨中送張六

秋陰蔽陽光。雨潦如昏墊。居人鬱無聊。游子行可念。方攜一樽酒。欲別情不厭。雖無車馬贈。篇賦私敢占。人生遠圖在。離索安足慊。願爲東南風。刮日豁長焰。取觴醉車軌。千里由此漸。

攝領審官六日還印長文戲作五言

山野不事事。未嘗中繩墨。得官筆硯間。懶與慢成癖。前日承君乏。始親簿領役。捶鈎校毫芒。簡髮差寸尺。自知非其任。良有不可力。君誠神仙人。那得頭不白。絲茲謝晞跂。依隱就閒寂。

桐花

一株青玉立。千葉綠雲委。亭亭五丈餘。高意猶未已。仙僧年九十。清淨老不死。自云手種時。一顆青桐子。

同梅聖俞送尹郎中監舒川靈仙觀

真人西度關。乃祖獨知之。強著五千言。竦身棄喧卑。靈光無時沒。人世自超忽。上下千歲間。裔孫亦清出。論兵復擊劍。遠與道同符。功名不如意。白髮笑桑榆。藏書天祿閣。郎中上所集。兵書詔藏祕閣。卜居天柱。

山此職無吏責。去去何時還。山中醉白雲。山下弄流水。吾已了損益。未知生死耳。聊登千仞巔。下視寰中塵。更因長風來。揮手謝世人。

記所居草樹

幽蘭晚已秀。新竹直且疎。樸檉亦巢禽。坳堂自容魚。長日肆炎赫。周軒正清虛。適心不貴多。一畝覺有餘。理會遺孤笑。興來味羣書。彼何擾擾爾。我獨欣欣歟。人臣無懷安。吏治猶遽廬。幸及三年淹。庶幾閒燕居。

銅雀臺瓦硯

當時鴛鴦夢。飛入魏宮來。崇構滅餘香。碧瓦空在哉。磨礱變新硯。洗刷滌故苔。但取圭角全。何必瓊與瑰。

樹下二首

中庭兩佳樹。密葉如翠帷。擢榦一何高。鋪陰被前墀。清風自翩翩。正晝無炎曦。拱揖在我前。我常往參之。隱几旦復暮。卷書坐忘疲。安知非華屋。聊以庇蔭爲。瑤室隕帝辛。璧臺喪周姬。由來滅亡禍。不爲草野施。偃仰更何顧。欣歡方在茲。

召公愛小棠。百歲俾勿拔。仲尼憩大樹。一宿輒已伐。聖賢豈殊途。人事有窮達。出處何可常。我身固微末。上無燕伯遇。下免宋人孽。從容聖賢間。得此亦已竊。

庭樹

中庭無多樹。花盡自成陰。熏風吹清和。午影還蕭森。上有出谷鳥。間關鳴好音。下有放言人。寂寞臥機心。

人鳥各相忘。語默不見侵。吾廬此最好。豈意在山林。

送石昌言知宿州

宦情重居內。世論輕守藩。出處苟自得。重輕安足原。昔常怪蕭傅。恥乘太守轡。頗獨多嚴生。厭直金馬門。優游樹風迹。宣布流上恩。何負廷中臣。而貶千乘尊。石侯古人風。自令薄夫敦。平日不汲汲。左遷更軒軒。輕舟趣行裝。合符去天關。高臥可以治。簿書豈所煩。我亦羈旅人。不堪市朝喧。又無適時用。坐自悲素餐。願爲江湖長。聊復育元元。子若未北歸。相過識吾言。

題和弟所居桐樹

卜隱謝林藪。考槃寄閭里。嘉樹爲我徒。清風濯塵耳。手披漆園書。身擬長梧子。窮秋忽悲感。掃榻且歡喜。

冬晚贈深甫

客游已昨日。已復歲月改。流光一如此。故物紛晦在。忽使中心悲。悠悠若浮海。相思間何闊。此意君當解。

公是集卷十五

五言古詩

效陶潛體

出門逢一士。抱書亦南山。問其何爲爾。欲語輒復歎。少小貴詩書。志業覬孔顏。爾來三十載。鬢髮條已斑。唐虞不可待。世譽亦恥干。甯赴巖谷老。行行未遽還。其言乃可感。使我再淒然。人生歸有命。窮達何足言。勸爾飲此酒。唐虞在其間。

懶詩

分表難強營。俗中彌不堪。始覺懶亦真。功名焉可貪。婆婆玩流光。幽寂性所諳。束帶愁逢迎。燕處倦交談。碌碌吏隱間。將爲茲世慚。

菖蒲

香清自足愛。味厚非所倫。如何缺缺徒。反以花爲真。花奇不可見。舉世皆忌辛。誰將擢仙骨。願比芝苗珍。

登薦福寺山亭

時事如不聞。煩襟尙鬱怫。高亭一何壯。俾我遺外物。是時夏景初。竹樹雨飄拂。燕雀飛簷楹。喧爭互強倔。

世紛類如此。小大何得失。始知絕羣動。方外真有佛。此地可終隱。不惟謝炎鬱。逍遙鞭其後。豈恨久蟠屈。

九曲池

廣陵春欲歸。九曲池先暖。積雪未全消。流波已潛滿。宮城落喬木。岸竹排纖箨。古事無足悲。登臨苦日短。

和永叔夜坐鼓琴二首

衆人于五音。醜正不醜隨。所以匣中琴。寂寂少人知。淳和太平風。簡淡邃古時。得意亦忘言。居然見無爲。

非公蘊真樂。此道誰復期。知音古亦少。況乃今人乎。至和動殊類。此則今世無。舜韶舞百獸。事可觀于書。但非耳目接。便自疑其虛。誰謂今之人。反不如獸歟。大音蓋希聲。聾俗或萬殊。中孚有不化。嗟嗟乎豚魚。

苦寒行

驅馬涉長磧。千里徑無草。天寒日光淡。積雪常杲杲。勁風裂肌膚。狐貉甚魯縞。況我被甲鎧。寢遲起常早。崔嵬陟高山。日落尙遠道。人生各有命。豈憚事遐討。飲冰傷心骨。重趼如巨棗。義深自勗勵。身賤寧要好。親戚何可逢。功名未自保。少年慕壯健。我獨貴疎老。

送霍邱謝寺丞

吾聞歐公客。必皆當世賢。衆中一見子。始信斯言然。綵衣得意歸。笑語春風前。輕賈尙方履。去影裊翩翩。百里不足仕。桂枝淹華年。故須多種秫。爛醉揮鳴絃。

答黃寺丞濠梁雜詠

閉門委餘事久矣。臥幽寂。忽枉臨濠篇。如逮問魚客。山川盡寫傲。人物多在昔。形倨游自遠。善行固無迹。吁嗟相知晚。起予遽多益。乃悟文字工。足兼造化力。熒煌淮夷珠。磊落荆山璧。他人竭澤求。吾子希世得。禽微戒輕彈。路暗慎虛擲。如何忽在此。詠歎生感激。蠙珠荆山濠梁事實。黃所賦也。因以爲興答。

黃寺丞九月十三日見寄

茲年見二毛。秋至獨多悲。況乃霜露繁。悟彼歲月馳。衡門靜無轍。幽徑荒不治。眷眷武夷翁。傾蓋成舊知。每枉林下步。笑言輒移時。目擊良已久。鳳歌復見詒。諒君徜徉意。當以振其衰。

生槐

萋萋庭下槐。蒼蒼山中檜。臭味久矣殊。榮枯莫相待。胡爲寓形生。曾不異風概。擢榦初無根。交陰忽成籟。死生詣膠漆。幼壯亂姿態。本同非不佳。末異終恐害。吾意造化巧。淫樂爲狡獪。玩此三公才。比之女羅輩。不然世俗簿。苟合恥剛介。忘彼特立姿。樂附柔弱類。誰能極物理。且以嘲大塊。陶冶如吾言。庸庸亦何怪。

櫻桃

東風吹陳根。萬木含芳華。客愁獨不改。浩蕩津無涯。朝光破浮陰。暄鳥聲交加。櫻桃此時盛。滿樹紛彤霞。當戶仍拂簾。參差自相遮。日高臥未起。顧見驚且嗟。此復幾日繁。譬如空中花。非無一樽酒。玩之到景斜。多慮使意衰。悵然奈爾何。

摘櫻桃

此花前日時。素雪搖東風。已驚變濃綠。忽更垂繁紅。俛仰物三換。歲華終無窮。因笑樹下人。未悟成老翁。磊落火齊珠。參差珊瑚叢。贈遠限道路。成蹊縱兒童。

春陰

明日送風光。宿雲濃不卷。微陰助惆悵。旅思增婉婉。新花秀且含。芳草綠更遠。樂賞及融恰。春暉未應晚。

除草二首

昔歲有壯氣。恥事一室中。獨願埽萬里。指麾走羣雄。少壯意更衰。棄書學老農。羈旅無田園。飄如野閒蓬。徘徊陳蔡間。皓窳見楚風。託足不期廣。所存一畝宮。秋草日蕪沒。荷鋤事兒童。歎息念變化。古人頗固窮。中庭不踰畝。百草何荒蕪。綠葉間紫莖。薰蕕互相渝。所憐薄筋力。豈愛不掃除。賢者曾蒿萊。吾徒亦何如。公侵藩垣出。蔓也自難圖。下牀值蛇蟻。依隱行鬱紆。至使蚊蚋多。不堪匝肌膚。古人遺我言。芳蘭戒必鋤。努力蔑小惠。作詩感躊躇。

早發襄城之龍山呈曼叔

鳥啼齋前樹。促駕吾當西。朝從良友別。夕赴幽人期。方以會合喜。敢曰道路疲。予戇昧時利。百事棄不爲。惟有好賢心。未媿緇衣詩。

敵來速嘗新酒

徒學無與同。徒歌無與和。徒行莫之友。徒語無所破。慷慨一無徒。始覺從君過。欣聞酒新釀。堂有佳客座。歡從尊壘罄。醉聽冠巾墮。庶可效名士。因君讀楚些。

日醉

犀首從橫時。無事猶飲酒。我生太平際。日醉亦何有。太平多賢才。臺閣固其藪。濟世圖功名。汲汲常恐後。我寧樂自放。甘與物俱朽。顧惟人間迹。澶漫獨已久。智謀乏施設。筋力倦奔走。幸爲朝廷知。而免職事守。人當自量度。快意安所受。何能強繩檢。希世視自負。晶熒流霞波。泔淡白玉斗。歡來無虛席。嘲笑命賓友。殘冬雖餘幾。自足數開口。浩歌迎春風。安用獨醒叟。

寒蘆

雖居江上城。不識江邊路。故移蘆葦叢。粗慰江湖趣。翠華侵硯席。疎影入牖戶。歲寒待爾共。好尙與時迂。勿以比蒹葭。蒼蒼瘁白露。

和兩府諸公馬上作

富貴信多士。況乃主恩深。京洛多風塵。冠蓋自成陰。片言代拱璧。一顧溢千金。嗟我固貧賤。處俗謬浮沈。咄咄人間世。俯仰媿山林。

和永叔十九韻送魏廣

信陵貴公子。仁義不掛口。猶有二千客。名聲極高厚。而況賢者門。四方所奔走。豈無青雲士。磊落照前後。

我雖非其人。慕用意殊久。差池混出處。百望乖一偶。羈旅陳蔡間。茫如喪家狗。擔簦始自致。傾蓋許白首。中堂陳詩書。高會置樽酒。豈惟聽餘論。復喜識賓友。魏侯希世珍。頗爲平生舊。他時恨契闊。並生喜邂逅。危冠切浮雲。長劍掛南斗。同志此莫逆。孤游信無負。切磋變新巧。彩繪飾餘醜。自謂當窮年。如何復分手。士生得所師。文學致不朽。吾衰莫自力。子壯諒何有。當取天下名。還爲生人壽。

遊龍山

孟公乘興出。必造龍山頭。回望默不言。夕陽始還朝。千年雖悠遠。此意故風流。咄嗟無知者。寂寞空荊州。霜風蕭騷晚。楚水荒涼愁。安得款段馬。往來時獨遊。

放鷓

上天賦爾材。若不受羈縲。失身偶見獲。羞與家禽列。秋風半夜起。鴻鵠兩飄瞥。物生各自適。聽爾歸寥泐。白雲入雙眸。尺地肯自屑。慎勿逐鷓鴣。〔案〕原本缺二字不足絕。不過倉廩中。朋黨爲偷竊。鳩鷓最堪憎。擅使芳草歇。勉力霜霰期。方爲鳥中傑。

鳴蟬

芳草久已歇。星火奄向中。日暮玄蟬鳴。歲華坐將空。輕舉塵壤外。逍遙神仙同。豈伊感時節。悲嘯臨長風。夕露鮮餘潤。炎飈成蘊隆。清虛浪自足。高餓亦云窮。

和聖俞十二韻

處世誠碌碌。白髮生滿頭。所以不自慚。數從長者游。醉翁名世者。事業晞孔周。獨立千歲外。邈然已難儔。韓范青雲姿。奮飛起西州。徘徊霄漢間。下視輕蜩鳩。詩老最前輩。名聲三十秋。篇章被海表。豈獨魯與鄒。今我親見之。執鞭乃所求。何況登其堂。舉觴預獻酬。清談破羣疑。嘲笑寬百憂。以此捐歲月。吾生同悠悠。

宿綠溪

雲昏江水闊。兩淮不可測。山丘望亦迷。馬牛豈易識。高帆乘長風。俄頃屢鼓仄。未知所趣向。稍稍萬寓黑。近津見蘆葦。其外水正白。操舟投其間。宿鳥俱關易。水深不可纜。叢梗以爲力。蚊蚋秋尙繁。不眠坐通夕。中宵風逾厲。潮水相蕩擊。安得似人者。警欬在我側。天明啓牖戶。願見白日色。莽蒼暘谷閒。竟爲霧雨隔。追觀宵征處。波惡生悸惕。絕糧非陳蔡。從者亦悽惻。

如意臺

泠泠清池水。汎汎不繫舟。興來可獨往。興盡難自留。留無淹回責。往無進取憂。世人共擾擾。真賞空悠悠。章華楚人困。姑蘇麋鹿遊。君看如意臺。乃知賢者謀。

閱雨

長夏炎氣隆。高田劇焚燒。惜哉淮海卑。無力能沃焦。起顧郊野閒。離離悉苞蕭。日夕多狂風。飛塵蔽招搖。誰能起蛟龍。雷雨蘇宿苗。眇然坐自想。幽意增煩歎。

和過騏驥院觀馬因飲李氏夜歸復與江謝會于敝居

子真王濟徒。愛馬有馬癖。每嫌駑駘衆。未覩千里格。竭來飛龍廢。一一數白黑。始驚麒麟骨。秀出無與敵。旗旄亂雲霞。鼓吹喧霹靂。從容看回旋。感激私歎息。此當逝崑崙。上與天無極。奈何局軒陛。終歲老羈勒。主人貴公子。埽榻多命客。聊欲寬其意。無爲稍戚戚。珍羞雜水陸。清酒漾金碧。嘲笑心目開。留連日已夕。歸來興不盡。駐馬問所適。知我方會友。投鞭遽登席。貧家竟何如。脯醢乏餘力。歌舞復無素。兒童強敦逼。多君平生懷。不與貧富隔。歡來亦酩酊。俛仰愧三益。

早行

雨息風亦止。落月猶在天。舟人相呼起。稍出蘆葦閒。暗中各紛拏。四聽聲正謹。開戶視所從。大江自漫漫。衆星若連珠。纍纍浮深淵。津涯杳難知。勢與天地寬。俯見舟楫微。萬牛一毛然。虎豹嗥岸傍。蛟龍浮其涎。兢兢抱危懼。忽忽忘食眠。人生誠多憂。況乃行路難。

重陽日得景烈送酒

歲晚見黃菊。悲秋空復情。故人豈知我。朋酒適平生。舉杯遠相屬。目盡歸鴻聲。醉眠東籬下。此亦淵明情。

和焦生石字韻

我惟一逢掖。入爲二千石。聲迹不相同。禮貌謂誰敵。旣許游藩籬。又喜升宴席。酌酒澆磔魁。賦詩聽警策。朋從常苦少。佳節古所惜。旣醉忘形骸。笑語俱莫逆。使公貴且壽。富有貧賤客。

寄隱直

會短別日長。愁多歡情少。古來人間世。于道同擾擾。我髮日已蒼。我顏日已槁。離憂固如此。四十未應老。誰能跨浮雲。相與乘莽眇。吾子心莫逆。庶當悟意表。

旦日城東渡汝水與鄰幾飲別歸作五言寄之

繁霜墮衆木。朝光破初寒。游子侵旦發。隱忍行旅艱。走馬東郊門。別愁莽無端。川長不可厲。泛舟觸波瀾。相及墟落遠。解驂請盤桓。班荆道路側。酌酒還據鞍。殊鄉閱人多。浮俗見子難。結交形骸外。生計出處間。江湖天一涯。冰雪歲欲闌。昔賢往不反。子陵與伯鸞。東游信不惡。相望終永歎。

寄深甫君章

爛漫十日飲。未快遠別情。醉魂幾時醒。直見潁水清。前歡絕莫尋。離念紛更盈。車騎暫休汝。賞晤得時英。披襟兩相照。話言僕屢更。論史旣衰衰。說經亦鏗鏗。一觴亦一詠。樂事真相并。會合固難常。我獨嗟南行。回首念前好。感物非嚶鳴。明發成寤歌。勉勉趣遙程。

寄裴吳江

王喬一雙鳧。乃是尙方履。誤逐閶闔風。飄然太湖水。湖水連天涯。茫茫湛清輝。秋來興不盡。似欲都忘歸。玉疊鱗如雪。碧壺酒若澠。醉輒問左右。何如張季鷹。君乃蓬丘人。神仙有名籍。不應自放浪。久爲塵中客。我頃臥廣陵。西風見白髮。八月觀海濤。壯心謝超越。因欲解印綬。從君五湖游。功名非所及。爲具鴟夷舟。

寄贈獻臣

龍興幽泉中。溶雲自潛飛。氣還大淵下。灰籥先察微。氣應不必邇。至誠神與歸。嗟予接休德。志合無纖譏。譬諸死灰然。安事旦夕違。胡爲久相越。書問月增稀。

五言寄江丈鄰幾時往尉氏未還

終日相與居。豈知相得懽。出門一分袂。乃覺攜手難。西風過浮雲。急雨生早寒。清秋令人悲。茲游何當還。歲月游將晚。念君尙加餐。

寄深甫

往卜穎上居。徒愛穎上人。巢由節並世。管鮑必相親。而我與夫子。阡陌東西鄰。正可白首遊。豈計中道分。人生莫自必。一別俄六春。入踐西掖垣。出乘兩朱輪。佐時乏明略。來往徒紛紛。上愧洗耳翁。下慙圖霸臣。念欲投劾去。結茅復從君。攄我宿昔意。寄聲謝水濱。

寄楊忱明叔

君有湖海氣。沆碭凌斗牛。遠持一卷書。濯我千歲憂。大音不衆合。至寶非暗投。感激移人心。汎瀾使涕流。俗譏陳元龍。世乏劉豫州。安得排羣兒。臥君百尺樓。

雨中寄徐二

北風吹飛雨。中夏變早寒。浮雲滿天地。坎井成波瀾。秋興集我懷。旅愁散無端。陽光且自匿。后土何得乾。嗟君貧非病。所寄瓢與箠。陋巷無雜賓。商歌激清彈。甚願裹薄飯。相從糜朝餐。亦思造陽谷。相與晞朝冠。

力弱泥濘深。乃知行路難。

論交

張陳父子游。乃爲白刃仇。蕭曹平生歡。亦作睚眦讎。交合名利閒。安得無後憂。商山有四人。衰老俱白頭。但食巖谷芝。終身不相尤。未必能獨賢。苟云無他求。古稱結交難。成敗視此由。作詩告同心。市義誠足羞。

秋霽醺北軒

北軒屬秋霽。曉見風葉零。置觴命賓友。環坐飛淥醺。遇適輒獻笑。放言豁中局。兀然不省醉。起見天上星。勉強相勸引。我謠子宜聽。幸無兵農憂。稔歲蒙休寧。讀書業文外。惟存醉勿醒。世途若波濤。富貴乃浮萍。置之無可稱。視彼鴻冥冥。

送楊十七祕丞知瀛州河間

洪濤翻金堤。冀州變泥塗。哀哉百萬室。所憂半爲魚。流穴接道路。呻吟交里閭。若無慈仁長。安使疲疹蘇。子在新密時。治聲溢西都。大水無麥禾。閔然若疾痛。不忍使者求。建言解其租。邦人喜更生。老幼歡以呼。繩墨制姦吏。弦歌訓諸儒。復新卓侯廟。慕用已不誣。今者河朔行。豈其易然乎。彼將譽所試。况子材有餘。但恨治者小。百里爲區區。割鷄用牛刀。孔聖所歎吁。賢者必愛民。民活心乃愉。幼學長行之。固爲聖人徒。位下非所恤。勉哉寧君軀。

送梁山軍徐祕丞

鷓鴣一何智。俯仰人間遊。落實不給視。去之畏少留。高賢在天下。富貴如雲浮。得失不槩懷。損益甯所憂。若人古已亡。今復得徐侯。詞科二十載。朝籍方見收。四海厭名聲。廟堂多輩儔。後時不自失。觀化君悠悠。入辭未央廷。遠牧荒山陬。去矣成獨往。豈嫌時俗羞。

東鄰花

卜居非卜鄰。適幸鄰花發。照耀東軒東。煦然二三月。露香送清吹。晨豔開繁雪。稚子戲牆根。鳴鷄出林樾。我來奔羈旅。疑及武陵歇。欲訪竟無從。空觀對寥寂。爲人惜俗事。鄰里多謝絕。獨爾可相親。芬芳未應滅。

公是集卷十六

七言古詩

憶洞庭

少年慷慨輕遠行。出入楚越多所經。每令百川盡衣帶。獨憶岳陽觀洞庭。方輿沈潛似無地。倚蓋回還徒見星。始疑上帝限南北。恐有漏澤連青冥。西風八月氛霧收。曠宇千里令人醒。苦爲外境相誘掖。欲棄塵世浮滄溟。當時發狂頗自怪。真擬乘興攜湘靈。至今局促不如意。坐視歲月無時停。涼秋滿眼更多感。回首尙覺君山青。

聞鴈

去年聞鴈江湖邊。爾時異鄉望白雲。今年鴈南身更北。可憐送目懷居人。我生羈旅自南北。鴈飛何爲亦遠役。浮雲滿天我無翼。相與因風寄消息。

庭楸

中庭長楸百尺餘。翠葉旒藹當四隅。晨霞夕日自相翳。並坐可得千人俱。憶昔河決鉅野溢。定之方中作宮室。當時魯人始種此。還賦衛風伐琴瑟。春華亶亶六十年。高榦錯落摧寒烟。悵望空隨衆木老。中含至

音無與宣。

送張公往建溪

秋風駕流溪水急。君帆胡爲破烟入。仙人近約武夷會。漢祀山頭羽旄立。羣山叢叢野波綠。君纓無塵見心曲。江淹夢筆靈有餘。君歸何時佇盈軸。

曉起

棲鳥未動清漏殘。寥寥空堂生早寒。相重樹色如潑墨。欲落月采成渥丹。市聲嘈嘈入人耳。自笑帶星還若此。

防秋

秋霜折膠邊馬壯。邊馬窺邊怒邊將。游騎夜入燒回中。烽火朝傳過隴上。關東行客關西來。欲說兵形先啜哀。長戈不能斷右臂。壯士無過委黃埃。歲輸繒帛顧何益。匈奴反以馳荆棘。安得連山如長城。遍限中原卻蠻貊。

打魚

南人登魚作臙臘。清潭數里奔舟楫。層冰始解川氣和。百尺分明見鬢鬣。大網如雲遮要津。須臾牽網迴水濱。地高勢蹙漸逼窄。忽復逸出黃金鱗。釣叟篙師共驚駭。失聲奪氣俱逡巡。素魴赤鯉不足數。棄擲千萬如埃塵。豈知異物通變化。時暫網中還有神。

戲題西湖中魚

育育水滿湖。中有千金魚。浮沈得意似太古。不畏網罟畏鶉鷓。綠蒲欲齊藻初密。紅尾差差映朝日。疾雷驟雨人莫知。潛有蛟龍取之逸。

養魚

鑿池不容數斛水。養魚才勝十餘尾。可憐出沒萍藻間。遠如汎澹江湖裏。君勿笑坳堂坎井無遠期。假有神物君不知。風雲變化在倏忽。隨衆幽潛聊爾爲。

和永叔糟民

歲豐飲酒衆同醉。歲饑散糟民亦濟。乃知酒醑在官爲長策。上可足財下均利。黃頭稚子白髮翁。哺糟相隨塵土中。豈嫌身居犬彘後。還喜生值恩施豐。翰林仙伯屈主諾。憂民之憂樂民樂。禍階六筭不易救。惠及連城自云薄。周公以來千百年。希世俗儒玩糟粕。排斥酒誥終莫用。感激長謠豈虛作。恨公未爲富民侯。此等區區豈所憂。

漁翁

白頭老翁披敗蓑。求魚終日罩淮波。波深水闊望不絕。網目雖繁能幾何。大魚鱣鱠入淵底。小魚鯁鯢登網裏。手輒足趼吁可憐。何不爲網大如天。

苦雨

東風十日不肯回。濃雲猛雨無時開。紛然萬瓦垂組練。忽變百里吹塵埃。河魚無翼蹈平陸。水鳥哺子升高臺。羲和送日不竟夜。陽鳥翅濕方摧頽。腐薪數吹不堪濕。靈井已滿無用汲。大衢泥潦安得出。敗瓦漏缺端愁入。街頭紅粟更騰踊。歲晏敝裘方綴緝。黃花熒熒獨不憂。悵然爲爾臨風立。

麻黃州送李斯石銘二十一字

麻侯昔爲萊子國。海濱漁人獻文石。云是秦始皇帝東巡碑。二十一字李斯迹。桑田變海岸爲谷。此石亦沈滄海側。浪翻水轉石段空。偶存數尺非人力。文章雖傳失首尾。猶與史記無差忒。字形訛缺非昔時。蟄龍病虺相排迨。念昔屬車八十一。氣如虎狼食中國。方士獻策通神仙。諛臣奮筆夸功德。始皇未死名已滅。秦地初分石皆泐。邇來似覺天意然。欲令後世羞其惑。君不見夏禹九鼎傳三王。末年乃隨殷社亡。時平往往暫一見。龍文玉鉉曾無傷。聖賢作事宜萬代。事非聖賢多立壞。

畫草蟲扇子

周南草蟲但書興。爾雅蟲魚浪多證。豈如紈扇裂冰霜。畫出肖翹皆絕勝。蠅讒蝶輕去。螻蝗狷。同類殊名悉相應。毗陵老匠含天真。獨得于心非氣孕。牯牛落筆殊偶然。秦女驂鸞不相稱。因君筆力尤天下。一借微軀聞萬乘。

聽江十誦食鱸詩戲簡聖俞

長安貧客食無魚。浩歌彈鋏歸來乎。主人聆歌知客意。酌酒買魚相與醉。一魚百金不可償。操刀作鱸揮

雪霜鱗分骨解珠玉光。舉盤引筯絲線長。楚飯彫胡香且潔。吳羹入口如沃雪。主歡賦詩客稱壽。裂簡搖毫落寒月。我亦羈旅秋蕭條。思鱸回首江漢遙。過門大嚼取快意。詠詩忘味如聞韶。君若乘風駕滄海。更鱸長鯨且相待。

積雪示張翁

冥冥同雲晝如墨。十日江城雪三尺。騏驥長鳴向朔風。鴻雁悲飛困雙翼。此時窮巷多泥塗。念子衰年少筋力。時俗反稱少壯賢。丈夫動與飢寒逼。乘興能枝筇竹來。煮魚溫酒澆胸臆。

苦雪

積雪冥冥春不淹。流光驟去十之三。根拳枝拆物可念。衣敝履穿吾自堪。天樞回環錯寒燠。地軸開闔差朔南。乾坤密移世莫測。安得辨士能劇談。

雪夜留二三客飲

高樓鼓絕昏鴉宿。疎簾暗幕開明燭。雪風振海夜未央。酒池無冰春更綠。迎年送臘醉莫辭。回環四序長相續。

奉和聖俞春雪

一日朔風三日雪。冬來嚴凝春復結。不知長此終安窮。芳物差池且三月。雷公怒號何淬嗟。欲起草木呼龍蛇。可憐慘栗奪氣意。正復憔悴哀泥沙。紫宸放朝車馬息。憐里謝交門徑寂。解龜換酒聊自樂。浮雲蔽

日殊未極。

同聖俞十二月十三日喜雪

楚越妖氛雜炎瘴。憑陵中州冬益壯。天兵橫厲江湖間。殺氣冥冥逐飛將。南風不競寒律回。暮雪遠從閩闔來。雲崩濤涌天地閉。掃洒萬里空塵埃。公卿入賀陛下聖。海神來朝軍事定。

和永叔喜雪

陰風觸物生晚勁。積雪經旬戲春令。氣排水國吁可駭。勢覆山城力誰競。繽紛乍逐飛霰奪。慘淡仰見淨雲定。稍并日夜明相續。欲亂玄黃色交映。丘陵迤邐增更高。市井喧卑聽逾靜。包荒含垢似天德。履素居純近民性。可憐佳境浩無極。非有雄辭豈能詠。忽憶避地歌其雩。攜手驅車及寬政。邇來盈尺亦何有。高臥閉門方自慶。矧占豐歲宜九穀。重抑驕陽毆百病。龍蛇在蟄鶯在谷。與我俱欣四時正。新詩翩翩摧古人。汝陰太守明廷臣。侔色揣稱笑流俗。與民樂廣陽春曲。由來曲高和必寡。況我才居郢人下。

去年對雪一首贈江十

去年對雪本憶梅。今年看梅更憶雪。繁香浩色他日時。誰爲年年劇胡越。乃知古來人間世。十常八九不如意。況我與君羈旅人。別多會少誰復計。閒來看梅取一笑。對雪更作明年調。

月夜

清風卷雲天雨霜。衆星滅沒月騰光。紛紜六幕含蒼蒼。瑩如冰壺察毫芒。太虛真人河漢旁。攀援桂枝曳

霓裳紫貝爲闕白玉堂。珠筵瑤席羅羽觴。倚風微吟聲抑揚。揖我起游謂我臧。左驂蛟螭右鳳凰。倏忽萬里天路長。塵埃下土殊茫茫。樂如何其樂未央。

依韻和永叔卽席送擇之出守陝府

驪駒在門且勿喧。主人留客姑進酒。一時轉盼已陳跡。千里相望更何有。祖侯聲名二十年。天下英豪共奔走。誰云白髮寄郎曹。更喜朱轡入吾手。揚雄天祿就寂寞。召伯甘棠變枯朽。乃知人事不如意。自古十常有八九。男兒何會計出處。時運由來有奇偶。莫嫌青雲晚著鞭。會取黃金大如斗。君能食飲和天倪。餘事無可付莊叟。

飛輪團扇歌

赤雲燒天天欲焚。深堂如炮并如饋。肴乾不食酒具陳。君胡愁嗟念南熏。主人白羽奇且新。捷逾輶膏機有神。飛廉舒御旋相奔。旃藹翕霍娛坐賓。衣襟飄飄恍凌雲。何用御風絕埃塵。主人顧嗟顏色顰。安得救喝通下民。羊角扶搖非敢珍。願使大鵬離隱淪。上客捧觴起爲賀。君宜千年位卿佐。

雨過前軒偶記

江南羈客懷鄉墅。曉起前軒對零雨。清波滿目如鑑中。遶岸高松十餘樹。砌旁芳草似汀洲。巉巖殿角飛紅樓。沈光倒影入浪底。宛是若邪溪上頭。薄霧疎烟迷近遠。水色誰能辨深淺。忽驚謝去塵中游。不知正自居京輦。何人草服倚長松。迴頭誤問釣魚翁。眼前景致偶相同。豈異仙術遊壺中。

贈才元學士家貧自秣馬賜書使者至言之上上以語丞相就職而拜廣安守

待詔先生窮巷居。箠瓢屢空方晏如。自操井臼秣羸馬。卻整衣冠迎賜書。王人駐車久嘆息。天子聞知動顏色。飽死曾不及侏儒。牧民會肯輸筋力。詔書朝出蓬萊宮。繡衣還鄉由上衷。君今已作二千石。亦復將爲第五公。

題梅尉春波亭

層欄壓湖春水碧。日照高穹同一色。東風引浪飛魚鱗。極目傷心如楚澤。茫茫白芷連芰荷。倚沼畦瀛遙望多。官賢與衆共其樂。漁樵日暮常經過。君家德祖吳門子。棄職從仙如脫屣。此中吏隱人不知。且濯君纓洗君耳。

吳宮

吳兒飲。鄭女舞。彩衣姣服垂楚楚。姑蘇臺高春日遲。急節新聲鬧鐘鼓。美人歡醉捧瑤爵。君王萬壽長如許。吳宮四面盡山川。越兵那得到城下。

陰山女歌 接伴副使知制誥馬祐事

種玉不滿畦。種花易滿枝。玉生寄石自有處。花飛隨風那得知。嬋娟翠髮陰山女。能爲漢裝說漢語。春心未知向誰是。夜彈琵琶淚如雨。赤車使者過鳳凰。闔中一聞先斷腸。碧牕銷烟未容去。侍兒密獻江南璫。鵲飛上天星沈海。人心不同事隨改。翦環洗妝許君老。百年如夢情終在。妾乘油壁郎乘驄。西陵松柏墨

色濃。新歡未已，舊愁起。水流曲曲，山重重。周周銜羽，鷓比翼。天生相親人，豈識雖不及清路塵。猶當作山上石。

遷南行 甲申十二月桂陽叛蠻平遷其種于京西諸郡

伏波將軍昔征南，功業雖壯身不還。曾出封疆鑄銅柱，竟留種族依荒山。君不見如今聖天子，掃蕩妖巢悉內徙。雕題來作冠帶民，鼻飲翻宜伊洛水。此功一成萬世甯，五嶺三苗長坦平。

寄王二子直

鴻飛輒上天，魚躍還入淵。故人去我百里餘，我欲附書無由緣。俗閒離合誰得免，心雖欲近身逾遠。少壯相歡長年悲，自恨今爲丈夫淺。

夜寄獻臣

同居汴水上，自與君居隔。月出城頭人盡歸，思君攜手獨不得。興來狂歌無與賡，白雲時向望中生。城外明月未應滅，期君對舉黃金觥。

和永叔鳴鳩詩

晴鳩謹求雌，雨鳩鬧逐婦。天地有時陰，嗟爾何欣復。何怒柔柔如雲春，暮時吳蠶半眠紫。葦肥食不過數粒，寢不過一枝。婦子相安可以老，何用汲汲合且離。雷公號呼風伯舞，天借之權作霖雨。可憐汝愚終不省，反室于怒誰哀汝。昔人惡爾巧，今人笑爾拙。巧不得近瑤臺，拙不能保家室。爾巧爾拙非汝情，天機回

闔難自平。世人假爾推陰晴。

秋蛩

促卽復促卽。愁蛩一何力。不見機杼巧。但聞日夜織。霜隕木落天下寒。嗟我婦子衣裳單。大鈞萬物各有在。爾獨憔悴使人歎。一鳴復一飛。秋堂燕將歸。四時自興歎。天道不得違。憶昔春風和且柔。畏人來入人間游。鷹隼橫厲自茲始。索寞分散還可愁。

三瑞堂

甘露被草。朝陽易晞。池蓮並蒂。及秋變衰。獨有長松連理。老益壯。十年百年仍附枝。昔來一物足爲瑞。何況三異俱稱奇。吳中衣冠不勝數。天意自與寧馨兒。露乾蓮死不復見。正以青松并驗之。凱風孝子嘗悲思。三荆兄弟傷分離。此家遺風五十慕。物理推類誰能欺。到客爲爾俱題詩。

聞轆轤

轆轤復轆轤。日夜聲相續。長綆無已時。深泉變空谷。君不見開闢至今千萬年。斗樞坤軸相迴旋。河漢西流亦不息。見爾滄海成桑田。

過王氏弟兄

出城問窮僻。負郭正瀟灑。主人著書長閉關。佳樹當門宜繫馬。下馬上堂還讀書。新詩古琴雙起予。昏鴉棲雞欲斂翼。興盡將去猶須臾。徒見城中軒冕客。不如吾人一逢掖。安得茅茨同里居。子在東阡我南陌。

同永叔贈沈博士

我不識醉翁亭。又不聞醉翁吟。但見醉翁詩。愛彼絕境逢良琴。上多高峯下流泉。後有芳草前茂林。玄猿黃鶴翩翩其悲鳴。兮白雲翠鷲倏忽而陽陰。此間真意不可盡。未遇知者猶荒岑。醉翁昔時逃世紛。戀此酩酊遺朝簪。心雖獨醒迹彌晦。舉俗莫得窺浮沈。邇來十年定誰覺。獨沈夫子明其心。寫之絲桐寄逸賞。曲度寥落含高深。絕調衆耳多不省。醉翁一聞能別音。乃知精識自有合。何必相與凌崎嶇。伯牙鍾子期。目擊意已歆。蓬萊三山蕩析不可見。惟有水仙之操傳至今。安知後世萬千歲。此地不爲水火侵。但存君詩與君曲。雖遠猶可期。登臨沈夫子。與醉翁。斯言至悲君更尋。

六月六日自城北還過深甫避暑

熱不就惡木枝。渴不近盜泉水。自古有成言。念我還如此。愛君井源百尺深。愛君庭樹千里陰。相知豈計一飯報。長嘯聊爲猛虎吟。

得蕭山書言吏民頗相信又言湘湖之奇及生子名湘戲作此詩

吾家千里駒。氣與齒俱壯。去年射策雄東堂。今年調官在越上。指揮小吏遺簿書。笑語不廢才有餘。清酒肥魚宴賓客。時時騎馬臨湘湖。湖波無風百里平。人道官心如此清。居民愛尹氏爲字。韓子爲縣。百姓生子皆字韓。令尹生兒湖作名。家家祝君多男子。越中更有餘山水。

翦楸葉詞

涼風天際來。拂我階前樹。稍驚枝上禽。復墮葉間露。兒童畏我逢秋悲。刻葉作花矜歲時。祝我宜秋勸使插。未能免俗復爾爲。鬢邊二毛殊不惡。淮南何須傷木落。

寄書

十里一反顧。五里一徘徊。悠悠三千里。莫知我心哀。客愁紛無涯。歲月忽如擲。人生莫自料。皓首豈易測。節旄未落歸去來。天遣春風隨我回。入朝寧食建業水。還家卻賦南山雷。婦能秦聲妾趙舞。稚子可使行酒杯。急須爲樂娛日夜。何事憔悴淹塵埃。行矣乎。歸去來。

答金陵使君答王待制見寄雜言

阮公青雲器。寓意必豪縱。西臨廣武寄一笑。英雄紛紛競如夢。有時不能平。途窮卽長慟。佳哉詠懷篇。千載共悲諷。金陵昔爲帝王居。氣象蕭索無復餘。長江連天水東注。臺城髣髴存丘墟。主人文章謫仙老。感古能無激懷抱。作亭正得山水勝。登臨更值風月好。賓客滿堂絲竹悲。古今風流自一時。君家夷吾雖有慷慨語。快意未必如君詩。淮水東流千萬年。此亭方與淮共傳。念君歸老廟堂上。未負賡歌留北山。

古城

古城何巍巍。古墓何纍纍。生遊市朝死田野。從古到今無免者。城荒卻爲狐兔宅。墓在他人種松柏。伏羲以來三萬年。此城此墓幾變易。誰人聽唱野田詩。能令君悲亦不悲。

築室種樹


撫劍欲遠適。舍旃輒復息。四海廣大身正孤。東西南北頗同役。築室種樹反開門。閭里小人哀王孫。丈夫委順故在俗。餘事悠悠何足論。

風花

風花不自知。高下逐風飛。故有多情處。時來點客衣。仙源應在晴溪側。弄雪吹香不忍歸。

種蓮

雨餘池上清且滿。浮萍漂漂綠蒲短。主人惜此芳意薄。移藕丁寧不辭遠。南陂芙蓉少人識。疊藥重房無俗格。託根得地今始逢。西風白露爲君容。



公是集卷十七

七言古詩

朱雲

志士不忘棄溝壑。勇士不忘喪其元。伏雞搏狸狗襲虎。感激只在精神存。漢朝陵替外戚盛。五岳振蕩三辰昏。臣強主弱上不悟。庭中唯唯誰能言。朱生節義邁金石。面劾不避師傅尊。願求上方斬馬劍。誅一厲百清其源。天威震怒不我受。利刃接頸雷霆奔。當前折檻色不變。命在頃刻誰扳援。昔時仲尼魯司寇。七日行戮端乾坤。嗟我此生心不就。冥冥后土埋其冤。漢家社稷變王氏。張禹虛蒙師保恩。卓然先見在物表。佞臣敗國誰復論。我願乘雲款天闈。巫陽掌夢招其魂。立朝蹇蹇辨邪正。無復奸諛開倖門。

金山麻院

門前松響亂頭上。壁上江圖流眼前。松聲水響兩不辨。似有疑非心悠然。安得乘興浮輕船。

潘道士

上清宮中老道士。曾從先皇去封祀。山頭候夜窺火輪。汾上掇鉤出金耳。雲成龍虎當翠華。豐隆前導清泥沙。萬靈扶駕百神護。雜沓仙侶堆雲霞。黃衣羽客十有餘。多能引說軒轅初。漢廷儒士議迂闊。天子自

用申公書。金繩玉策埋石壤。神光夜見連空虛。天心報貺宸意喜。白茅玉印旌其徒。帷宮賜席接虎幄。待之如賓盡誠慤。中書祕術使之觀。神動精搖易飛躍。鼎湖龍去何超越。日月茫茫自奄忽。龍髯墮地秋草生。人世霜華滿頭髮。

過海舟

秦王好神仙。東上琅琊臺。蛾眉綠髮五千輩。去乘長風款蓬萊。此時秦人海旁立。生別死分不敢泣。但見高帆雲中沒。野鳥悲鳴爲翔集。過海舟。何時還。火焚荆棘空驪山。

猛虎行

陸不辭虎豹怒。水不避蛟龍爭。衆人亦有命。大賢豈虛生。千歲猶須臾。四野如戶庭。解弓掛扶桑。脫劍倚太清。騰身騎日月。萬事如蚊岷。貧賤有固窮。慷慨激中情。炎火燎崑丘。乃知白璧精。雪霜沒衆草。高松獨青青。甯生歌車下。戚促兒女聲。時至乘化遷。運頽與物冥。震雷不經聽。芥蒂何足嬰。君不見賈豎競錐刀。蚍蜉利羶腥。何如乘雲御氣遊咸池。長嘯濯我冠與纓。

雷陂勸耕作雜言此陂蓋江都宮之地吳王釣臺在其旁先時民三十家耕其中後強爲吏所奪

廢不耕者十餘年矣予按地籍悉召還耕者使縣大夫授之地如其舊

君不見江都宮。昔時何崔嵬。下臨雷陂水。前踞吳王臺。臺傾無餘級。水竭空塵埃。隋人已曾顧。此長嘆息。今世更爲隋人哀。乃知天地間。一盛亦一衰。但從伏羲已來三十餘萬歲。未有書契勝言哉。堯桀是非何

兩忘。我欲勸人闢草萊。稱稻水一方。藝麻陵四頽。爽鳩之樂非我有。聊獨玩此田莓莓。未知百世間。更復誰當來。且欲及閒從賓客。省耕訪此時徘徊。

碧瀾堂

茗溪之水搖空山。雪溪波流無日閒。上有高堂蔭華宇。蒼翠凌亂軒楹間。異時客心樂真曠。白鳥鷓鴣期往還。解纓敲枕便所適。焉能復問居夷蠻。嵐光稜稜聳屏幌。水響濫濫搖瓊環。正如明鑑發塵匣。萬象聚眼醒容顏。秋風已高白芷老。編荷制蕙文爛斑。魂清魄爽弄明月。洞庭跬步尋非艱。神仙有無未可信。物色但訝非人寰。瑤宮紫府竟何若。茫然遠想令人潛。長竿獨繭可以老。安用馳獵盧重環。況復邦人講文墨。風雅不待仲尼刪。丞相詞章狀元筆。皦皦神裁無由攀。嗟我胡然陷塵滓。不能追遂鷗白鷗。發狂醉問二三子。吳溪釣碣何如頑。陳丞相詩。王狀元書。刻于石。

濉陽歌

梁人猶爲濉陽歌。隋人水調能相和。梁人池臺已平地。隋人岸樹空嗟峨。梁人隋人去如水。水聲日夜流不已。張巡廟前春草生。里人尙識將軍名。國讎已滅心不死。憤氣半夜凌櫓槍。丈夫節義豈在下。願爲長劍剗長鯨。

馬蹄硯

巴巫之山足奇石。氣含秋雲如黛色。君家寶硯安所得。圓爲馬蹄瑩爲壁。宛城路阻流沙長。中國久絕真

乘黃惜哉逸足世不識。所存一迹猶形相。鄙夫雖非伯樂比。偶見褻蹄識千里。願君不惜勤示人。倘有驂騮免空死。

天中山

茲山陂陀但盈尺。其下盤根乃無極。勇如共工莫可觸。力敵愚父無能役。開闢以來傳至今。形勢雖小當天心。斗極回旋未易測。日影短長猶可尋。石旁陰穴穿洞府。中有神物爲之主。禱祠往往見光景。曠旱時時作霖雨。由來丘山貴靈不貴大。正復陂陀亦何怪。

岸旁倒樹

滄洲老樹生幾秋。榦如黑龍根紫虬。雨水摧激勢突兀。天矯出飲滄江流。危不見持顛不扶。蕭蕭生意令人愁。豈無耕夫與過客。暫時憩爾行則休。西風八月海水飛。枯槎昔曾凌斗牛。恐爾漂零未終極。掛帆欲去仍回頭。

黃寺丞井上桐樹爲雷所擊

君家井泉深百尺。上有高桐十尋碧。鳳鳥不至獨何憂。蛟龍深潛莫能識。迅雷烈風來擊時。地軸翻倒海水飛。正直摧傷豈天意。爨不成琴殊未遲。

送人之會稽

鷹隼羞逐巢上雛。騏驎恥隨廐中駒。由來俊邁惡羈紲。子獨三年留上都。江南秋風鱸魚美。庖餽炊粳東

入吳。腰間蘭佩垂左右。船若神仙人不如。會稽古來好風俗。嚴助買臣相繼驅。近來太守廷中臣。拔賢好善常朝無。子今東去懷白許。解榻非君尙誰與。剋日飛聲動洛陽。聽君如聽雷門鼓。

題深甫所種樹

中庭卻埽無餘地。憐君種樹還有意。重陰覆屋千尺時。徙坐讀書殊可喜。似君秀骨不易攀。當援桂枝星漢間。豈能玩此便自老。塵俗紛紛聊閉關。

雷氏子推迹石鼓爲隸古定聖俞作長詩敍之諸公繼作予亦繼其後

結繩旣亡書契出。文字變化尤倏忽。太山七十有二代。遺事昏昏萬無一。岐陽石鼓起晚周。宣王之詩史籀筆。天下金石凡幾存。此當爲甲彼皆乙。體勢烏迹雜蝌蚪。詞章車攻與吉日。六書旣廢小雅缺。能使兼存此其實。韓公昔嘗歌感激。若弦周詩播琴瑟。雷生今復隸古定。如破魯壁傳簡帙。道之難行乃若茲。二千年間能事畢。先王親用必貴本。流俗玩文因喪質。此雖于今似不急。豈不班班見儒術。藏之天府自其所。大訓河圖亦何物。會稽羣玉久冥冥。漆簡韋編尙髣髴。昔人雖死名不朽。智者能爲巧當述。太學先生事起廢。誦此勤勤救埋沒。會令永與天壤傳。不比酒誥俄然失。

城頭烏

城頭月出天正白。衆鳥驚飛啼夜色。枝高風多露新滴。畏聲惡影不能息。愁人感之援鳴琴。拂弦成聲淚沾襟。嗟爾一生八九雛。游翔不過東西林。白頭反哺無所恨。桓山分飛獨何心。

驚鳥

北林風多丹葉稀。棲鳥畏月夜中飛。哀音亂發不自得。孤影屢翻無所依。作巢欲高避彈射。誰道通宵不能息。山深林遠去冥冥。清露寒霜損毛翼。

梅

江東梅樹江西客。僻地相逢眼俱白。雜花亂草鬪青春。玉樹瓊枝比顏色。輕陰漠漠寒不返。清雨高風且連夕。惜無白日照芳菲。決雲之劍那能得。忽憶曾過上林苑。五柞長楊心所識。結根擢秀皆尋常。得地翻宜帝王側。后皇嘉樹無遠邇。爾生自合居南國。勉留佳實和君羹。丁寧婦女無所摘。

蒲萄

蒲萄本自涼州域。漢使移根植中國。涼州路絕無遺民。蒲萄更爲中國珍。九月肅霜初熟時。寶璫碌碌珠纍纍。凍如玉醴甘如飴。江南萍實聊等夷。漢時曾用酒一斛。便能用得涼州牧。漢薄涼州絕可怪。今看涼州若天外。

和道粹探春

去歲探花煩兩郎。今年逢春情更長。廣文主人似知我。一首新詩能發狂。載酒可以過揚子。肩輿不嫌干辟疆。東風老去甚容易。百日醉倒我無妨。

岳州引水詩

洞庭清波一千里。城中釀酒常無水。泥塗遠汲人共悲。餅缶屢空罍亦恥。鑿井引竿高下流。清泉泠泠六物修。邦人已息漢陰拙。楚酒無復邯鄲憂。誰謂機心有機械。大賢事業終除害。

去年得澄心堂紙甚惜之。輒爲一白。邀永叔諸君各賦一篇。仍各自書藏以爲翫。故先以七言題

其首

六朝文物江南多。江南君臣玉樹歌。擘牋弄翰春風裏。斲冰析玉作宮紙。當時百金售一幅。澄心堂中千萬軸。摛辭欲卷東海波。乘興未盡南山竹。樓船夜濟降幡出。龍驤將軍數軍實。舳艫銜尾獻天子。流落人間萬無一。我從故府得百枚。憶昔繁麗今塵埃。祕藏篋笥自矜玩。亦恐歲久空成灰。後人聞名寧復得。就令得之當不識。君能賦此哀江南。寫示千秋永無極。

題永叔白兔同貢甫作

梁王兔園三百里。不聞有與雪霜比。今公畜此安取之。瑩若寒玉無磷緇。春秋書瑞不常有。歷年曠世曾一偶。寧知彼非太陰魄。鳳凰麒麟亦郊藪。周南之人公腹心。張置肅肅橫中林。獻全不損一毫末。顧直肯計千鈞金。雕籠密檻回君寵。初不驚人有時拱。由來文采絕世必見羈。豈能隨衆碌碌自放原野爲。

三清殿木槿

三清殿前木槿樹。朝繁夜暗自相催。晨光始出洛水上。暮雨又下雲陽臺。仙姬神女衣服麗。紫玉雜佩垂玫瑰。春餘衆木苦寥落。況乃漸逼清秋來。繁花滿目真可惜。稍稍萬片鋪蒼苔。黃冠道士情意薄。見似不

見年年開清風滿席車馬少。莫與共賞傾金壘。嘗疑壺中有仙術。安得升天繫白日。

和吳九元會

漢家初成長樂宮。亦以十月朝百工。武夫崛起少儀節。秦制苟簡非王風。猶云始知天子貴。此甚可笑田舍翁。聖朝禮樂百年備。文物寢盛兼義農。月正元日古所用。數歲一講賓王公。東至日出西太蒙。南極丹穴北崆峒。重譯款關惟恐後。奉琛薦幣無不恭。太常調樂辨韶武。少府拭壁差桓躬。旂常卷舒王路肅。干羽出沒頑民從。協風入律效朔易。瑞雪盈尺迎年豐。陰慘陽舒變頃刻。天決地闢含沖融。君看此等聖人事。豈得復顧叔孫通。道旁擊壤九齡叟。校室受書三尺童。慣習昇平不自覺。豈悟帝力高無窮。賴君作詩播英實。如以鳴鼓祛昏聩。吾知朝廷億萬載。與地侔富天比崇。

荊州兒歌

都盧小兒歌且舞。口吹鳴笛手擊鼓。日落羣遊塵土中。噉咷不分巴與楚。年年送臘迎春光。家家相隨夜開戶。嗟汝兒曹舞更歌。及爾不爲如老何。

贈文顯

古來畫工著名者。吳氏鬼神韓氏馬。鬼神既僞不足稱。狗馬空難亦多假。顯師幼年獨寫人。至今精絕疑有神。灑毫便覺面如面。後素倏訝身觀身。高冠長劍天子側。他時金聲復玉色。師皆對之槃礴羸。衆謂十常八九得。諸公固爲廊廟賢。麒麟未畫宜私傳。一丘一壑吾亦可。煩仗丹青無間然。

戲作汎槎篇呈知府給事

君不見枯槎去時八月風。海水自與天河通。飄飄反出扶桑上。恍惚遍歷羣仙宮。宮旁佳人瑩如玉。邂逅相聚歡不足。詐言物外日月長。正苦歸來光景促。回頭稍與煙霞隔。世人空辨支磯石。伯勞燕子東西飛。惆悵中間斷消息。

春日作

天王城西金明池。三月欲盡花菲菲。遊人白馬黃金羈。駢驂結駟來金堤。禁城恩波無遠邇。清光面面均流水。

賞閣後小桃同景純作

僕本山野之生民。不堪刺促拘冠紳。江湖自放老將至。豈悟歲月如馳輪。謬隨多士貢王府。浪得虛名通紫宸。遽從下列居第一。當時頗似稱平津。感激更思報天子。僮俛從事希涓塵。濫書閩籍比朝舊。驟上天祿均儒臣。省躬顧影每自愧。譬如蒿艾參松筠。未能引分拂衣往。正用飽食慙懸鶉。太平中外雖少事。賢哲馳驚猶辛勤。幸無官守逃吏責。自可昏醉窮青春。天桃花繁高倚樓。似若有意娛佳賓。浩歌大笑忘檢局。座客歡倒知吾真。東風瞥來能幾時。況子東西南北人。人間會合常苦少。擊鮮舉白毋羞貧。林端啼鵲風雨夕。異方相憶空酸辛。

土牛行

立春自昔爲土牛。古人設象今人愁。豈有范泥作頭角。便可代天熙九疇。村夫田婦初不知。繽紛圍遶爭相祈。皆云宜蠶又宜穀。拜跪滿前同致詞。由來人事常反覆。久立要津寧爾福。請看今者拜跪徒。少選分張取其肉。牛實無知何用祭。牛能有情豈不媿。化育萬物非爾才。世人資爾聊爲戲。

胡九齡畫牛歌

書契已來有繪事。畫牛著名今始二。胡生戴氏雖異時。形似之間實兄弟。鬼神易寫狗馬難。古人舊語乃信然。不爾寥寥千萬年。筆墨曠絕無比肩。胡生曾畫百一牛。變態曲盡稱爲尤。翰林主人題辭古。四海文士歌賦優。俗情護前喜排後。此事戴嵩未曾有。會知誦玩無已時。畫與胡生俱不朽。

同鄰幾觀中道家書畫

宋公好古天下聞。法書奇畫多求真。獨將文雅遺後世。官雖貴達家尤貧。近自唐室遠及秦。上下略數千餘春。丹青翰墨著名者。一二收拾忘辛勤。象賢濟美聲不墜。手澤鉅細皆如新。朝廷交遊累千百。未嘗肯示尋常人。蔡侯江翁與梅伯。于今磊落稱絕倫。退朝相從得盡見。更覺清門無雜賓。鑒微賞異極毫髮。四座若獲千金珍。往往發狂或大叫。詠詩落筆爭紛綸。我隨衆人久碌碌。學殖欲落衣生塵。願登羣玉探禹穴。不憚山海馳舟輪。此君家近未宜後。率然欲往懷逡巡。淹留祇覺歲月老。復恐異物潛通神。但傳妙唱想絕蹟。誦歎慷慨書摺紳。

西戎行

吾聞聖人之兵有不戰。不戰之勝善之善。況復良將握天威。西戎雖強安得擅。憶昔屬國羽書聞。中宴徹酒詔圖勳。丞相陳謀御史請。獨可遣將誅其君。吏民誑誤不足治。我以威德周無垠。尙書侍郎盡明哲。乘鉞載旆如火烈。羽林積卒明號令。賊兵蹙戚憂巢穴。方春緩誅已偷息。天不假易行剽絕。太常請獻象功舞。史臣願勒西山岳。懸頭藁街救狂慢。積粟金城撫疲茶。西戎行告爾。勿逆果自坑。百蠻來威天下平。

題浙西新學

文翁昔時理蜀土。能令蜀人似鄒魯。范公今者鎮江東。亦云教化似文翁。文翁范公本同志。蜀人吳人有殊異。蜀人之先自魚鳧。不聞道德能過吳。吳前秦伯後季札。禮讓繼爲天下帥。迄今遺風未全滅。得逢賢侯益昭晰。本之舊俗已相百。況乃磨礪皆俊傑。當時文翁化蜀者。獨有揚雄及司馬。後生可畏不可誣。安知不在吳公下。吳人于今歌且仰。我公去矣安所做。願公上佐天王明。姬文孔術從茲行。

戲金壺道士法墨走筆雜言寄鄰幾聖俞

狂鯨蕩海海逆潮。巨鼇抃山山動搖。疾雷勁風自相薄。潛鱗伏介俱不聊。我無巨麴復藉糟。無思遠人心切切。

公是集卷十八

七言古詩

送劉涇州

劉侯之弓三百斤。壯氣可以摧浮雲。不忍區區事狐兔。自請治郡當邊塵。天子外家異恩禮。私廟舊鼎多功勳。少雖侍中貴省士。匈奴宜避飛將軍。憶昔汝南始相得。十年見君我髮白。可憐日月如過翼。我誠儒生猶恨惜。腰間寶刀手中策。馳騫萬里須努力。

種桐

東園芳樹盈百株。四桐晚種皆丈餘。不緣桃李鬪顏色。不爲琴瑟養肌膚。霜秋要成萬葉子。他日與致丹山雛。野人此意真不誣。鳳鳥不至吾已夫。

懷歸操二章

蟋蟀在堂歲云除。今我不樂鬱以紆。豈不懷歸畏簡書。蟋蟀在堂歲云逝。今我不樂濡以滯。豈不懷歸朋友畏。

新灘行

憶昔秭歸之山崩。震驚千里如雷霆。江水逆流洞庭竭。至今蓄怒猶騰凌。洄淵沈沈色如墨。髣髴半露峯巒形。懸波一瀉三百仞。魚鼈蛟龍俱不寧。天公高居漏天隔。無故設險憂羣生。時無伯禹真已矣。坐念疏鑿何由能。

靈椿館風折椿樹

野人獨愛靈椿館。館前靈椿聳危榦。風柔雨練三月餘。奕奕中庭蔭華傘。清陰及物不自惜。赤日當天損炎旱。危簷密牖清有餘。翠竹猗桐何足算。南山白虎嘯狂飈。孤根易動枝條散。芳華寂寞未及衰。萎遲遂比溝中斷。君不見月中紫桂天上榆。有名無實安自如。天河均澗易生植。甘露洒葉長扶疎。結根得所應自貴。庇蔭雖遠真徒虛。靈椿乎。莊子浪叟誠爾徒。爾當自取八千歲。今顛蹶矣人誰扶。

觀林洪範禹貢山川圖

若昔文命熙帝虞。大龜浮洛出元謨。嶽山瀉澤魑魅走。四海砥定由天扶。周摧嬴仆亂疆理。壁中但得司空書。先生始病學者惑。爲畫盈尺山川圖。職方輿地在眼下。地勢天文高下殊。始驚六合可舒卷。吾道指掌何難乎。先生當時持此藝。欲以稽古開天意。命乖時背竟何爲。于今傳者爲張宜。宜生五十頭已白。連蹇不爲州郡辟。朝廷何時舉行河。合笑平當未精蹟。平當以經明禹貢舉行河

昨日風贈王舒

昨日風。今日雨。門前泥坑昨夜土。秋懷慘悽誰最多。江南秀才洛下旅。十年麻衣走南北。飢寒不比倉中

鼠悠悠暖日庇重雲。舉頭看天不得語。

同永叔和介甫昭君曲

漢家離宮三十六。宮中美女皆勝玉。昭君更是第一人。自知等輩非其倫。恥捐黃金買圖畫。不道丹青能亂真。別君上馬空反顧。朔風吹沙闇長路。此時一見還動人。可憐快快使之去。早知傾國難再得。不信傍人端自誤。黃河入海能卻來。昭君一去不復回。青塚消摧人迹絕。惟有琵琶聲正哀。

子直攜雜文見過

王孫少年敏于筆。壯如驕驄勇鷓鴣。搖毫裂簡殊多端。因事陳詞不專一。春風吹空花滿眼。秋霜縮物寒次骨。元氣回復無常形。四時變化豈定律。斯文法天亦自然。古來達者猶識偏。今君始冠便如此。後日更老當誰先。憶昔孟軻有遺語。取之左右逢其源。乃知述作繫根本。根本苟盛枝條繁。君能致身取不朽。後世知吾得賢友。

戲題歐公廳前白鶴歐云此鶴畏寒常于屋中養之

明公雙鶴未易知。志在赤霄萬里外。低頭啄泥不自聊。拊翼向人幾可愛。北風崩雲三尺雪。側睨天池頗愁絕。不忍鳧鴈爭稻粱。誤譏燕雀附炎熱。答公厚意終一飛。萬人仰首公看之。

大風

嘈嘈大風起朔方。白日不沒天莽蒼。洞庭彭蠡半飛洒。厚地圓天俱抑揚。鷗鵬變化不可測。風雲感會生

羽翼方春殺氣何時極。生物悲愁少顏色。

同永叔哭聖俞

子真之後千餘年。人物寥落無幾傳。聖俞晚出江海壖。眉目自覺真神仙。氣如陽秋和以妍。文若河漢清且淵。大鈞匠物豈強鑄。飛黃絕塵寧俟鞭。名爲實賓道所捐。才與時選行苦遘。起草建禮衰可憐。掌教國子寒無氈。誰不富貴君重遷。誰不耄期君疾躋。長松摧壑芝焚烟。誰其尸之當問天。遺草大小三千篇。白玉落落珠聯聯。此自可敵當世權。物莫兩大猶信然。我家江南再世前。與君通家情有連。見君總角今華顛。于我莫逆好已偏。今也已矣嗟絕弦。淚如翻波正淪漣。翰林文章日月懸。鑿石銘德埋九泉。上書立後祿紹先。分宅恤窮祭有田。嗚呼豈非天下賢。義不背死而苟焉。念子可以無悁悁。

魯風二首時聞孔中丞卒

太山之雲朝觸石。清陰油油麗空碧。塵生東田禾麥稿。季女呼嗟待膏澤。北風吹空不成雨。中道無復見形迹。嗚呼天高誰問天。人今相說讒風伯。

新甫之柏徂徠松。結根高齊千仞峯。天令爾生稟剛直。壽比王喬誰與同。驚霆何時發巖底。堅節青姿化爲燬。君不見蟠木但以左右爲先容。能令人意尙奇詭。

續楊十七輓蘇子美詩

吾聞蘇侯不及識。內嘉孤雄世難得。文如翻波氣龍虎。風雲晦明在頃刻。中間流落似天意。今雖暫困當

永適忽傳長逝既已矣。知與不知同歎息。曩者避地金馬門。獻書著論驚上國。材豪志劇少所有。倏忽變化不可測。結交必皆天下士。朝廷見人退自斥。指揮功名力可取。城郭披露曾不惜。廟堂諸公交口薦。天子亦稱萬人敵。中道齟齬空歸來。扁州東浮問損益。登臨姑蘇睨滄海。憤歎始覺區中窄。徉狂爛醉遺日月。欲乘長風掛危席。安期洪崖殊髣髴。蓬萊方壺定可陟。浩歌秀句凌斗牛。至今紫氣猶融奕。若人不應逐物化。吳中好事先已惑。邇來安知非形解。世上蜉蝣限畛域。遺編逸藁尙多有。但恐靈物隨變匿。君當收拾藏永久。毋以交情死生易。

大雨行

日中驟雨海上來。懸流滂沱正奔猛。坳堂舊乾不濡足。回頭穿鑿成方井。炎涼更代殊恍惚。明晦回環不俄頃。地形天事無久長。何況人情足馳騁。君不見張耳陳餘刎頸交。中道相捐豈終永。

錦繡溪行

金霞卷風漾清碧。翠藻玉沙相歷歷。旌旗不動蛟龍眼。空濛錦繡張春色。五紋婉轉沈吟香。時時飛出雙鴛鴦。笑窺貝闕倚瑤瑟。金華射天高下光。海近蓬萊卻清淺。星客浮槎莫輕返。齋房幾日饜華芝。瑤席香殘舞燕歸。錦繡溪邊春幾許。欲尋清淺醉芳菲。

送鄰幾之官兼遊天台四明見于詩中

蓬萊謫仙頭半白。搖搖去爲江南客。長風醉送浮海航。宿雨自蠟登山屐。山海使人行易迷。君雖吏隱歸

何時若攀琪樹亦相憶。三鳥飛來寄消息。

襄信新蔡兩令言飛蝗所過有大鳥如鶴數千爲羣啄食皆盡幕府從事往按視如言因作短歌

記其實

廣州奇禽鴻鵠羣。勁羽長翼飛蔽雲。嘯儔命侶自其職。飲水棲林餘不聞。今年飛蝗起東國。所過田疇畏蠶食。神假之手天誘衷。此鳥乃能去螟賊。數十百千如合圍。搜原剔藪無子遺。歷尋古記未曾有。細察物理尤應稀。憶昔虞舜德動天。象爲耕地鳥耘田。聖時多瑞亦宜爾。請學春秋書有年。

月夜聞唱歌

滿城明月中宵白。淮南唱歌如淮北。春風忽起高入雲。餘聲卻下盤阡陌。南音俚曲自相知。時復一笑情熙熙。誰道幽蘭白雪好。只見獨謠應獨悲。

寄楊彥文

楊窮居吳中予與楊友貧無以贍作此見意

高冠長劍非一賢。子獨困窮情可憐。差池早爲後曹掾。坎軻復就東山眠。昔者結交期白首。邇來傾蓋凡幾年。窮轍決江竟寥闊。縑袍共敝無由緣。人生出處不如意。自古富貴皆由天。天門九重不可問。咄嗟拊髀心拳拳。

寄范十九

君毋走馬君竟走。走馬蹶塊傷君手。踏蹬翻成折臂翁。世間肯要三公否。西郊敵騎非常壯。年年犯邊殺

邊將勁弓長劍如君徒。始堪追逐青海上。功名棄置時未可。意氣激昂人所望。側身萬里風雪寒。無由贈子黃金丹。

劉涇州以所得李士衡觀察家寶硯相示與聖俞王汝同觀戲作此歌

李侯寶硯劉侯得上有刺史李元刻。云是天寶八年冬。端州東溪靈卵石。我語二客此不然。天寶稱載不稱年。刺史爲守州爲郡。此獨云爾奚所傳。兩君胡盧爲絕倒。嗟爾于人幾爲寶。萬事售僞必眩真。此固區區無足道。

和府公觀劉團練寶刀詩

此刀新羅所貢上以劉正先爲珧珙錄瑋制作絕巧也

吾宗寶刀清如水。東夷昔時獻天子。孤光晝射滄海寒。殺聲夜吼蛟龍起。上爲錄瑋下珧珙。粲如珠璣耀朝日。制度還存三代風。精神未是塵中物。祕藏武庫人莫窺。外家將軍獨得之。四方昇平竟未試。流落功名翻可悲。時無薛燭誰賞異。廟堂宗工詩絕世。丈夫要取萬里侯。肯令神兵負詩意。

與聖俞君章樞言持國飲因以太公大刀王莽錯刀示之。大刀長五寸半闊一寸正爲刀形鑄作

絕精巧其面有古文三字上一字可曉曰齊下二字不可曉其背爲圓法錯刀長二寸厚四分

金錯篆文兩字上曰一下曰刀又其下曰平五千沂州民鑿地破古塚獲之各數十百枚稍爲

好事者購取王公和守沂州求得數枚以其一遺予

君不見九府圓法傾東鄰。齊公大刀又日新。君不見黃牛白腹蕩滄海。亡新錯刀忽遽改。一盈一虛更貿

遷勢如流波不復還。邇來上下各千歲。自太公至新室千歲。自新室至今亦千歲。何異俛仰須臾間。王伯之事百存一。況此錢刀握中物。愚智共盡令人悲。興廢相尋空史筆。前有一樽酒。浩歌爲君壽。君能識此當日醉。身世悠悠復何有。

往年築青澗城各有得佩刀者莫知其何世物余按故史則赫連勃勃所鑄也所謂大夏龍雀者是矣客因以遺予爲作七言詩

赫連寶刀利且堅。霜鱗錯落龍雀環。當時鑄作妙一世。赫赫似與天相連。雷公祝融借光彩。蓬飛中原鯨振海。神物羞爲不義屈。一去人間向千載。蛟蟠虎化自有時。氣如投蜺世莫知。力能提攜倚天外。一掃雲霧君看之。

寒林石屏風

屏風畫山皆任假。寒林石屏自然者。蒼紋紺脈亂交加。短樹高枝自瀟洒。觀者寧分畫與非。但怪奇妙非人爲。又疑古苔著石瘦。何得本末無纖遺。桑田變海松柏死。寒暑不及榮枯期。佳哉大鈞育羣類。埏鎔精巧無巨細。天真通貌皆生成。俗師筆墨那形似。居人幽獨最相宜。樸厚遠謝雕鏤姿。城中雲母屏更好。慎勿浪示豪家兒。

秋園行

空園過霜無餘綠。上有梧楸下蘭菊。疎陰雖存不自蔽。殘香已斷誰更續。憶昔繁華今九秋。天時人事略

相伴放懷未能驚物化。爛醉聊可爲君謀。

槐陰

都城廣陌如綺分。綠槐左右結浮雲。火輪東升又西沒。倒影參差朝復曛。輕車重馬誰家子。側肩相逢密如蟻。共看擇蔭須臾間。可憐爭道尋常裏。下有溝水日夜流。年華視此俱悠悠。

春陰

楚山春陰誰復數。朝朝出雲暮暮雨。高唐恍惚信有神。晦明代謝今猶古。蜀江渺渺水東流。苦霧淒雨翻似秋。日月高懸不可遇。眼看卑濕令人愁。

桃源

武陵谿水清無塵。武陵桃樹花長春。會買漁舟謝賓客。來作武陵山下人。秦人洞府晉人谿。碧草紅桃處處迷。流水至今堪悵望。問津從古失端倪。山川非復壺中見。雞犬猶傳雲外啼。願視人間真敵屣。爲煩仙子託幽棲。

和永叔十二韻次韻

愛公猶愛屋上烏。何況公家手種菊。憶昔重陽醉共賞。已落紗帽歡不足。誰令繁霜逼芳意。坐使嚴風卷餘馥。主人于此情不淺。上客方來強令束。馬聲玲瓏搖玉環。屢綦參差破苔綠。重尋荒徑憶五柳。因咏東籬憩茅屋。已憐歸鳥有真意。更覺晨風傷局促。引杯大醕傾玉壺。擊節應非響喬木。物華瞬息暫入夢。世

事蚊虻一過目。浮丘接袂當鳳舉。俗士歌驪真狗曲。衣冠頃來塵土變。形貌今者毛髮禿。公詩乃使我忘老。逸調何由能繼屬。

共城寄仲弟

共城稻秧如黍禾。共城木少種竹多。熟聞邇來風土美。貧無置錫知奈何。百門蒼翠太行麓。百泉清冷淇水澳。長安宦遊跬步到。隱居鷄黍終年足。人生早念少游言。燕頷莫矜飛食肉。卽今囊空未果歸。且爲黎侯歌式微。寄聲好在久良苦。異時自檝來迎汝。

田家行

春耕高原不辭苦。晚歲離離滿百畝。豈知輸稻如輸金。始信種田虛種黍。持黍易金入市行。粳稻踴貴黍價輕。十鍾一石亦不憚。三時力農空自驚。去年歲荒食半菽。今年歲豐彌不足。物理悠悠難豫謀。誰謂豐荒略相覆。

荒田行

大農棄田避征役。小農挈家就兵籍。良田茫茫少耕者。秋來雨止生荆棘。縣官募兵有著令。募兵如率官有慶。從今無復官勸農。還逐魚鹽作亡命。

戲作青蘘香毬歌

藍田仙人採寒玉。藍光照人瑩如燭。蟾肪淬刀昆吾石。信手鑄花何委曲。濛濛夜氣清且嫺。玉縷噴香如

紫霧天明人起朝雲飛。髣髴疑成此中去。

櫻桃花開留徐二飲

晨暉照屋清露晞。櫻桃花房開欲齊。繁花先得造物巧。不與衆卉爭高低。參差萼萼相照耀。恍惚滿眼令人迷。鳥驚風過若無意。雲起雪飛空滿蹊。仰攀濃香俯玩影。應接不暇昏鴉棲。流光易失動壯士。斗酒相勞和天倪。浩歌直欲并日夜。醉耳不能分鼓鼙。人間出處未嘗定。暫雖會合終當睽。子今躍馬至萬里。脫略塵土排雲霓。豫知明年花復發。悵望君子無由攜。少年且作後日意。更使封植驚淮西。

萬際生

白頭書生南國賢。讀書萬卷夜忘眠。陋巷簞瓢未曾飽。苦心獨行竟誰憐。繙經遍窮十二等。陳力復過三千年。莫笑青袍學士老。太平能頌連中弦。

